

Naqqiut

(Siunnersuut 13. august 2019-imeersoq taarserpaa)

(Aningaasaqarnikkut allaffissornikkullu sunniutaasussanut nassuiaatit itisilerneqarput. §§ 1-imut, 3, imm. 2-imut, 13-imut, 14-imut, 25-imut aamma 33-imut aalajangersakkanut ataasiakkaanut nassuiaatit itisilerneqarput. Tamatuma saniatigut kukkunersiuinermut erseqqissaanermullu tunngasunik iluarsiiisoqarpoq.)

Siunnersuummut nassuiaatit

Nassuiaatit nalinginnaasut

1. Aallaqqaasiut

1.1. Siunnersuummut tunngaviusoq aamma siunertaa pingaarneq

Siunnersuummi matumani siunnerfigineqarpoq, pisortat innuttaasunit pisassarisaminnik akiliisitsisarnerisa nutarterneqarnissaa, peqatigisaanillu akiitsunik ajornartorsiuteqarnermut aammalu siunissami pitsaaliuinissamut, suliniuteqarnissaq. Taamaalilluni siunnersuut nunatsinni aningaasaqarnermut iluaqutaassasoq, kisiannili pingaartumik innuttaasunut akilinngitsuukkanik akiitsoqarlutik ajornartorsiuteqavissortunut iluaqutaassasoq, naatsorsuutigineqarpoq. Maannakkut akiitsunik ajornartorsiuteqarnerup annertuujunerani iliuuseqarnissaq, aammalu ersiutitik suliarinninnissamut taarsiullugu akilinngitsuukkanik akiitsoqarnermik ajornartorsiutip sorlaanut iliuuseqarfiginninnissaq, pisariaqartinneqarpoq. Imminut pilersornerulernissamut aammalu nammineernerulernissamut ineriartornissamut, nunatsinni unammilligassat iliuuseqarfigineqarnissaat, ilanngullugulu pisortanut akiitsut akilinngitsuukkat annertusiartuinnaalernissannik pitsaaliuinissamut suliniuteqarnissaq, apeqqutaavoq.

Innuttaasunut taakkununga akiliisitsisarfirmik atuutilersitsineq, ataasiakkaanut aningaasaqarnerup aqussinnaalernissaanut aammalu pisortanut aamma namminersorlutik inuussutissarsiortunut allaffissornikkut pisariillisaanissamut, iluaqutaasinnaavoq.

Siunnersuummi matumani akiliisitsisarfik taagorneqartoq Ilangaassivik, akiligassat akilerneqartarnerinik suliaqarfiussaq, atuutilersinneqassasoq siunnersuutigineqarpoq. Akiligassanik akiliisitsisarneq innuttaasunut pisortanut akilinngitsuukkanik akiitsoqartunut pisussaaffiussaq. Innuttaasut akilinngitsuukkanik akiitsoqarnermik ajornartorsiuteqanngitsut Ilangaassivik aqutigalugu akiligassanik akiliisitsisarnermut nammineq kajumissutsiminnik ilanngutsissinnaapput.

Innuttaasut akiligassanik akiliisitsisarnermi pineqartunut ilaasut, pisortanit akiligassiinerit atuuttut akilinngitsoornissaannut periarfissaqassanngillat. Ataasiakkaat isertitamik siunertanut allanut atornissaannut periarfissaqarnerat annikillisinneqassaaq, kisianni peqatigisaanik innuttaasut aningaasani atorsinnaasaminnik, akiligassat akilerneqareerneranni innuttaasut

aningaasanik minnerpaamik atorsinnaasaminnik peqarnissaat siunnersuummi qulakkeerneqarpoq. Innuttaasunut pineqartunut ilaasunut tamatuma malitsigisaanik pisortanit akiligassiissutit, inuup nammineq akiligassaqarfiinut sanilliullugu, salliutinneqartussaatinneqassapput. Kisianni pisortat assersuutigalugu inigisamit anisitsisoqarnerani illusimavigigallagassamik innersuussinissamut, isumaginninnermut inatsisit naapertorlugit arlalinnik pisussaaffeqarnerat, tassani takuneqarsinnaavoq.

Ilangaassivik aamma eqaatsumik aaqqiissutissatut, akileraartarnermi iluarsaaqqinnermik ingerlasumik aammalu pisussamik passussiviusussatut, isigineqarpoq.

Akiliisitsiniarnermut suliassaqarfimmi 2018/2019-imi suliassat 300.000-it missaanniipput ataatsimut katillugit 970. mio. koruunit missaat akilernerqarsimanatik. Innuttaasut 30.000-it missaanniittut Kalaallit Nunaanni minnerpaamik 1-imik akilinngitsuukkamik akiitsoqarlutik nalunaarsorsimapput. Akiitsunik akilinngitsuugaqartarnermut ajornartorsiuteqarnermi taamaalilluni nunatsinni innuttaasut affai sinnerlugit pineqartunut ilaapput.

Piffissap ingerlanerani ineriartorneq isigissagaanni, ukiuni kingullerni aningaasat nalingi pitsanngoriartoraluartut aammalu suliffissaaleqisut ikiliartoraluartut, ajoraluartumik annertuumik pitsaanerulersimangilaq.

Ullumikkut innuttaasunit pisassat akilersinniarnannut allaffissornikkullu aqunneqarnerannut isumalluutit annertuut atorneqartarput. Pisassat innuttaasunit akilersinniarnissaannut ataasiakkaatigut nalilersuineq tunngavigalugu suliani ataasiakkaani tamaginni assigiinngitsunik alloriartoqartariaqartarpoq. Akiitsut ataasiakkaanut ilaqutariinnullu, inooqatigiinnermut aningaasaqarnermullu tunngatillugu, annertuunik nanertuutaasarput. Aningaasakilliorneq aamma akiitsoqalertarneq, inooqatigiinnikkut arlalinnik sunniuteqarnerlulernermik aarlerinartorsiortitsinerulertarpoq, soorlu inooqatigiinnermi mattussaaneq, inigisamit anisitaaneq, angerlarsimaffeqaannginneq, nammineq inuunerup takorloorsinnaajunnaarnera aammalu imigassamik ajornartorsiuteqarneq.

Pisassat annertooujussuit inuussutissarsiortunut, assersuutigalugu sulisut akissarsiaannik tunniussinngikkallarnerit allaffissornikkut aqutsisussanut, suliakkersuutaapput. Akissarsianik tunniussinngikkallarneq, amerlasuut Kalaallit Nunaanni suliffeqarnermi sivikitsuinnarmik suliffeqartarnerannut piseeqataasoq, naliliisoqarpoq, tassami innuttaasut akissarsiaannik tunniussinngikkallarneq aallartikkaangat suliunnaartartut takuneqartarpoq.

Annertuunik sunniuteqarnerluttartunut inuiaqatigiit unammilligassaqarnerat pineqarpoq.

Innuttaasut akilinngitsuukkanik akiitsoqartut akiligassat akilernissaannik ikiorlugit, innuttaasut akiitsuinut akiliisinniartarlugit ersiutit sammiinnarnagit, ajornartorsiutit pitsaaliornissaat, pingaaruteqarpoq.

Peqatigisaanik innuttaasut amerlasuut pisortanut akiitsunik akilinngitsuugaqarsimannngitsut, aammalu aningaasaqarnerminnik isumaginnessinnaasut, akiliisitsisarfimmi siunnersuutigineqartumi pisariaqaqngitsumik ilaatinneqannginnissaat, siunertaavoq.

1.2. Inatsimmik piareersaalluni suliaqarneq

Akiitsut akilinngitsuukkat annertusiartuinnarnerisa annikillisinneqarnissaannut suliniuteqarnissaq, inuiaqatigiinni assigiinngitsunit ujjartorneqartarpoq. Taamatut kissaateqarneq ilaatigut politikerit tungaanniit Inatsisartuni partiinit aamma Naalakkersuinikkut Ataqaatigiissaarisoaqatigiinnit (PKG) nunatsinni kommunalbestyrelsinit ilaasortaaffigineqartumit, oqaatigineqartarpoq. Suliniuteqarnerit akiitsut akilinngitsuukkat annertusiartuinnarnerinut pakkersimaarisussat, kommunit aningaasaqarnerannut siunissamilu suliassanik suliarinnittarnerinut qitiulluinnartut, kommunit aamma oqaatigisarpaat.

Siunnersuummi siunertaavoq nunatsinni innuttaasut ilaasa akiitsuisa akilinngitsuukkat annertusiartuinnarnerannik ajornartorsiutinut annertuunut iliuuseqarnissaq aammalu suliniuteqarnerit allat, soorlu akiitsulinnik siunnersuisarneq ukiuni 2-ngajanni ingerlareersimalersup, ineriartorteqqinnissaa.

Siunnersuummi akiitsunut akilinngitsuukkanut suliniuteqarneq allanngortinneqassasoq siunnerfigineqarpoq, taamaalilluni suliniuteqarneq pingaarneq siunissami tassaalissalluni aallaqqaammullu akiitsunik annertusiartortitsinissap pinngitsoortinneqarnissaa. Siunnersuut taamaattoq ilaatigut Akileraartarnermut Atugarissaarnermullu Isumalioqatigiissitami 2011-mi sammineqarpoq, taaguuteqartinneqarluni Kiffaq. Ilusiliami Savalimmiuni ilanngaasiinnginnermi akileraarutinut aaqqissuussineq isumassarsiorfigineqarpoq.

Taakkua isumaliutersuutigineqartut tunngavigalugit tunngaviusunut nalunaarusianik aamma teknikkimut allaffissornermullu tunngasortai assigiinngitsut pillugit nalunaarusianik suliaqartoqarpoq. Tamatuma saniatigut tamatumunnga ingiaqatigitillugu akiliisarfiup inatsisinut tunngasortai suliarineqarput. Suliaqarneq taanna 2017-imi juunimi Ilangaassivik pillugu Inatsisartut inatsisissaannut siunnersuutip tusarniaassutigalugu nassinneqarneranik inerineqarpoq. Kisiannili siunnersuut Inatsisartunut saqqummiunneqanngilaq.

Siunnersuummi matumani siunnersuut 2017-imeersoq, aammalu suliaqarneq aammalu siunnersuummut 2017-imeersumut tusarniaanermut akissuteqaatit il.il. tunngavigineqarput.

Taamaattoq siunnersuut allannguutininik, erseqqissaanernik pisariillisaanernillu arlalinnik imaqarpoq. Siunnersuummut 2017-imeersumut sanilliullugu allannguut pingaarnerpaaq tassaavoq, akiligassanik akiliisitsisarneq taamaallaat innuttaasunut akilinngitsuukkanik akiitsoqarlutik ajornartorsiortunut pisussaaffiutinneqarmat. Taamatut allanngortitsinerup malitsigisaanik sunniutaasunik arlalinnik iluarsiiisoqarpoq, aammalu innuttaasoq qaqugukkat akiliisitsinermi pineqartunut ilaalissanersoq maleruagassanik ilanngussisoqarluni.

Tamatuma saniatigut aningaasat pisassarisat qaffanneqarput, taamaalillutik innuttaasut siunnersuummi pineqartut isertitaminnit qaffasinnerusunik tunniussivigineqartarnissaat qulakkeerneqarluni.

2. Siunnersuummi immikkoortut pingaarnertit

Ilanngaassivimmut pingaarnertigut siunertaavoq pisortat akiligassiissutaannik akiliisarnernik pisariillisaanissaq sunniuteqarluarnerulersitsinissarlu. Piffissaq eqqorlugu akiliisalersitsinikkut, innuttaasut pisortanut akiitsuusa akilinngitsuukkat annertusiartornissaannik pinngitsoortitsinissap saniatigut, pineqartunut ilaatinneqartunut tunngatillugu akiliutinut sullissiviup pisariitsuutinnissaatalu qulakkeerneqarnissaa, aamma inatsimmi siunertaavoq. Ilanngaassivik taamaalilluni ataasiakkaanut qaammatit tamaasa isertitaminnik aammalu aningaasartuutiminnik pitsaanerusementik paasilernissaannut iluaqutaassaaq.

Ilanngaassivimmut siunnerfiusoq pingaarneq tassaangilaq akiitsut akilinngitsuukkat pioreersut akilersinniarneqarnissaat, kisianni nutaanik akilinngitsuukkanik akiitsoqalertarnerup pinngitsoorneqarnissaa siunnerfigineqarluni. Pitsaaliuinissaq ataasiakkaanut pingaaruteqarpoq, tassami tamanna akiliisarnernik kinguaattoorluni, taamaattumillu tuavisaarinermut akiliuteqartinneqarluni, kingusinaartumik akiliinermi ernialiussat aammalu pisortanut akiitsut amerliartuinnarlutik, pisoqalinnginnissaanut iluaqutaassaaq.

Ilanngaasiinnginnermi aningaasarsialerinnermik ilusiliaq taamaattoq Savalimmiunit ilisimaneqarpoq, tassani ukiuni arlalinni iluatsitsiviulluurtumik taamaaqataanik periaaseqartoqarsimalluni. Pisortat isertitanit akileraarutininik akiliisitsisarput, kiisalu isertitat aningaasarsisussanut ataasiakkaanut tunniunneqannginneranni pisortat pisassaannik aalajangersimasunik akiliisitsisarlutik. Tulliullugu aningaasarsisussanut ataasiakkaanut isertitat sinneruttut tunniunneqartarput. Ilanngaassivik aallaqqaammut akileraarutininik imaqartinneqassanngilaq, kisianni tamatumunnga taarsiullugu akiligassarpassuit ataasiakkaat pisortanit tigusartagaasa, akilernerneqartarnissaat isumagineqassaaq. Kalaallit Nunaanni ilusiliaq taamaalilluni Savalimmiuni ilanngaasiinnginnermi aningaasarsialereriaaseq allanngortilaarlugu suliaasutut isigineqarsinnaavoq.

Siunnersuut makkuninnga pingaarnernik imaqarpoq:

- Innuttaasut aningaasarsianit isertitaat aamma isertitat allat arlallit Ilanngaassivik aqutugalugu ingerlatinneqartassapput. Tamatuma kingunerisaannik sulisitsisut tamarmik Ilanngaassivik aqutugalugu aningaasarsianik tunniussisassapput. Pisortanut tunngatillugu innuttaasunut tunniunneqartussat tamarmik Ilanngaassivik aqutugalugu tunniunneqartassapput. Tamatumani pineqartunut ilaapput assersuutigalugu suliffeerunnermi ikiorsiissutit, ilinniagaqarnersiutit utoqqalinersiutillu.

- Innuttaasut Ilangaassivik aqutugalugu isertitaat il.il., pineqartoq akiligassanik akiliisitsisarnermi pineqartunut ilaappat imaluunniit ilanngutsissimappat, aatsaat akiligassanik akiliisitsinermut atorineqqaqusaapput.
- Akiligassanik akiliisitsisarnermi pineqartunut ilaanngitsunut, isertitanit akiligassat ilanngaatigeqqusaanatik, aningaasarsiat il.il. kontumut innersuunneqartumut tunniunneqassapput.
- Akiligassanik akiliisitsisarnermi pineqartunut ilaasunut, aatsaat Ilangaassivimmi isertitat akiligassat innuttaasup pisortanit tigusimasaasa akilerneqarnerannut atorineqareernerisa kingorna, aningaasarsiat il.il. tunniunneqassapput. Aningaasat sinneruttut innuttaasup kontuanut akilerneqassapput, taamaalillutik aningaasat ulloq aningaasarsivissaq tiguineqarsinnaassallutik.
- Pisortanut akiitsoqaraanni imaluunniit arlalinnik akiitsoqarnermi suliaasaqarsimappat, akiligassanik akiliisitsisarnermi pineqartunut ilaasussaataasooqassaaq.
- Akiitsoqanngikkaanni akiligassanik akiliisitsisarnermut nammineq kajumissutsimik ilanngutsittoqarsinnaavoq imaluunniit ilaajunnaartoqarsinnaalluni.
- Siunnersuummi innuttaasut akiligassanik akiliisarnermi pineqartunut ilaasut tamatigut isertitamik ilaannik tunniussivigineqarnissaat qulakkeerneqarpoq. Taamaalilluni innuttaasup qaammammut 4.000 koruuninit annikinnerusunik, aammalu aappariinnut ataatsimut katillugu 6.000 koruunit inornagit, atorsinnaasaqarneranik kinguneqartumik, aallaaviatigut akiligassanik akiliisitsisoqarsinnaanngilaq. Tamatuma saniatigut meeqqanik 18-it inorlugit ukiulinnik angerlarsimaffimmi najugaqartunik najukkamiittoqarpat, aningaasat atorsinnaasat qaffanneqassapput. Tamatuma saniatigut pisuni allani, innarluutillit pineqarpata, aningaasat atorsinnaasat qaffanneqassapput.
- Akiligassaq Ilangaassivimmi akilersinneqartussatut qaammatit 3-t tikillugit uninngatinneqarsinnaavoq. Innuttaasup qaammammi ataatsimi akiligassaq akilersinnaanngippagu, akiligassaq isertitanit innuttaasup qaammatini tulluuttuni tigusassaannit akilersinneqassaaq. Piffissami tassani akiligassaq Ilangaassivimmi uninngatinneqassaaq, innuttaasooq ernianik aamma nukingisaarinermut akiliummik akiligassinneqassanani.

Ilangaassivik pisortanit akiligassiissutinik akiliisalersitsinermut sakkussaavoq. Ilangaassivik aningaaserivimmi kontumut imaluunniit akiliisarnermut sullissivimmut taartissaanngilaq. Namminersortut pisassarisaat, innuttaasup akiligassai, soorlu oqarasuaammut angallattakkamut pisartagaqarneq, sillimmasiissutit, aningaaserivimmi taarsigassarsiat il.il., Ilangaassivik aqutugalugu akilersinniarneqarsinnaanngillat. Aamma namminersortunut inissianik attartortitsisartunut aningaasartuutitut tamanna atuuppoq.

Siunnersuummi siunertaavoq, Ilangaassivimmut inatsisitigut killissalersuinissap qulakkeernissaa, ilanngullugu oqartussaasut akuusut inissisimanerannut akisussaaffinillu aalajangersaanissaq. Inatsit suliaasaqarfiit ilaanni, nalunaarutinik aalajangersaanikkut naammassineqartussanik inatsisitigut immersugassatut, taaneqarsinnaavoq.

Nassuiaatini nalinginnaasuni, imarisaa malillugu allatut pisoqartussaasimanggippat, oqaaseq “akiligassaq” oqaatsimut “akileeqqusissut” assingutillugu atorpeqarpoq. Inatsimmi akileeqqusissut, periaatsitigut pingaaruteqartumik nassuiaasoq, atorpeqarpoq. Akileeqqusissut, piffissamut killiliussap iluani akiligassiisumut aningaasanik aalajangersimasunik akiliisoqassasoq, pillugu Ilanngaassivimmu akiligassiisumit ilitersuutaavoq. Akileeqqusissuteqarnissamut taamaalilluni pisortanit akiligassiisoq piumasaqaateqassasoq piumasaqaataavoq (akiligassiissut).

2.1. Isertitat, Ilanngaassivimmu akilerneqartussat

Siunertaavoq, siunnersuummi isertitat innuttaasup tigusartagaasa annertunerpaartaasa pineqartunut ilaatinneqarnissaat. Innuttaasut akiligassaasa ingerlaavartut, isertitanit innuttaasup akissarsiarisassaannit aammalu Ilanngaassivik aqutugalugu tunniunneqartussanit, akilerneqarsinnaanissaasa qulakkeernissaa, qitiutinneqarpoq.

Tamatuma saniatigut innuttaasumut tunniussinerit tamarmik maleruagassat ataatsit malillugit suliarineqartalerisaa malitsigisaanik sulisitsisunut aamma pisortanut allaffissornikkut annertuumik oqilisaasoqartussaavoq. Allatut iliuuseqarnermi tigusisussaq akilinngitsuukkanik akiitsoqarnersoq taamaanginnorsorluunniit apequtaalluni, isertitat assigiinngitsumik tunniunneqartalissapput.

Innuttaasut isertitaasa Ilanngaassivik aqutugalugu innersuunneqartalernissaannut tamatuma saniatigut siunertaavoq, sulisitsisut aamma aningaaseriviit il.il. aningaasarsianit isertitat il.il. qanoq tunniunneqartarnissaannik misissuillutik innuttaasoq aalajangersimasooq akiitsunik akilinngitsuugaqarluni ajornartorsiortuunersoq paasisinnaassappassuk, nuanninngitsumik inooqataanermi tusaamanerlutsitsisumik sunniuteqarnissaata pinngitsoortinnissaa.

Siunnersuummi isertitat A-t sulluunniit pineqartunut ilaassapput, taakkualu tassaagajupput pisortani aamma suliffeqarfanni namminersortuni atorfeqarnermit aningaasarsiasat il.il.

Tamatuma saniatigut siunnersuummi pisortanit tunniunneqartartut arlallit pineqartunut ilaapput, assersuutigalugu isumaginninnikkut ikiorsiissutit, ilinniagaqarnersiutit, utoqqalinersiutit il.il. Soraarnerussutisianut aningaasaateqarfinit aamma sillimmasiisarfinit soraarnerussutisiat tunniunneqartartut.

Siunnersuummi, aktiaatileqatigiiffinit aamma piginneqatigiilluni ingerlatseqatigiiffinit Kalaallit Nunaanni angerlarsimaffeqartunit iluanaarutit aamma siulersuisunut aningaasarsiarititassat il.il., pineqartunut ilaassapput. Siunnersuummi tunisinerup aningaasartai aalisartut piniartullu aalisakkanik pisaminnillu tunisinerminni tigusagaat, pineqartunut ilaapput.

Siunnersuummi aamma pisortanit inuussutissarsiortunut namminersortunut isertitanik B-nik tunniussinerit pineqartunut ilaapput. Taakkua assersuutigalugu tassaasinnaapput eqqartuussissuserisunut aamma siunnersortitut namminersortutut inuussutissarsiortunut tunniussinerit. Inuinnaat akiligassanik inuussutissarsiortunut namminersortunut akiliisarneri, siunnersuummi pineqartunut ilaatinneqanngillat.

2.2. Akiligassanik akiliisitsineq

Isertitat tamarmik Ilanngaassivik aqputigalugu tunniunneqartartussaagaluartut, innuttaasoq akiliisarfimmi pineqartunut ilaanngippat, siunnersuut malillugu akiligassanik akiliisitseqqusaanngilaq. Akileraartarnermut ingerlatsivik aalajangiisimanngippat, imaluunniit innuttaasoq nammineerluni ilanngutsissimanngippat, aallaaviatigut akiliisarfimmi pineqartunut ilaassanngilaq.

Innuttaasut Ilanngaassivik aqputigalugu akiliisarfimmi pineqartunut ilaanerisa malitsigisaanik pisortani oqartussanut amerlasuunut aamma pisortat inissiaatileqatigiiffiit akiligassanik akiliinerit, akiliinernik sullissivinnut assingusoq periaaseq atorlugu ingerlaannaq pisassapput.

Akiliisarfimmi pineqartunut ilaanngitsunut, kontumut innersuussaannut isertitaat tunniunneqaannartassapput. Innuttaasut taamaalillutik ullumikkutut nammineerlutik assersuutigalugu akiliisarnernut sullissivik imaluunniit netbank aqputigalugu allatut akiligassaminnik akiliinissaq nammineerlutik isumagissavaat. Taamaattoq tamatigut Ilanngaassivik aqputigalugu akiligassanik akiliisitsinissamut nammineq kajumissutsimik ilannguttoqarsinnaavoq.

Innuttaasoq akiliisarfimmi pineqartunut ilaassanersoq Akileraartarnermut ingerlatsivik aalajangiissaaq, innuttaasoq:

- Pisortanut akilinngitsuukkanik akiitsoqarpat
- Ukiut 5-it kingullit iluanni pisortanut akiitsunut akilinngitsuukkanut suliat minnerpaamik 3-t tassunga tunngassuteqarsimappata.

Aalajangiinnginnermi innuttaasoq attuumassuteqartut minnerpaamik sapaatit akunnerinik 3-nik piffissalerlugu tusarniaaffineqassaaq. Innuttaasoq taamaalilluni aalajangiinissamut eqqarsaatigineqartumut akerliliissuteqarsinnaavoq.

Tassani inatsimmi tunngavissarititaasut aallaavigalugit inatsimmi pisussaaffiusumik aalajangiineq pineqarpoq. Innuttaasup tunngavissarititaasut naammassisimappagit, innuttaasoq akiligassanik akiliisitsisarnermi pineqartunut ilaatinneqassasoq aalajangiisoqarsinnaavoq.

Akerliliissuteqarnerit suliasamik suliarinninnermi pingaartinneqarsinnaasut taamaalillutik pingaartumik akilinngitsuukkamik akiitsoqarnermut akerliliissuteqarnermut tunngassuteqassapput. Akiitsut akilinngitsuukkat piunerat tunngavilersukkamik nalornissutigineqalersimappat, piumasaqaateqartoqarnerisoq aalajangernissaa siunertaralugu, akiligassiisumut akileraartarnermut ingerlatsiviup saaffiginninnissaa pisariaqartussaavoq.

Tamatuma saniatigut innuttaasup suliami pineqartumut tusarniaanermut piffissamut killiliussap iluani akiligassat akilinngitsuukkat akilernerisigut, akiligassanik akiliisitsisarnermi pineqartunut ilaalernissaq pinngitsoorsinnaavaa.

2.3. Aningaasat pisassarisat aamma akiliinerit tulleriinnilersorneqarneri

Innuttaasup aningaasarsianit aamma pisortanit ikiorsiissutinit isertitaasa piffissat ilaanni akiligassat ilanngutsinneqarsimasut akilernissaannut naammagatik, pisoqarsinnaasarpoq.

Innuttaasup isertitaasa ingerlaavartut innuttaasup aningaasartuutaannik akiliinissamut naammagatik pisoqalernissaa Ilanngaassiviup pinngitsoortissinnaanngilaa. Taamatut pisoqarnerani, ullumikkut pisartut pisortanit ikiorsiissutit, suliffissaaleqinermi ikiorsiissutit, ineqarnermut tapiissutit il.il. atuuttut pillugit, innuttaasooq nammineerluni aallaqqaammut oqartussanut il.il. attuumassuteqartunut saaffiginnittariaqarpoq.

Ilanngaassivimmuut pingaaruteqartoq tassaavoq, pisut taamaattut innuttaasumut naapertuuttumik iliuuseqarfiginissaannut, peqatigisaanillu pisortanut akiitsut annertusiartuinnarnissaasa pitsaaliornissaannut, naapertuuttumik periaasissarsisarnissaq.

Akiliisarnermi ajornartorsiulertarneq eqqarsaatigalugu siunnersuut sunniiniutissanik pingasunik imaqarpoq:

1. Aningaasartat minnerpaaffissaat pillugit maleruagassat
2. Akiligassiissutinik pingaarnersuineq
3. Qaammatini 3-ni akiliinissamut killissaliinissaq

Aningaasat atorsinnaasat pillugit maleruagassat

Aallaqqaasiullugu nassuiarneqartutut siunnersuutigineqarpoq, innuttaasup qaammatit tamaasa imaluunniit ullut 14-ikkaarlugit isertitaminit tigusartagassaanik, siunnersuummi aningaasartat minnerpaaffilerlugit killissaliussamik aalajangersaasoqassasoq. Siunertaavoq innuttaasup isertitaminit annertunerpaaq, nerisassarsinissamut aamma aningaasartuuteqarfigisaminut naammaannartumik angerlarsimaffeqarnissamut pisariaqartut, tigusassagai.

Atorsinnaasat aningaasartaannut meeqqat 18-t inorlugit ukiullit angerlarsimaffimmi najugaqartut amerlassusaat, kiisalu innuttaasooq katissimanersooq, apeqqutaassaaq.

Aningaasat atorsinnaasat ima isigineqassapput siunnersuut inuit ataasiakkaat ullumikkut sanilliullugu qaffasinnerusumik appasinnerusumilluunniit akiligassarsisinneqarnissaannik kinguneqassanngimmat. Akiligassat ataasiakkaat tigusaat tassaagajussapput sullississutinut innuttaasup nammineq aqutaanut toqqagaanulluunniit akiligassat, assersuutigalugu ineqarnermut akiliut, innaallagiasq, imeq kiassarnerlu, biilit oqimaassusiannut akitsuut il.il. aammalu innuttaasup pisortanut akiligassai, soorlu akileraarutit aamma meeqqanut tapit.

Takussutissiaq:

	Meeqqanik angerlarsimaffimmi najugaqartoqanngitsoq	Meeraq angerlarsimaffimmi najugaqartoq 1	Meeqqat angerlarsimaffimmi najugaqartut 2
Kisimiittoq	4.000	5.600	7.200
Aappariit	6.000	7.600	9.200

Ilinniagaqartut aningaasat atorsinnaasaat qaammammut 2.500 kr.-nut appartinneqassasut siunnersuutigineqarpoq. Meeqqamut angerlarsimaffimmi najugaqartumut ataatsimut aningaasat 1.600 kr.-nik qaffanneqassapput. Ilinniagaqartut aningaasat atorsinnaasaasa annikillisinneqarnissaannik siunnersuuteqarnermi tunngavigineqarpoq ilinniagaqartut ilinniarnersiutiinnarnik pissarsiaqartut ukiuni ilinniarfigisaminni isertitaat appasinnerusarmata, taamaattumik aningaasat atorsinnaasaat qaffasinnerulissappata akiligassat akilinngitsuukkat annertooujussuanngornerannik malitseqariaannaalluni.

Ilinniagaqartut appasinnerusumik isertitaqarnermikkut akiligassaat annikinnerusarput kiisalu ilinniartut ineqarfiini il.il. akikitsumik najugaqarsinnaallutik. Ilinniagaqartoq 18-it sinnerlugit ukiulik assersuutigalugu qaammammut 4.700 kr.-nik ullumikkut ilinniagaqarnerisutisisarpoq. Aningaasat atorsinnaasat kisermaap pissarsiarisartagaatut amerlassusilerneqarpata tamatuma kingunerissavaa ilinniagaqartup pisortanut akiligassaminut taamaallaat 700 kr.-t atorsinnaassammagit. Taakku ilinniartut ineqarfianni ineqarnermut akiliummut naammannaviannngillat, taamaattumillu ilinniagaqartup assigiinngissut nammineq akilinngippagu tamanna akiligassatigut kinguaattooruteqarnermik nassataqassalluni.

Innuttaasup isertitai aningaasartat atorsinnaasanit aalajangersarneqartunit annikinneruppata, isertitaviusut kisimik tunniunneqassapput. Siunnersuut taamaalilluni aningaasanik atorsinnaasanik tunniussivigineqarsinnaatitaanermik malitseqassanngilaq.

Tamatuma saniatigut siunnersuutigineqarpoq katissimasut il.il., aningaasat atorsinnaasat aapparissamut nuunneqarnissaat pillugu qinnuteqarsinnaassasut. Taanna assersuutigalugu tassaasinnaavoq inuk angerlarsimaannartoq isertitaqanngitsoq, taamaattumillu aningaasanik atorsinnaasanik periarfissaqarnermik atuisinnaanngitsoq.

Aningaasat atorsinnaasat akigititassatut siunnersuutigineqartut tunngavigalugit aammalu CPR-imik nalunaarsuiffimmi paasissutissat aallaavigalugit ingerlaannartumik aalajangersarneqartassapput. Taamaalilluni aningaasat atorsinnaasat ataasiakkaatigut

nalilersuineq aallaavigalugu pisassanngilaq. Taamaattoq innuttaasup aningaasat atorsinnaasai qaffanneqassasut kommunalbestyrelsi aalajangersinnaavoq, assersuutigalugu innarluutillit pineqarpata. Aningaasat atorsinnaasat qaffannissaannut suut periarfissiisinaanersut pillugu maleruagassanik erseqqinnersunik Naalakkersuisut aalajangersaasinnaapput, ilanngullugit akigitat pillugit.

Tamatuma saniatigut aningaasanut atorsinnaasanut akigitat inuiaqatigiinni nalinginnaasumik aningaasarsiat ineriartornerannut malinnaatinneqarnissaat qulakkeerniarlugu, akigitat ukiumoortumik Naatsorsueqqissaartarfiup akigititanik iluarsinermut naleqqersuutai malillugit iluarsineqartassapput.

Akiligassiissutinik pingaarnersiunerit

Innuttaasq akiligassat Ilanngaassivimmi ilanngutsinneqarsimasut ilaannik, kisianni tamarmiunngitsunut, akiliinissamut naammattunik akissaqarpat, akiligassat sorliit isertitanit akiliutaasussanit akilerneqassanersut isummerfigissallugu pingaaruteqarpoq.

Siunnersuutigineqarpoq akiligassat pingaarnersiorneqarnissaat inatsimmi aalajangersarneqassasoq, aammalu tulleriinnilersuinermit tassunga, akiligassat suut nalinginnaasumik isigalugit ulluinnarni inuuniarnerup ingerlatinnissaanut pingaarnerpaatut oqaatigineqarsinnaanersut, aallaavigineqartassasoq. Aalajangersimasumik pingaarnersiunermit pingaarnertut malitassat imaapput:

- Ineqarnermut akiliut imaluunniit ilinniartut inaannik attartornermut akiliut.
- Innaallagissamut, imermut kiassarnermullu akiligassaq.
- Ulluunerani paaqqinnittarfimmiinneq.
- Inuussutissarsiuutigalugu piniarnermut allagartaq.
- Eqqaavilerinermit akiligassaq.
- Meeqqanut akilersuutit.
- Ilinniarnermit taarsigassarsianik utertillugit akiliineq.
- Kommunimit tunniunneqartut pillugit akiliinerit.
- Akileraarutinut akitsuutinullu piumasaqaatit allat.

Taamaattoq akileraarutaagallartut, soorlu akileraarutit B-t, akileraarutit inuiaqatigiinnik napatitsinissamut qitiulluinnartut, isiginninneq aallaavigalugu akiligassanik siulliullugit akilerneqassapput.

Akiligassap suussusaata/akiligassiisup pingaarnersiunermit allattuiffimmi allassimanera isumaqanngilaq akiligassaq aalajangersimasq taanna imaluunniit akiligassiisq Ilanngaassivik aqutugalugu akilersitsisinnaasoq. Akiligassiisq akiliisarfikkoortumik akiliisitsisinnaanersq immikkoortoq 2.6-imi nassuiarneqarpoq.

Siunnersuutigineqarpoq akiligassiissutit pingaarnersiorneqartarnerannut maleruagassanik erseqqinnerusunik aalajangersaanissamut Naalakkersuisut piginnaatinneqassasut,

taamaalilluni tamanna pisariaqartinneqarpat pingaarnersiuinissaq annertunerusumik nassuiaqqinneqarsinnaalluni.

Qaammatini 3-ni akiliinissamut killiliisarneq

Siunnersuutigineqarpoq akiligassat qaammatit 3-t angullugit Ilangaassivimmi akiligassatut uninngatinneqartassat. Aningaasat innuttaasup piffissami tassani tigusassai, akiligassat akilernissaannut atorneqarsinnaapput. Akiligassat akilernerqartussatut Ilangaassivimmiittut, tassaanngillat akiitsut akilernerqanngitsut, akilersinniarneqartussanngortut.

Inatsisit atuuttut

Inatsisit atuuttut malillugit akiligassiissutinut amerlanerpaanut akiliinissamut piffissamut killiliussa q amerlanertigut ullut 14-init ullut 30-t tikillugit pisassaaq. Tamatuma kingorna akiligassiisoq nukingisaarummik nassiussisinnaavoq aammalu pisut ilaanni nukingisaarinnermut akiliteqartitsisoqartarpoq. Pisut ilaanni aammattaq akiligassiissummut ernialiisoqarsinnaavoq.

Pisut ilaanni innuttaasoq – ilimasaareernikkut – pisortanit pisassanik pissarsinngitsoorsinnaavoq, assersuutigalugu ulluunerani paaqqinnittarfimmi inissaq, innaallagissamik, imermik kiassarnermillu pilersuineq, aammalu kingusinaarluni akiliinermi inigisamit anisitaasoqarsinnaavoq. Pisuni amerlasuuni akiligassiissut piffissaq eqqorlugu akilernerqanngitsoq, piffissamut killiliussap kingorna qitiusumi akiliisitsiniarnermut oqartussami akilersinniarneqartussanngortinneqarsinnaavoq.

Siunnersuut

Qaammatini 3-ni siunnersuutigineqartuni akiligassiisup sumiginnaanermut piginnaatitaanini atorlugit, isumaqatigiissut atuuttoq imaluunniit inatsisinut tunngasut malillugit akiligassiissummut pineqartumut atuuttut, akiligassiisup atorsinnaasaraluani atuutsissinnaanngilai. Akiligassiisup taamaalilluni inuk attartugaaniit anisissinnaanngilaa, innaallagissamik pilersuineq unitsissinnaanagu il.il. Taamaaqataanik akiligassiisoq piffissami tassani nukingisaarinnermut akiliummik akiliisitsisinnaassanngilaq. Qaammatini 3-ni piffissaliineq innuttaasunut tuavisaarinnermut akiliutit ikinnerulernerannik malitseqassasoq naatsorsuutigineqarpoq, tamannalu innuttaasut sipaaruteqarnerannik kinguneqarsinnaavoq.

Qaammatinik 3-nik maleruagassiinermi siunertaavoq innuttaasup akiligassaminik akiliinissamut piffissaqartinnissaata qulakkeerneqarnissaa. Akiligassat piffissami tassani i Ilangaassivimmi uninngatinneqartassapput aammalu isertitanit innuttaasup Ilangaassivik aqqutigalugu tigusassaannit akilersinniarneqassallutik.

Innuttaasup taamaalilluni sivisunerusumik akiliinissamut piffissalernerqarnini iluaqutigissavaa. Akiligassiisup innuttaasup sivisunerusumik akiliinissamut piffissalernerqarnera akuerisariaqarjaa, kisianni parlattuanik innuttaasup isertitaasa tamarluinnangajammik Ilangaassivik aqqutigalugu tunniunneqartussaaneranni, akiliutissap tigusissaa

ilimanaateqarnerulissalluni. Innuttaasoq qaammatit pingasut qaangiunneranni sulii akiligassat akilernissaannut naammaattunik isertitaqanngippat, taakkua akiliisitsiniartarneq aamma pisortanut akiitsunik akilinngitsuugaqalartarnerup pitsaalioneqarnissaa pillugu eqqartuussisarnermut inatsit aamma Inatsisartut inatsisaat malillugu akiliisitsiniartarfimmut ingerlatinneqassaaq.

Taamaattoq akiliinissamut killissaliusaaq akiligassiissutitut inuussutissarsiorluni ingerlaturanut tunngassuteqartunut ullunut 30-nut aalajangiunneqarsinnaavoq. Innuttaasoq assersuutigalugu sanasutut suliffeqarfimmik kisimiilluni suliffeqarfiusumik ingerlatsippat, innaallagissamut akiligassap, pilersuineranut ingerlatseqatigiiffiup sumiginnaanermut piginnaatitaanerminik atuisinnaalernissaanut, qaammatit pingasut Ilanngaassivimmiissinnaanissaa, naleqqutinngilaq. Tamanna tamatuma saniatigut inuussutissarsiornermi akiitsut akilinngitsuukkat annertunerulernerannik malitseqarsinnaassaaq.

2.4. Atuisut isersinnaanerat aamma paasisutissiineq

Internetikkut Ilanngaassivik nittartagaq, maannakkut siusinnerusukkullu aningaasarsiat tunniunneqartut aammalu akiligassat utaqqisut aamma akileriikkat pillugit paasisutissartaqartoq, pilersinneqassaaq.

Akiliuummik kortimik aammalu girokortimik pisortanit akiligassiisunit assigiinngitsunit tigusaqarnissamut taarsiullugu, paasisutissat internetikkut nittartakkami aammalu qaammatikkaartumik naatsorsukkani ataatsimoortinneqartassapput.

2.5. Akiliisussaaitaasut

Siunnersuutip malitsigisaanik sulisitsisut il.il. aningaasarsianik allanillu isertitanik innuttaasunut Ilanngaassivimmut akiliisarnissamut pisussaaffeqarput. Pisortat kiisalu pisortani suliffeqarfiit arlallit, aammattaaq Ilanngaassivik aqqutigalugu innuttaasunut aningaasanik attuumassuteqartunik tunniussinissamut pisussaaffeqassapput, tassanngaaniillu aningaasat ataasiakkaanut tunniunneqartassallutik.

Akiliineq kontumut nuussineq atorlugu pissaaq aammalu kina aningaasarsianik tunniussivigineqarniarnerisut il.il. paasisutissanik elektroniskiusunik imaqaassalluni.

Siunnersuummi akileraarutitik A-nik ilanngaassisarnermut akiliuteqartarnermullu maleruagassani, aningaasarsianit akileraarutit pillugit Inatsisartut inatsisaanni aamma akileraaruserinermik ingerlatsineq pillugu Inatsisartut inatsisaanni maleruagassiivigineqartuni, allanngortitsisoqanngilaq.

2.6. Akiligassiisut

Siunnersuummi kalaallit oqartussaasui aamma ingerlatseqatigiiffiit aalajangersimasut siunnersuummi allatorneqartut, Ilanngaassivik aqqutigalugu akiligassanik akilisitsisinnaassapput.

Siunnersuutigineqarpoq, akiligassat sorliit akilersinneqartassanersut aammalu pisortani oqartussat sorliit Ilanngaassivik aqqutigalugu akiligassanik akiliisitsisinnaanersut, pillugu maleruagassanik aalajangersaanissamut Naalakkersuisut piginnaatinneqassasut.

Aammattaaq siunnersuutigineqarpoq, pisortani inissiatileqatigiiffiit, assersuutigalugu INI A/S, Ilanngaassivik aqqutigalugu akiliisitsisinnaassasut pillugu maleruagassanik aalajangersaanissamut Naalakkersuisut pisinnaatinneqassasut. Ingerlatseqatigiiffiit akiliisitsisinnaasut, ingerlatseqatigiiffiit allat inuinnarnut inatsisitigut aqqissuussaasut, ilaaterlugu pineqartunut ilaasut annertusitinneqarnissaannut, inatsisinik allangortitsinissaq pisariaqartussaavoq, aamma taakkua Namminersorlutik Oqartussanit pigineqaraluarpataluunniit imaluunniit kommuninit pigineqaraluarpataluunniit. Assersuutigalugu Tele Greenland A/S Ilanngaassivik aqqutigalugu akiligassanik akiliisitsisinnaassappat, inatsisinik allangortitsinissaq pisariaqartussaavoq.

Akileeqquisissumut piumasaqaatit

Inatsisit atuuttut

Akiligassiisut tassaasinnaapput pisortat innuttaasumut aningaasanik assigiinngitsunik arlalinnik piumasaqaateqartut. Assersuutigalugu tassaasinnaavoq inatsit malillugu imaluunniit naapertorlugu piumasaqaat, assersuutigalugu akileraarutit, akitsuutit, akiliutit. Aamma tassaasinnaavoq innuttaasup pisortanit ikiorsiissutinik tiguisarnerata malitsigisaanik piumasaqaatit, assersuutigalugu ineqarnermut akiliut, ulluunerani paaqqinnittarfimmiititsineq, innaallagiaqarneq, imeqarneq kiassarnerlu. Pisuni taakkunani piumasaqaatit inatsisini, imaluunniit atuisumut isumaqatigiissummi, soorlu tunisinermut pilersuinernullu piumasaqaatit il.il., maleruagassiivigineqartuugajupput. Tamatuma saniatigut tassaasinnaapput piumasaqaatit, assersuutigalugu eqqartuussivimmi aalajangersagaasut, soorlu isumaqatigiissuteqarnerup avataani taarsiissutisiat. Akiligassiissutinut assigiinngitsunut taakkununga tamanut tunngatillugu maleruagassat assigiinngitsut atuuttarput, assersuutigalugu akiligassiisut tunniunneqartussanngorlugu kimut akilerneqarsinnaanersoq, akiliinissamut piffissamut killiliussat aamma sumiginnaanermi piginnaatitaaffiit, akiligassiisup atorsinnaasai.

Siunnersuut

Akiligassaq Ilanngaassivimmut ilanngunneqassappata, akiligassamut Inatsisartut inatsisaat manna aammalu maleruagassat il.il. taanna naapertorlugu aalajangersagaasut malillugit akiliinissamut piffissamut killiliussat pillugit piumasaqaatit naammassineqarsimassapput.

Innuttaasup akiligassaa akileeqquisissutitut elektroniskimik Ilanngaassivimmut nassiunneqassaaq, taanna aningaasartat akilerneqassasut, kiisalu aningaasartat sumut tunngassuteqarnerisut il.il. nassuiaat pillugit Ilanngaassivimmi periaatsimut ilitersuissutaalluni.

Siunnersuutip atuutilernerani, siunissami pisortanut akiligassat tamarmik akiligassanngornissaat kingusinnerpaamik ullunik 10-nik sioqqullugu nassiunneqassapput. Akiligassat akiliinissamut piffissamut killiliussanut piumasaqaatinik naammassinninngitsut Ilanngaassivik aqputigalugu akiligassatut ilanngunneqarsinnaanngillat. Tamatumani siunertaavoq innuttaasut akiligassamut qisuariarnissaannut naleqquttumik piffissaqartinneqarnissaasa qulakkeerneqarnissaa.

Tamatuma saniatigut, ilaatigut akiligassaq sumut tunngassuteqarnerisut innuttaasumit takuneqarsinnaanissaa eqqarsaatigalugu, kiisalu paasissutissanik suliarinninnissaq Ilanngaassivimmi periaatsimi pisussaq eqqarsaatigalugu, akiligassat qanoq nassiunneqartassanersut aammalu akiligassat pisortanit akiligassiissutigineqartut assigiissaarnissaat siunertaralugu, siunnersuut naapertorlugu akiligassap imarisaannut il.il. piumasaqaatinik arlalinnik aalajangersaasoqarsinnaassaaq. Akiligassiissummi ilaatigut allassimassapput aningaasartai, akiligassaqarfiup aamma akiligassaqartup aqqa kiisalu akiliinissaq pillugu paasissutissat, taamaalilluni innuttaasup paatsuugassaannngitsumik akiliinissaq suussusersinnaassallugu.

Tamatuma saniatigut Ilanngaassiviup akiligassiisunit atorineqarneranut aalajangersakkani piumasaqaatit Ilanngaassivik aqputigalugu akiligassiisut akiliisitsisinnaanissaminnut naammassisimasassaat allat Akileraartarnermut ingerlatsiviup aalajangersarsinnaavai. Tamanna assersuutigalugu tassaasinnaavoq akiligassiisup aqqissuussaananeranut, ingerlatsinermini periaasiinut, suleriaasiinut periaasaannullu piumasaqaatit, akileeqqusissutit il.il. kukkuneqarsinnaanerisa aarlerinaateqarneranik annikillisisitsissat.

2.7. Akiitsunik akiliisitsiniarnermut tunngasut

Siunnersuummi akiliisitsiniarnermut suliassaqarfimmi maleruagassat allanngortinneqanngillat. Akiitsunik akiliisitsiniarnermut suli Kalaallit Nunaanni Eqqartuussisarnermik Inatsimmut, pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni aamma akileraaruserinermik ingerlatsineq pillugu Inatsisartut inatsisaanni maleruagassaqartinneqassaaq.

Siunnersuutip malitsigisaanik akiitsunik akiliisitsiniarnissamut akiliisitsiniarnermut oqartussap piginnaatitaaffiik annertusititsisoqanngilaq annikillisisitsisoqaraniluunniit.

Akiliisitsiniarnermut oqartussaq ullumikkutut innuttaasup pigisaanni nalilinni akiligassai taarsertinneqarsinnaassapput. Kisianni Eqqartuussisarnermik inatsimmi § 619 naapertorlugu aningaasartani arlalinni inuup pisinnaatitaasup saniatigut allanut tunniunneqassasut piumasaqaatigineqarsinnaanngitsuni akiliisitsiniarnermut oqartussaq (aamma eqqartuussummik naammassinnitsitsinissamut oqartussat allat) akiligassanik taarsertitsiniaasinnaassanngilaq. Tassani assersuutigalugu ilaapput soraarnerussutisiani piumasaqaatit aammalu aningaasarsiani imaluunniit akissarsiasiani suli tunniunneqanngitsuni

piumasaqaatit. Tamanna taakkua Ilanngaassivik aqputigalugu pissanersut apeqqutaanani atuutissaq.

Akiliisitsiniarnermut oqartussaq Eqqartuussisarnermik inatsimmi § 625 aamma pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni maleruagassat malillugit suli akissarsianik il.il. tunniussinngikkallarsinnaassaaq (akissarsianik tunniussinngikkallarnissamik).

Akissarsianik tunniussinngikkallarnissamut aamma akiligassat taarsertinnissaannut ilaatigut innuttaasoq aammalu pineqartup inoqutai annikitsumik inuuniutissaqarnissaannut naammattumik aningaasaateqartinneqarnersut (pisariaqartitsineq aallaavigalugu) ataasiakkaatigut nalilersuinissaq pisariaqarpoq. Nalilersuinermi ilaatigut innuttaasup aammalu pineqartup inoqutaasa pisortanut aamma namminersortunut akiligassaqaqfinnut akiligassanik ingerlaavartumik akiliisinnanissaa sillimaffigineqassaaq. Taamaattumik innuttaasoq siunnersuut manna malillugu aningaasanit atorsinnaasanit annikinnerusunik annertunerusunilluunniit aningaasartalinnik pissaqartinneqartariaqartoq, pisariaqartitsineq aallaavigalugu nalilersuineq kinguneqarsinnaavoq. Assigiinngissutaasunut maleruagassat assigiinngitsunik siunertaqarnerat pissutaatinneqarsinnaavoq. Pinngitsaaliissummik akiliisitsiniarnerq pillugu maleruagassanni suliassani ataasiakkaani tamaginni ataasiakkaatigut suliassanik suliarinnitarneq aallaavigineqartartoq, siunnersuummi matumani innuttaasut ataasiakkaat ataasiakkaatigut atugaannik suliassamik aalajangersimasumik suliarinnigani, ingerlaavartumik sapinngisamik akiliisitsisarnissaq pillugu maleruagassanik atuutsitsiniartoqarpoq.

Ullumikkut pisartutut innuttaasut aamma akiliisitsiniarnermut oqartussat akiitsut akilersorneqarnissaat pillugu akiliisarnissamut isumaqatigiissuteqarsinnaassapput.

Akissarsianik tunniussinngikkallarnissaq aamma akiliisarnissamut isumaqatigiissutit Ilanngaassivik aqputigalugu akilersinniarneqarsinnaassapput. Nassuiarneqartut akissarsianik tunniussinngikkallarnissamut ilaatigut tamatumunnga inatsimmi tunngavissaqarnissaq, kiisalu akiliisitsiniarnermut oqartussami ataasiakkaatigut suliassanik suliarinninnissaq aalajangiinissarlu, pisariaqartussaapput. Akiliisarnissamut isumaqatigiissuteqarnermi, akiligassaqaqartup aamma akiliisitsiniarnermut oqartussap akiitsunik akilersuinissaq pillugu isumaqatigiissuteqarsimanissaq, pisariaqarpoq.

Akissarsianik tunniussinngikkallartarnerit aamma akiliisarnissamut isumaqatigiissutit Ilanngaassivik aqputigalugu akilersinneqartalerpata, sulisitsisunut allaffissornikkut oqilisaataassaaq, tassami taakkua taakkuninnga allaffissornikkut aqutsiunnaassammata. Innuttaasunut tamatuma saniatigut, sulisitsisut pisortanut akiitsoqartut ilisimasaqarunnaarpata, inuttut inuunerup pitsaanerusunik illersorneqarneranik kinguneqassaaq.

2.8. Akiligassanut akerliliissuteqartarnej aamma naammagittaalliorsinnaaneq il.il.

Siunnersuut imminnermini akiligassiisunut tunngatillugu sunniuteqanngilaq. Innuttaasoq akiligassanut imaluunniit akiligassap aningaasartaannut isumaqataanngikkuni, innuttaasoq oqartussanut imaluunniit pisortat suliffeqarfiannut akiligassiisimasumut naammagittaalliusaaq.

Aningaaserivimmi akiliisarnernut sullissiviit paarlattuanik innuttaasup kisimi akileeqqusissutit Ilangaassivimmiittut akilerumannngissinnaanngilai. Taamatut periarfissaqarneq atornerluinissamut nutaanik periarfissaqalernernik aammalu akiitsunik annertusiartortitsilernermik kinguneqartussaavoq.

Taamaattoqarneranni pisortani oqartussaasut, suliffeqarfiit aamma ingerlatseqatigiiffiit Ilangaassivimmi periaatsimut akileeqqusissutinik nassiussisinnaasut, annertuumik akisussaaffeqarput.

Akileeqqusissut kukkuneqartoq Ilangaassivimmut nassiunneqarsimappat, akiligassiisoq kukkunerup paasinissaanut iluarsinissaanullu qaninnerpaassaaq. Akileeqqusissut kukkuneqartoq assersuutigalugu naqitsinerlunnermik imaluunniit akiligassap akiliisussamut il.il. kukkusumut ingerlatinneqarsimaneranik, peqquteqarsinnaavoq. Taamaattumik siunnersuutigineqarpoq akiligassiisup akerliliissuteqareernerup kingorna akiligassaq kukkuneqarnerisooq nalilersortassagaat. Akiligassaq kukkuneqarpat, imaluunniit akiligassaq eqqortuunersooq akiligassiisoq nalornissuteqarpat, akiligassiisup akileeqqusissut Ilangaassivimmit peeqqussavaa. Akiliineq ingerlanneqareersimappat, aningaasat innuttaasumut utertinneqassapput.

Taamaaqataanik innuttaasut akiligassiisummut pineqartumut inatsisit il.il. malillugit naammagittaalliorsinnaaneq periarfissariinnassavaat. Assersuutigalugu tassaasinnaavoq ineqarneq pillugu naammagittaalliuuteqartarfimmut imaluunniit Naalakkersuisoqarfimmut naammagittaalliortoqarsinnaasoq.

Akilerartarnermut ingerlatsiviup innuttaasumit aamma suliffeqarfinit Ilangaassivimmi periaatsip atuuffiit aamma ingerlanneqarneranut saaffiginnissutit aamma naammagittaalliuutit suliarisinnaavai. Aallaaviatigut siunnersuummi akilerartarnermut ingerlatsivik akileeqqusissutinik tigusiumannnginnissamut imaluunniit taamaatitsinissamut piginnaatitaaffilerneqanngilaq. Aallaaviusumut tassunga ilaatinneqanngitsut tassaapput, akileeqqusinerit ersarissumik eqqunngitsut pillugit siunnersuummi aalajangersakkat, kiisalu akileeqqusissutit akilerartarnermut ingerlatsivimmit namminermeersut. Innuttaasoq akileeqqusissut pillugu akilerartarnermut ingerlatsivimmut saaffiginnippat, akilerartarnermut ingerlatsiviup innuttaasoq oqartussanut imaluunniit suliffeqarfimmut taassuminnga nassiussisimasumut attaveqarnissaanik innersuuttussaassavaa.

2.9 Oqartussamut tunngasut

Siunnersuutigineqarpoq Ilangaassivimmu qitiusumi oqartussa qassaasoo akileraartarnermut ingerlatsivik. Akileraartarnermut ingerlatsivik periaatsimik pilersitsinissamut akisussaasaaq, tulliullugulu ingerlatsinikkut akisussaasuussalluni.

Aningaasaqarnermut Naalakkersuisoqarfik Naalakkersuisut sinnerlugit, akileraartarnermut ingerlatsiviup Ilangaassivimmik ingerlatsineranut nakkutilliinermut oqartussaasuvoq.

Naalakkersuisut nalunaarutinngorlugu pissutsit arlallit pillugit maleruagassanik aalajangersaanissamut inatsimmi piginnaatinneqarput, ilanngullugit akiligasiissutinik pingaarnersuisarneq, ingerlaannaq tunniussisarneq il.il.

Siunnersuutigineqarpoq kommunit Ilangaassiviup atornerqarnera pillugu innuttaasunut sullissinissamut pisussaaffeqassasut. Tamatumunnga pissutaavoq kommunit illoqarfinni nunaqarfinnilu najuunnerat. Kommunit assersuutigalugu innuttaasut Ilangaassivik-nittartakkamut isernissamut ikiorsinnaavaat, innuttaasut Ilangaassiviup atornissaanut ikiorsinnaavaat, kiisalu naammagittaalliornissamut periarfissat pillugit siunnersuisinnaallutik.

Naatsorsuutigineqarpoq Ilangaassivimmu IT-mik aaqiissutissamik ineriartortitsinissamut suliassaq neqeroortitsivigineqassasoo. Aammattaaq Ilangaassivimmu ingerlatsinikkut suliassap suliffeqarfinnut namminersortunut ataatsimut arlalinnuunniit neqeroortitsivigineqarnissaa pisariaqarsinnaavoq.

Siunnersuummi akileraartarnermut ingerlatsivik akileeqqusissutit imarisaannut teknikkikkut piunasaqaatinik nassuiaassutinillu erseqqinnerusunik aalajangersaanissamut piginnaatinneqarpoq, ilanngullugit akileeqqusissut (akiligassaq) paasissutissanik sunik imaqaassanersoq, ilusaanut teknikkikkut piunasaqaatit, nassiussinissamut piffissatigut piunasaqaatit, akiliinissamut killissaliussaq il.il. Akileeqqusissutit tamarmik elektroniskimik Ilangaassivimmu nassiunneqartassapput.

Tamatuma saniatigut sulisitsisut ilangaasiinnginnermi aningaasarsiassanik akiliisarneri qanoq pisassanersut, kiisalu paasissutissat suut ilanngullugit nassiunneqartassanersut pillugit piunasaqaatinik akileraartarnermut ingerlatsivik aalajangersaasaaq.

Akileeqqusissutit piunasaqaatinik aalajangersagaasunik naammassinninngitsut Ilangaassivimmi periaatsimi tigujumaneqassanngillat. Suliffeqarfik imaluunniit pisortani oqartussaasoo Ilangaassivimmu akileeqqusissummik nassiusseqqusaajunnaasasoo aalajangiinissamut Akileraartarnermut Ingerlatsivik piginnaatinneqarpoq. Pisortani oqartussaasoo imaluunniit suliffeqarfik pisumi sakkortuumi imaluunniit pisuni sakkortuuni pisussaaffimminik siunnersuut naapertorlugu akiligassiisumut pisussaaffiliunneqarsimasunik sumiginnaanerani aalajangersagaq atornerqartussatut eqqarsaataavoq.

2.10. Ilanngaassiviup atuutsinneqalernissaa

Siunnersuutip suliarineqarneranut ingiaqatigitillugu IT atorlugu periaatsip, Ilanngaassiviusussap, aammalu piumasqaatinut nassuiaatinik aalajangersaanissamut tamatumalu kingorna IT atorlugu suliaassap neqeroortitsivigineqarnissaanut aallaaviusinnaasussap, ilusilersorneqarnera atuuffissaalu suliarineqassapput.

Naatsorsuutigineqarpoq siunnersuut akuerineqassappat, IT atorlugu aaqqiissutissaq tamatuma kinguninngua neqeroortitsivigalugu nassiunneqarsinnaasasoq.

Ilanngaassivimmi periaatsip atuutilersinneqarnissaanut periaasissatigut pisariaqartussaq tassaavoq, tamanna pitinnagu Pisortani Digitalimik Allakkerinermik pisussaaffiusumik aammalu pisortanut atorneqartussamik aningaaserivimmi kontumik atuutsitsisoqalissasoq.

Pisortani Digitalimik Allakkerineq pisussaaffiusoq pisariaqarpoq, tassami tamatumani oqartussat aamma innuttaasut digitalimik allakkerineq aqqutigalugu assigiissaartumik isumannaatsumillu attaveqatigiissinnaanissaat ajornarunnaarsinneqassammat. Tamatuma saniatigut immikkut ittumik akuersissuteqarnissamik periarfissaqarnerit il.il. atorlugit digitalimik allakkerinermik atuisinnaangitsut allakkanik pappialangorlugit nassiussivigineqartarnissaat qulakkeerneqassaaq.

Aningaaserivimmi kontumik pisortanut atorneqartussamik atuutilersitsinissaq Ilanngaassivimmut pisariaqarpoq, tassami siunnersuutip malitsigisaanik innuttaasut ataasiakkaat tamarmik aningaaserivimmi kontumik 1-imik, pisortat tunniunneqarsinnaalerlugit tunniussassanik innersuussivigisinnaasaannik, nalunaarsorsimasoqalissammat.

Ilanngaassivimmi periaatsip atortorissaaruteqarani suliaassanik suliarinnittarnissaq pinngitsoorniarlugu, periaatsip annertuumik qarasaasiakku inglerlaannartumik suliarinnittarnermik imaqarnissaa, pingaaruteqarpoq. Periaaseq pisortat IT atorlugu periaasiinut arlalinnut allanut pioreersunut pilersussanullu attavilerneqassaaq. Akileraaruseriffimmut (E-skat), CPR-inut nalunaarsuiffimmut aammalu pisortat ERP-mi periaasiannut (pisortat aningaasaqarnermik aqutsissutaat) attaviliisoqassaaq.

Tamatuma saniatigut kommunit IT atorlugu periaasiinut aamma akiligassaqartunut periaatsinut, oqartussani aamma suliffeqarfinni Ilanngaassivik aqqutigalugu akiligassanik akiliisitsiniarsinnaasuni atorneqartunut, attavilerneqassaaq. Aningaaserivimmut suliffeqarfiit, pisortat innuttaasullu akornanni akiliutinik nuussinernik suliaqartartunut, attaviliisoqassaaq.

Ilanngaassiviup ingerlanneqalernera

Siunnersuutigineqarpoq, inatsit qaqugu atuutilissanersoq Naalakkersuisut aalajangiinissamut piginnaatinneqassasut. Tamatumani IT-mi periaatsit atorneqarsinnaalerpat aatsaat Inatsisartut inatsisaata atuutilernissaata qulakkeerneqarnissaa, siunertarineqarpoq. Nunani tamalaani

misilittakkat aallaavigalugit IT-mut suliniut kinguaattoorsinnaavoq. Periaaseq tamakkiisumik atorpeqarsinnaalerpat aatsaat Inatsisartut inatsisaata atuutilernissaa pingaaruteqarpoq. Ilanngaassivimmi periaatsip 2021-p aallartinneraniit ingerlanneqalersinnaanera sulissutigineqarpoq.

Sunniutaasunut inatsisit

Siunnersuut akuerineqassappat, inatsisini allani il.il.sunniutaasunik allangortitsinissaq pisariaqartussaavoq.

- Siunnersuutip malitsigisaanik siunissami akileraarutininik B-nik akiliisitsisarnermi periaaseq allangortinneqassaaq. Tamanna aningaasarsianit akileraarutit pillugit Inatsisartup inatsisaani aamma akileraarusiisarnernik ingerlatsineq pillugu Inatsisartut inatsisaani sunniutaasunik allangortitsinissamik pisariaqartitsinermik malitseqarsinnaavoq.
- Akiitsunik qitiusumi akiliisitsiniartarnerup qanoq pisarneranut, siunnersuut sunniuteqassaaq, tassami ilaatigut sulisitsisut akissarsianik tunniussingikkallarnissamik pisussaaffilerneqarnissaat pisariaarutissaaq. Taamaattumik pisortanut akiitsut akilersinniartarnerat pinaveersaartinneqarnissaallu pillugit Inatsisartut inatsisaanni allangortitsinissaq pisariaqartinneqalissaaq.
- Pisortat akiligassiisut il.il. periaaseq aqutigalugu akiligassanik akiliisitsisinnaasut, aamma suliaassarfinnut oqartussaasut susasaqartut suleqatigalugit inatsisini il.il. allanguutissanik piareersaasussaassapput, tassami siunnersuummi ilaatigut inatsisini atuuttuni allassimasunit allaanerusinnaasunik, akiliinissamut piffissamut killiliussat pillugit maleruagassanik, tuniniaanermut aamma pilersuineranut piumasagaatinik il.il. aalajangersaasoqartussaavoq. Akiligassanut Ilanngaassivik aqutigalugu akilersinneqarsinnaasussanut akiliisarnermut atugassarititaasut, siunnersuut aamma aalajangersakkat siunnersuut malillugu aalajangersarneqartut malillugit piumasagaatinut naapertuuttunngortinneqarnissaat, pingaaruteqarpoq.

Siunnersuutit pisariaqartut, sunniutaasunut inatsisissatut siunnersuutitut iluseqartut, 2020-p ingerlanerani aamma kingusinnerusumi saqqummiunneqassasut naatsorsuutigineqarpoq. Suliaqarneq taanna, suliaassarfinnut oqartussaasunit susasaqartunit aamma akiligassiisunit Aningaasaqarnermut Naalakkersuisoqarfik suleqatigalugu, isumagineqassaaq.

3. Pisortanut aningaasaqarnikkut allaffissornikkullu sunniutaasussat

Siunnersuutip aningaasaqarnikkut iluanaaruteqarfiginissaa akiligassanik sunniuteqarluarnerusumik akiliisitsisalernermissasoq, akilinngitsuukkanut akiitsunut suliat ikinnerulerneranniissasoq siunissamilu akiitsut akilinngitsuukkat annikinnerulerneranniissasoq, naatsorsuutigineqarpoq. Akiliinissamut akissaqartunik, kisianni akilerusuttanngitsunik, sunniuteqarluarnerusumik akiliisitsisalernermi, akiliisitsiniartarnermut oqartussat piffissamik atuisarunnaassapput, tamannalu innuttaasuni akiliinissamik ajornakusooruteqartuni sunniuteqarluarnerusumik akiliisitsiniarnermik

suliniuteqarnissaq periarfissinneqassaaq. Pissutsit marluusut tamarmik akiitsunik annikillisitseqataassasut aammalu akiligassiinernik akilersinneqarsinnaanngitsut taamaatiinnarneqartariaqartunik ikilisitseqataassasut, naatsorsuutigineqarpoq. Naliliisoqarpoq siunnersuut ataatsimut isigalugu ukiumut 30 mio. koruunit missaanni pisortat aningaasaqarnerannik pitsanngorsaaqataassasoq.

Tamatuma saniatigut siunnersuut, nassiussinernut aamma akiligassaqartunik passussinermut aningaasartuutikinnerulernermik kommuninut aamma pisortat suliffeqarfiutaannut malitseqassasoq, naatsorsuutigineqarpoq, tassami siunnersuutip malitsigisaanik akiligassanik nassiussineq akileeqqusissutitut elektroniskinnngorlugu pisalertussaammat aammalu akiliisitsinerit aammalu akiliinissamik eqqaasitsinernik nassiussinerit il.il. ikinnerusut nammineq suliarineqartariaqartalissasut naatsorsuutigineqartariaqarluni. Tassunga atatillugu Nets-imut, pisuni amerlasuuni innuttaasunut akiliinissamut allagartamik suliaqartartumut nassiussisartumullu, aningaasartuutunik annertuunik sipaartoqassasoq naatsorsuutigineqarpoq.

Sipaarutaasussat annertuut akiligassiisunissasut naatsorsuutigineqarpoq, ilanngullugit kommunit, periaaseq aqutigalugu akiligassanik akiligassiisinnaasut. Sipaartutissat piffissamut tunngatillugu periaatsip ingerlanneqalerneranut peqatigitillugu piviusunngortinneqassasut naatsorsuutigineqanngilaq, tassami allaffissornikkut suleriaatsit aamma periaatsit tamakkiisumik atuutilinnginneranni ikaarsaarnermut piffissaqartussaammat.

Pisortat aningaasartuutaat tassaanerussapput Ilanngaassivimmuut periaatsimik ineriartortitsinissaq pilersitsinissarlu aammalu inatsisissatut siunnersuutunik aamma isumaqatigiissutinut atugassarititaasuni allannguutunik il.il. sunniutaasumik allannguutissanik suliaqarnerit.

Tulliullugu aningaasartuutissat tassaassapput ingerlaavartumik ingerlatsinermut aningaasartuutit aamma sulisunut aningaasartuutit.

Pilersitsinerup nalaani aningaasartuutissat 30 mio. koruunit missaat tikillugit annertussuseqassasut naatsorsuutigineqarpoq. Aningaasartuutissat tassaassapput IT-mik aamma periaatsinik ineriartortitsineq. Tassunga ilanngutissapput nalunaarutunik, ingerlatsinermi piumasaqaatinik, teknikkikkut maleruagassanik, neqeroortitsinermut najoqqutassanik aamma Ilanngaassivimmuut periaatsimut piumasaqaatinut nassuiaanernik, suliaqarnerit. Akileraartarnermut Aqutsiviup nutaamik missingiinera tunngavigalugu tusarniaareernerup kingorna aningaasartuutissatut missingerneqartut qaffanneqarput. Missingikkat nalorninartoqarput.

Ukiumoortumik aningaasartuutissat, Ilanngaassivimmuut periaaseq ingerlatsinermut ikaarsaarpat, ukiumut 7,5 - 9,5 mio. koruuninik annertussuseqalerlutik annikillissasut naatsorsuutigineqarpoq.

Siunnersuutip tamatuma saniatigut akileraartarnermut ingerlatsivik innuttaasup aningaasaqarneranut tunngasut pillugit maannakkut paasissutissanik pitsaanerusumik pissarsitissinnaassavaa.

4. Inuussutissarsiortunut aningaasaqarnikkut allaffissornikkullu sunniutaasussat

Inuussutissarsiortunut inatsisissatut siunnersuutip malitsigisaanik, aningaasarsianik allaffissornikkut suliarinninnermut aamma aningaasarsianik aamma tunisanit isertitanik tunniussinnermut atatillugu akileraarutitik A-nik akiliinernut tunngatillugu suleriaatsit ilisimaneqartut amerlanerit attatiinnarneqassapput. Taamaattoq suliffeqarfiit aningaasarsianit akiliisitsinerup isumaginera iperassanngilaat, tamannalu inuussutissarsiortunut annikinnerusumik allaffissornermik malitseqassaaq.

Siunnersuutip malitsigisaanik innuttaasut isertitaat Ilanngaassivik aqputigalugu tunniunneqartassapput aammalu pisortat akiligassiissutaat innuttaasup aningaasarsiaanik akilersinneqartassallutik, taamaaliornikkullu inuit nammineq akiligassaqaarfiinut sanilliullugu salliusussaataalissallutik. Innuttaasut akiligassaqaarfinnut allanut, assersuutigalugu namminersortut akiligassiissutaannut akiitsunullu akiliinissamut periarfissaasa, ajornerulernerannik, taamaalilluni siunnersuut toqqaannanngitsumik malitseqarsinnaavoq. Sunniutaasussaq taanna annikitsuinnaassasoq naatsorsuutigineqarpoq, tassami siunnersuummi innuttaasut aningaasanik pisassarisanik atugassaqaartinneqarneranni aalajangersimasumik minnerpaaffilimmik tunniussiffigineqartarnissaasa qulakkeernissaa, pingaartinneqarpoq. Siunissami naatsorsuutigineqarpoq siunnersuutip sunniutissai aamma innuttaasut akiligassaqaarfiinut namminersortunut tunngatillugu iluaqutaassasut, tassami pisortanut akiitsut annikinnerulersinnissaannut siunnersuut iluaqutaassinnaammat, aammalu naatsorsuutigineqarpoq pisortanut akiitsut annikinnerusut naggataatigut aamma innuttaasut ataatsimut katillugu akiliisinnaassuseqarnerannut iluaqutaassasoq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut inuit peqqissusaannulluunniit sunniuteqassasoq naliliisoqanngilaq.

6. Innuttaasunut sunniutaasussat

Siunissami innuttaasut isertitaat, innuttaasumut tunniussinissaq sioqqullugu Ilanngaassivimmut tunniunneqartassapput.

Innuttaasunut akiligassanik akiliisitsisarnermut ilanngutsinngitsunut imaluunniit pissusaaffigalugu pineqartunut ilaanngitsunut, siunnersuut pissusiviusuni annertuunik sunniuteqassanngilaq.

Siunnersuut aningaasartuutikinnerulerneramik aammalu pisortat sullissinerisa pitsaanerulernerannik pisooqataasinnaavoq, tassami akiliisitsisarnerit sunniuteqarlualissasut,

taamaalillunilu aningaasat siunertanut allanut atorneqarsinnaalissasut, siunnersuummi naatsorsuutigineqarmat.

Taarsigassarsinermi, taarsigassarsititsinissap akuerineqarnissaa sioqqullugu taarsigassarsisussap aningaasaqarnera taarsigassarsititsisussap nalilersortussaavaa. Innuttaasq akilinngitsuukkanik akiitsoqalersoq, akiligassanik akiliisitsisussaanermi pineqartunut ilaatinneqalersinnaavoq, taamaalillunilu taarsigassarsiaminik akilersuinissamut periarfissai ajornerulersinneqartussaallutik. Isertitat innuttaasumut tunniunneqannginneranni akiligassat pisortanit akilersinneqartalertussaanerisa, tamanna malitsigaa.

Taarsigassarsititsisut annaasaqarsinnaaneq taanna naatsorsuinerminni ilanngussinnaavaat, tamatumalu kingunerisaanik taarsigassarsiat qaffasinnerusumik ernialerneqarsinnaapput imaluunniit pisuni aalajangersimasuni taarsigassarsinissaq akuerineqanngitsoorsinnaalluni. Kisiannili innuttaasut aningaaserivimmit taarsigassarsinissamut imaluunniit akiitsorluni pisinissamut periarfissaannut siunnersuut sunniteqassanersoq pitsaassusilimmik missiliorneqarsinnaangilaq. Ataasiakkaat namminneq aningaasaqarnikkut atugassarisaannik nalilersuinissaq, taamatut siunnersuummit sunnerneqassanngilaq, tassami innuttaasup aningaasartuutai aamma isertitai allannguuteqanngimmata. Tunngavissat allat, soorlu ataasiakkaat suliffeqarnerat, akiitsui pioreersut aamma inuiaqatigiinni aningaasaqarneq, taarsigassarsititsisussap akiitsortitsinissamut nalilersuineranut, siunnersuummit matumanga pingaarnerusutut nalilerneqarput.

Innuttaasut, akiliisarnermi pineqartunut ilaatinneqalersunut, taamaalillutik akileraarutit aamma pisortat akiligassiissutaat isertitanit naleqquttumik annertussusilimmik ilanngaatigineqareerpata, isertititik tigusinnaalissavaat. Tamatuma imminermini kingunerisaanik innuttaasumut aningaasaqarnikkut sunniteqassanngilaq, tassami innuttaasup maannamut pisartutut aningaasaqarnikkut pisussaaffii, ineqarnermut akiligassamut akiligassiissutitut il.il. iluseqartut taamaaginnassapput.

Akiligassanik akiliisitsisarnerup ukiumut 30 mio. koruunit missaanni pitsaanerulersinneqarneranik siunnersuut malitseqassasoq naatsorsuutigineqarpoq. Pitsaanerulersitsinerup ilaa akiitsut akilinngitsuukkat pisoqalisoorneersuussasut nalikillileriffigineqarnerineersuussasullu naatsorsuutigineqarpoq. Tamatumunnga innuttaasut akiliinissamut akissaqartut, kisianni akiliinngitsoortartut akiliisinneqarnerusalernerannik pissuteqarpoq. Innuttaasut akiligassaminnik akiliinissamut akissaqanngitsut, siunnersuutip matuma atuunnerani suli akissaqartussaangillat, aammalu siunnersuut innuttaasunut pitsanngorsaannermik imaluunniit ajornerulersitsinermik malitseqassanngilaq.

Siunnersuut innuttaasut suliffeqalernissamut imaluunniit isertitaqarnerulernissamut kajumissuseqalersitsinermik sunniteqassanersoq, nalorninartoqarpoq. Illuatungaani innuttaasut siunnersuummi aningaasanit atorsinnaasanit annertunerusumik isertitaqarnissamik kissaateqannginnerannik, aningaasat atorsinnaasat malitseqarsinnaapput, tassami tamanna sinnerlugu isertitaqarnermi taakkua akiligassanik akiliinermut atorneqartussaammata. Taamaattoq akiligassiissutit sumiginnarneqarnerannik aammalu innuttaasup inigisaminit

anisinneqarsinnaanerani il.il., taamatut pissusilersorneq siunissami kinguneqaannartussaavoq. Aammattaaq ullumikkut taamaaqataanik aningaasarsianit unerartitsinermut, akiliisitsiniarnermut oqartussap akiitsunik akilinngitsuukkanik akiliisitsinermut atortagaanut, tunngasumik kajumissuseqannginneq atuutereerpoq. Illuatungaani ingerlaavartumik akiliisitsisarnissaq siunnersuummi qulakkeerneqassaaq, taamaalillutillu innuttaasut pisortat piumassuserinngisaannik akiitsortitsisartutut atornissaat isumaliutigisinnaajunnaassavaat, tamatumanilu innuttaasut akiligassaminnik eqqumaffiginnilernissaat aammalu akiitsut annertuallaalinnginnissaat, qulakkeerneqarsinnaavoq.

Siunnersuut ataasiakkaat akiligassaasa qaffasinnerulernerannik malitseqartussaangimmat, aningaasartuutit qaffasinnerulernerat siunnersuummut attuumassuteqartoq, imminermini sulisartunut isumaqatiginninniarnerni il.il. aningaasarsiat qaffasinnerulernissaannut pingaaruteqartut tunngavigineqarsinnaassanngilaq. Kisiannili innuttaasup isertitaminik atuinissamut periarfissai killeqalissapput, tassami innuttaasoq pisortanit akiligassiisutit allatigut atuuttussap akilinngitsoornissaanut periarfissaarutissaaq. Tamatuma saniatigut aningaasat atorsinnaasat pillugit maleruagassanik siunnersuut imaqarpoq, tamatuma malitsigisaanik akiligassat qassit akilersinneqartussatut nalunaarutigineqarsimanersut apeqqutaatinnagu, innuttaasut isertitamik ilaannik aningaasanik aalajangersimasunik qulakkeerissunneqassallutik.

Taamatut pisoqarnerani siunnersuut aallaaviatigut innuttaasumut ullumikkornit pitsaanerusunik akiliisarnermut atugassaqartitsilissaaq, aammalu ernianut aamma nukingisaarnermut akiliutinut aningaasartuutit ikinnerulernerannik malitseqarsinnaapput, kiisalu akiitsut akilinngitsuukkat ikinnerulersinnaallutik, tamannalu innuttaasup sipaaruteqarnerani malitseqassasoq naatsorsuutigineqarpoq.

Siunnersuut akiligassiisumut, assersuutigalugu INI A/S imaluunniit kommuni, tunngatillugu innuttaasup inatsisitigut pisinnaatitaaffinik sunniissanngilaq. Akiligassiisutit atuuttussaanerata imaluunniit annertussusaata naammagittaalliutiginnissaanut innuttaasoq periarfissaqaannassaaq. Akiligassaq eqqunngitsumik tunngavilimmik akilersinniarneqarpat, innuttaasup aningaasat akiligassiisumit utertillugit akilersissinnaassavai. Tamanna piffissamut killiliussap iluani pinngippat, tamanna akiligassiisup innuttaasumut aningaasartaannut ernialiussamik akiliisussaanerani, malitseqassaaq.

Innuttaasut inatsisitigut isumannaatsuunissaat nukittorsarniarlugu, pisortani oqartussaasut aamma suliffeqarfiit siunnersuut malillugu ilanngaassivik aqutugalugu akiliisitsinissamut periarfissaqartut aamma pisussaaffinnik immikkuullarissunik pisussaaffilerneqassapput. Tassani pineqartunut ilaapput, ilaatigut oqartussaasoq akiligassap naammagittaalliutigineqarnerani tunngavissaqanngitsumik kinguarsaanani qisuariarnissamut pisussaaffeqartoq.

Qitiusumi akiliisitsiniarnermut oqartussaq, ataasiakkaatigut ataasiakkaat aningaasaqarnerannik naliliineq malillugu, sulii innuttaasumut aningaasarsiat tunniunneqartussat pingajorarterutaat tikillugit aningaasarsianit ilanngaatiginnissinnaavoq. Inatsisit taakkua naapertorlugit periarfissat atuuttut, assersuutigalugu akissarsianit tunniussinngikkallarnissamut, siunnersuummit sunnerneqanngillat, tassami aningaasarsianit ilanngaatiginninneq Ilangaassivik aqutigalugu allaffissornikkut aquneqarsinnaammat.

7. Sunniutaasussat annertuut allat

Siunnersuummi aamma naalagaaffimmi oqartussaasut, innuttaasunut Kalaallit Nunaanni akileraartussaataasunut isertitanik tunniussisartut, pineqartunut ilaassapput. Taakkua tassaasinnaapput Politiit, Sullivinnik Nakkutilliisut imaluunniit Kalaallit Nunaanni Eqqartuussivik.

Naalagaaffimmi oqartussaasut tassunga tunngatillugu, inatsisissatut siunnersuutip sunniutissaannut tunngatillugu, nunatsinni sulisitsisunut allanut sanilliunneqassapput, aammalu inuussutissarsiortunut sunniutaasussat pillugit immikkoortoq matuma siulianiittoq innersuussutigineqarpoq.

Naalagaaffimmi oqartussaasut aamma – Kalaallit Nunaanni pisortat akiligassiisut allat assigalugit - tamanna maleruagassat Naalakkersuisunit aalajangersarneqartut malillugit pisussaappat, Ilangaassivik aqutigalugu akiligassanik akiliisitsissutinillu il.il. akiliisitsinissamut periarfissaqassapput.

8. Oqartussat kattuffiillu il.il. tusarniarneqarnerat

Siunnersuut piffissami 30. april 2019 – 5. juni 2019 tusarniaassutigineqarpoq. Tamatuma saniatigut siunnersuut piffissami tassani tusarniaavimmiitsinneqarpoq.

Siunnersuutip tusarniutigineqarnerani akissutit oqaaseqaatitallit siunnersuummut ilanngussaq 1-imi issuarlugit ingerlateqqinneqarput pisariaqarfiatigullu oqaaseqaateqarfigineqarlutik. Tusarniaanermut akissutinut oqaaseqaatit *uingasumik* allanneqarput.

Siunnersuummi aalajangersakkanut ataasiakkaanut nassuiaatit

§ 1-imut

Aalajangersakkami siunnersuummut siunertaasoq pingaarneq aammalu siunnersuummi ilaatinneqartut killissalersorneqarput. Siunnersuut pingaarnernik marlunnik imaqarpoq.

Isertitanik il.il. pisortanit aamma sulisitsisunit innuttaasunut tunniussisarnerit suliarineqarnissaannut periaatsimik atuutsitsisoqalissasoq, aalajangersakkami nr. 1-imi killissalersorneqarpoq. Siunnersuummi aamma pissarsiassat aamma tunisinerup aningaasartai, pineqartunut ilaatinneqarput.

Aalajangersakkami nr. 2-mi akiliisarfirmik elektroniskimik atuutilersitsinissaq nassuiarneqarpoq. Elektroniskimik oqarnermi isumaavoq, akileraarutit aamma pisortanut akiligassat, innuttaasoq iliuseqartariaqarani, periaatsimi passunneqassasut.

§ 2-mut

Siunnersuummi nassuiaassutit makkua siunnersuutigineqarput.

Nr. 1-imut

Ilanngaassivik, isertitat innuttaasunut akilernerqartussaanerannut aammalu akiligassanik akiliisitsisoqarsinnaaneranut periaatsimut taaguutitut atornerqarpoq.

Nr. 2-mut

Ilanngaassivik nittartagaq tassaasinnaavoq Ilanngaassivimmut atuisunut attaveqaqateqarnermut atugassaq ataaseq arlallilluunniit, innuttaasumit imaluunniit oqartussanit atornerqarsinnaasoq.

Nr. 4-mut

Akiliisussaatitaasoq tassaasinnaavoq inuk, suliffeqarfik, ingerlatseqatigiiffik, aningaasaateqarfik il.il. imaluunniit oqartussaq, inummut isertitanik il.il. Ilanngaassivik aqqutigalugu innersuunneqarsinnaasunik, tunniussisussaq.

Nr. 6-imut

Akileeqqusissut ilitsersuissutaavoq, akiligassiisup Ilanngaassivimmi nassiussassaa. Akileeqqusissut tassaangilaq akiligassaq imaluunniit akiligassap allagartaa, kisianni nalinginnaasumik taassuma ataani isumaqatigiisummut tunngasut imaluunniit inatsisit tunngavigalugit akiligassamik pissuteqartut.

Akileeqqusissummut teknikkikkut piumasaqaatit, inatsimmi aalajangersarneqartut aammalu taakkua naapertorlugit aalajangersakkat, malinneqassapput.

§ 3-mut

Aalajangersakkami innuttaasut Ilangaassivik aqutugalugu isertitanik tunniussivigineqartussat, aammalu siunnersuummi § 9 naapertorlugu akiligassanik akiliisitsisarnermi pineqartunut ilaatinneqalersinnaasut, killissalersorneqarput.

Kikkut pineqartunut ilaatinneqarnersut qularutiginninneruneqarnissaanut qitiusumi inuit nalunaarsorsimaffianni suut nalunaarsorneqarsimanersut pingaartinneqassaaq. Siunnersuummi inuit Kalaallit Nunaanni najugaqartut tamarmik pineqartunut ilaatinneqassapput. Inuit Danmarkimi najugaqarlutik nalunaarsorsimasut imaluunniit Kalaallit Nunaat qimallugu nuussimasut, siunnersuummi pineqartunut ilaatinneqangillat.

Qitiusumi Inunnut nalunaarsuiffik pillugu Kalaallit Nunaannut peqqussut malillugu kommunalbestyrelsip kikkut tamaasa kommunimi najugaannut nalunaarsortussaavai. Tamanna atuuppoq nuuttoqarnerani Kalaallit Nunaanniinnissaq qaammatit 3-t sinnerlugit pissappat. Nunamiinnissaq qaammatinit 6-init sivilunerussappat nalunaarsuinissaq pisussaaffigineqarpoq. Peqqussummi § 6 malillugu najugaq paasineqassaaq tassaasoq: ”[S] umiiffik (inigisaq), inuup sulinnigiffeqarneq, sulilluni angalaneq, napparsimaneq assigisaaluunniit pissutigalugu peqanngikkallaraanni, akuttunngitsumik siniffigisartagaa, aammalu pigisai tassaniillutik.”

Inuk aammattaaq taamaaliornissaq akileraartarnermi suliassanik suliarinninnissaq eqqarsaatigalugu pisariaqarpat, allaffissornikkut CPR-normumik tunineqarsinnaavoq. Taamatut pisoqarnerani, inuk Kalaallit Nunaanni sulisitsisumit imaluunniit pisortani oqartussanit aningaasanik tigusaqartarpat, inuk taamatuttaaq siunnersuummi pineqartunut ilaatinneqassaaq .

Imm. 2-imut

Siunnersuutigineqarpoq inuusuttut 18-it inorlugit ukiullit siunnersuummi ilaatinneqassanngitsut. Inuusuttut 18-it inorlugit ukiullit Nammineertussaataitanerup Kalaallit Nunaannut atuutsinneqalernissaa pillug peqqussut naapertorlugu nammineertussaataaanginnerat tamatumani eqqarsaatigineqarpoq.

§ 4-imut

Imm. 1-imut

Siunnersuutigineqarpoq inuit aamma pisinnaatitaasut pisussaataasullu isertitanik aalajangersakkami allatorneqartunik Ilangaassivik aqutugalugu akiliisassasut. Taamaattumik suliffeqarfik il.il. aammalu inuk isertitanik taamaattunik tunniussisoq,

akiliisussaatitaavoq. Tassani assersuutigalugu ilaatinneqarput inuit sulisitsisuullutik aammalu sulisartunut isertitanik A-nik il.il. tunniussisartut.

Aalajangersakkami imm. 1-imi isertitat suussusaannut allattukkat atituumik oqaasertalerneqarput, tassami isertitat A-t aallaaviunissaat siunertaammat, aammalu isertitat B-t allattukkat arlallit Ilanngaassivik aqutugalugu innersuunneqartussaallutik.

Isertitat Ilanngaassivimmut akilerneqartussaagaluartut, isertitanit akiligassiissutit akilersinneqaqqusaasut, tamanna isumaqanngilaq. Assersuutigalugu innuttaasoq siunnersuummi § 9 malillugu akiligassanik akiliisitsisarnermi pineqartunut ilaasussanngortinneqarsimanngippat, imaluunniit akiligassanik akiliisitsisarnermut ilanngutsissimanngippat, akiliisitsisoqaqqusaanngilaq. Tamatuma saniatigut tunniussinerni siunnersuummi § 8-imi pineqartunut ilaasuni akiliisitsisoqaqqusaanngilaq.

Aalajangersakkami stk. 1, nr. 1-imut inuup atorfeqarnermini tigusassaannik tunniussinertit tamarnik pineqartunut ilaapput. Aammattaaq pineqartunut ilaapput bonusit imaluunniit ajunngitsorsiassat, atorfeqarunnaareernerup kingorna tunniunneqartussat. Aningaasarsianik siumoortumik tunniussineq taamatuttaaq aalajangersakkamut naapertuuttumik Ilanngaassivimmut tunniunneqassaaq. Aalajangersagaq isertitat A-t aningaasarsianit akileraarutit pillugit Inatsisartut inatsisaanni nassuiaassutaasumut naapertuuttumik paasineqassaaq. Sulingiffeqarnerisutisiassat, ajunngitsorsiassat, iluanaarutinit pissarsiassat, iluanaarutit, sulisumut kajumissaatit assigisaallu tunniunneqartartut taamatuttaaq aalajangersakkami pineqartunut ilaapput.

Aalajangersakkami allassimavoq ” akileraarutit A-t ilanngaatigereerlugit” tunniussisoqartassasoq. Tamatumani pineqarpoq aningaasat sulisitsisup sulisartup akissarsiai akileraarutit A-t ilanngaatigereerlugit Ilanngaassivimmut ilanngaatissat ilanngaatigereerlugit akilertassagai. Aningaasarsianit akileraarutit pillugit Inatsisartut inatsisaanni aammalu akileraaruserinermik ingerlatsineq pillugu Inatsisartut inatsisaanni maleruagassat malillugit uninngatinneqassapput akilerneqarlutillu.

Aammattaaq pineqartunut ilaapput tunniunneqartartut aningaasarsianit akileraarutit pillugit inatsit malillugu akileraaruserneqartussaanngitsut, soorlu ullormusiat (nerisassarsiutissat).

Aningaasarsianik tunniunneqartussanit aningaasat, sulisitsisup aningaasarsianit ilanngaatiginissaannik pisinnaatitaaffeqarfigisai, ilanngaatigineqarsinnaapput. Tassani pineqarput aningaasat inatsisip oqaasertaanni taaneqartut. Assersuutigalugu aningaasarsianit, aningaasarsiat siusinnerusukkut siumoortumik tunniunneqarsimasut, ilanngaatigineqarsinnaapput. Aammattaaq sulisitsisoq akiligassat ilanngullugit naatsorsuisinnaavoq.

Aalajangersakkami imm. 1, nr. 2-mut pisortanit ilinniartunut tunniussinerit qanorluunniit iluseqartut tamarmik ilaatinneqarput, ilanngullugit ilinniartunut taarsigassarsiarititanik ilinniarnermut tapiissutinik tunniussinerit.

Aalajangersakkami imm. 1, nr. 3-mut ingerlatseqatigiiffinnit Kalaallit Nunaanni angerlarsimaffeqartunit pissarsiassanik tunniussinerit ilaatinneqarput.

Imm. 1, nr. 4-imi siunnersuutigineqarpoq siulersuisuni ilaasortaanermit ajunngitsorsiassanik tunniunneqartussat taamatutaaq Ilanngaassivimmum akilerneqartassasut. Tamatuma saniatigut siulersuisuni ikiortittut inuussutissarsiuteqarnermit isertitat, aalajangersakkami pineqartunut ilaatinneqarput. Aalajangersagaq akileraartarnermut inatsisit eqqarsaatigalugit isigineqassaaq.

Imm. 1, nr. 5-imi siunnersuutigineqarpoq, soraarnerussutisianik tunniussinerit aamma soraarnerussutisianut inuunermullu sillimmasiisarfinnit aningaasanik tunniussinerit, taamatutaaq akiliisussaataitanermit pineqartunut ilaatinneqassasut. Assersuutigalugu soraarnerussutisianut aningaasaateqarfinnit il.il. soraarnerussutisianik tunniussinerit taamaattoq siunnersuummi nr. 1-imi pineqartunut ilaatinneqarput. Aalajangersakkami aammattaaq tjenestemandinut soraarnerussutisiassanik tunniussinerit pineqartunut ilaatinneqarput.

Imm. 1, nr. 6 malillugu tunisanik aningaasarsiasat, tunitsivimmit aalisakkanut pisanullu tunniunneqartussat, Ilanngaassivimmum akilerneqassapput. Taakkua tassaapput isertitat, tassani tunitsiviit aningaasarsianik akileraarutit pillugit Inatsisartut inatsisaat naapertorlugu tunisat aningaasartaannit akileraarummik ilanngaaticinninnissamik pisussaaffiliiffiusut.

Isertitat, aningaasarsianik akileraarutit pillugit Inatsisartut inatsisaat aamma aningaasarsianik akileraarutit aamma sulisoqarnermut akitsuutip akilersinneqartarneri pillugit Namminersorlutik Oqartussat nalunaarutaat malillugit, isertitatut A-tut inissisimatillugit, inunnut isertitanik tunniussisarnerit arlallit imm. 1, nr. 7-imi aalajangersakkami pineqartunut ilaapput.

Taakkunani pineqartunut ilaapput assersuutigalugu aningaasianik tunniussinerit makkununga:

- Oqalutsit imitsillutik sulisartut, nutserisut, translatoorit ilaalu ilanngullugit.
- Kisimiilluni erinarsortartutut, isiginnaartitsisartutut, nipilersortartutut, atuakkiortutut, eqqumiitsuliortutut allatigut suliaqartartutut, timersortartutut, isummersortartutut, eqqartuussisutut, eqqartuusseqataasartutut aamma illersuisutut suliaqarnermut aningaasarsiat.

Tunniussisussaq akileraarutininik A-nik tunniussinngikkallarnissamut aammalu aningaasat Ilanngaassivikkut tunniunnissaannik pisussaaffeqarpoq.

Imm. 2-mut

Pingaartumik aallartisarnerup nalaani, tunniunneqartussat imaluunniit isertitat aalajangersimasut Ilanngaassivik aqputigalugu imaluunniit aqputiginagu tunniunneqassanersut, ataasiakkaatigut nalilersuinissamut, siunnersuut pissutissaqalersitsissasoq naatsorsuutigineqarpoq.

Siunnersuutigineqarpoq, isertitat il.il. Ilanngaassivik aqputigalugu akilerneqartussat tassani pineqarnersut pillugu, nalornissuteqarnermi akileraartarnermut ingerlatsivik aalajangiisinnaasoq. Akileraartarnermut ingerlatsiviup aamma isertitat aalajangersimasut Ilanngaassivik aqputigalugu siunissami innersuunneqartassasut pillugu, sulisitsisut peqqusinnaavai.

Aalajangersagaq malillugu peqqusissut malinneqanngippat, tamanna akiliisitsinermik pineqaatissiiviusinnaavoq.

Imm. 3-mut

Siunnersuutigineqarpoq Naalakkersuisut maleruagassanik imm. 1-imi allattukkanik aalajangersarneqartunik immersuisussanik imarisaannullu ilassusiisussanik aalajangersaanissamut piginnaatinneqassasut. Taakkua tassaasinnaapput maleruagassat itisiliisut, nalorninermi isertitat suut Ilanngaassivik aqputigalugu tunniunneqartassanersut imaluunniit tunniunneqartassannginnersut, aalajangersaavusut.

Siunertaavoq siunnersuummi danskit oqartussaasuinit Kalaallit Nunaanni sulisartunut tunniussinerit aammalu Danmarkimi soraarnerussutisianut aningaasaateqarfinit inunnut Kalaallit Nunaanniittunut tunniussinerit ilaatinneqassasut.

Aammattaaq ingerlatseqatigiiffik nunanit allaneersoq ataatsimoortumik naliliineq malillugu naapertuutinnngissinnaasoq paasineqarpat, Kalaallit Nunaannut akiliisussanngortinneqarluni pisoqarsinnaavoq. Taamaattoqartillugu suliffeqarfik oqartussaasorluunniit nunamit allameersoq Ilanngaassivik aqputigalugu aningaasanik innersuussinissamut pisussaaffilerneqannginnissaat pillugu Naalakkersuisut maleruagassanik aalajangersaasinnaallutillu tamanna pillugu aalajangiisinnaapput.

§ 5-imut

Imm. 1-imut

Siunnersuutigineqarpoq Kalaallit Nunaanni pisortani oqartussaasunit inunnut nunatsinniittunut tunniussinerit tamarmik, Ilanngaassivik aqputigalugu tunniunneqartassasut. Aalajangersagaq taamaalilluni § 4-mut siunnersuutigineqartumut ilaatigut qalleraappoq.

Tassani pineqartunut ilaapput tunniussinerit, isertitanut akileraaruteqaataasussanut tunngasut, kisianni aamma taarsigassarsianik, taarsiissutinik imaluunniit tapiissutinik il.il. tunniussinerit.

Aalajangersakkami assersuutigalugu pineqartunut ilaassapput kultureqarnermut suliassaqrarfiup iluani aningaasaliinernik tapiissutinillu tunniussinerit, tunniussineq oqartussaneersuuppat aalajangersakkami pineqartunut ilaassaaq.

Pisortanit tunniussinermi akiligassiissutit akilersinneqaqqussaangippata, oqartussaasup tunniussisussap tamanna tunniussinermut atatillugu nalunaarsussavaa. Tamanna assersuutigalugu tassaasinnaavoq, pisuni ataasiakkaani tunniussinissamut siunertaasumut tamanna akerliusoq. Tamanna siunnersuummi § 8-mi aalajangersakkat malillugit pisinnaavoq.

Ilanngaanissaq inatsisinut naapertuuttuuppat aningaasat tunniutinnginnerini ilanngaassinissamut oqartussaasoq periarfissaqartinneqarpoq.

Imm. 2-mut

Siunnersuutigineqarpoq pisuni tamaginni innuttaasunut § 3-imi pineqartunut ilaatinneqartunut aningaasanik tunniussinissamut pisussaaffeqarneq taanna suliffeqarfinnut nr. 1-imi imaluunniit 2-mi pineqartunut ilaasunut atuutilersinneqassasoq.

Nr. 1-imi aamma 2-mi aalajangersakkat, kommunit aamma Namminersorlutik Oqartussat missingersuutaat naatsorsuutaallu pillugit Inatsisartut inatsisaanni aalajangersakkanut naapertuupput. Siunertaavoq suliffeqarfiit il.il. siunnersuummi matumani pineqartunut ilaatinneqarsinnaasut, missingersuutinut naatsorsuutinullu inatsimmi ilaatinneqarsinnaasunut naapertuunnissaasa qulakkeernissaa.

§ 6-imut

Imm. 1-imut

Siunnersuutigineqarpoq akiliisussaatitaasut, aningaasat innuttaasumut (aningaasanik tiguisusaaq) tunniunneqarnissaat kingusinnerpaamik ullunik 2-nik sioqqullugu, aningaasanik nuussissasut. Akileraartarnermut ingerlatsiviup akiliinermik suliarinnissinnaanissaanut nuussineq tamakkiisuusaaq, takuuk aalajangersakkami imm. 2 aamma § 7, akiliisussaatitaasup paasissutissanik ilanngussinissaanut maleruagassiiiviusoq. Ilanngaassiviup piffissami akunnermiliuttumi akileeqqusissutit ilanngutsinneqarsimasut tunngavigalugit akiliutissanik nuussinissaa eqqarsaatigalugu, piffissamut killiliusaaq aalajangersarneqarpoq. Tulliullugu Ilanngaassiviup aningaasat innuttaasup kontuanut nuussavai.

Aalajangersakkami, aningaasarsiat aamma atorfeqarnermi isertitassat allat aamma ingerlatseqatigiiffinit il.il. iluanaarutit, pineqartunut ilaapput. Tamatuma saniatigut Namminersorlutik Oqartussanit aamma taassuma ataani sullissivinnit innuttaasunut tunniussinerit tamarmik pineqartunut ilaapput. Akiliisussaatitaasut, assersuutigalugu Namminersorlutik Oqartussat isumaqatigiisummi peqataasutut, assersuutigalugu

inuussutissarsiortumut namminersortumut Ilangaassivik aqutigalugu tunniussinissap ullut 2-t angullugit sivilissuseqarnissaa, naatsorsuutigisussaassavaa.

Taamaattoq siunnersuummi § 8 malillugu ingerlaannaq tunniussassat Ilangaassivimmit sapinngisamik piaarnerpaamik nuunneqartassapput.

Imm. 2-mut

Akiliineq Ilangaassivimmit suliarineqarsinnaassappat tamanna tamakkiisuusaaq. Tamakkiisumik nuussineq tassaavoq aningaasat eqqortumik annertussusillit nuunneqartut aammalu akiliinerup Ilangaassivimmit suliarineqarnissaanut paasissutissat pisariaqartut ilanngullugit nassiunneqarsimasut. Paasissutissat nuunneqarpata aningaasallu naammattumik annertussuseqarnatik akiliineq uppersarsarneqartussaassaaq. Tamanna Ilangaassivimmi allattorsimasuutit kukkusumik nalunaarsorneqarneranni aammalu akiliutip tamakkiisumik akilerneqarnissaa siunertaralugu akiliisussaataasut iluarsissuteqarnerisigut, suliaqarnermi pisinnaavoq.

§ 7-imut

Imm. 1-imut

Akiliinernut tamanut atatillugu inuup akiliivigineqartussap CPR-normua akiliisussaataasup atussavaa.

Imm. 2

Akilerartarnermut Aqutisoqarfiup paasissutissanut akiliinermut ilanngullugit nassiunneqartussanut teknikkikut piumasaqaatit aamma nassuiaanerit, aalajangersassavai. Nassuiaanerit assersuutigalugu tassaasinnaapput isertitat suussusaat, piffissaq suna akiliinermi pineqarnerisigut, akiliisussaataasup kinaassusaa, assersuutigalugu CVR-ia atorlugit.

Paasissutissat suut akiliisussaataasup ilanngullugit nassiutissanerai, akiliinerup/isertitat suussusaat apequtaassapput.

§ 8-mut

Imm. 1-imut

Aalajangersakkami siunnersuutigineqartumi Ilangaassivimmut tunniussinermut atatillugu, aningaasat akileeqqusissutinik akiliinermut atorneqassanngitsut, tunniussisussaataasup allassinnaagaa, inatsimmi tunngavissalerneqarpoq. Tassani tunniunneqartussat tamarmik imaluunniit ilai pineqartunut ilaatinneqarsinnaapput.

Taamaalilluni aningaasat Ilangaassivikkoortiinnarneqassapput aammalu innuttaasumut tunniunneqassallutik.

Imm. 1, nr. 1-imi aalajangersagaq ullormusianut aamma angalanermi ajunngitsorsiassanut, sulisitsisup innuttaasoq sulinerminut atatillugu angalanerani nerisaqarneranut, ineqarneranut aamma pisariaqartitaannut annikitsunut matussutissatut tunniuttagaannut, tunngassuteqarpoq.

Imm. 1, nr. 2-mi aalajangersakkami assersuutigalugu ilaassapput, innuttaasoq aningaasartuutitut akiliigallarsimasoq, sulisitsisumit imaluunniit akiliisussaatitaasumit allamit utertinneqartussanik.

Imm. 1, nr. 3-mi siunnersuutigineqarpoq, kommunalbestyrelsi pisortanit ikiorsiissutinik akiligassanik akiliisitsivioqqusaanngitsunik tunniussisinaanissamut aalajangiisinnaasoq. Aalajangersakkanut assersuutigalugu ilaatinneqarpoq innuttaasoq akiligassaqarpat tunniunneqartut inuttaasumit aningaasartuuteqarfiussapput. Assersuutigalugu taakku tassaasinnaapput ukiukkut atisassanut imaluunniit sulinermi atisanut il.il. pisinissamut pisortanit ikiorsiissutit qaffassutaat.

Peqqissutsimut tunngasuni innuttaasut nerissutissaannut tunniuttakkat imm. 1, nr. 4-imi aalajangersakkami ilaatinneqarput.

Taarsiinissamut akiliutit assigiinngitsut arlallit eqqartuussisarnermi inatsimmi § 620 naapertorlugu akiliiffiusussaannngitsut, imm. 1, nr. 5-imi aalajangersakkami ilaatinneqarput.

Imm. 2-mut

Akiliinissaq aalajangersimasoq akiligassat aqutigalugu akileqqusaanngissinnaanersoq aammalu akiliineq ingerlaannartumik akiliinerit pillugit maleruagassat malillugit suliarineqassanersoq nalornisoqartillugu Akileraartarnermut Aqutsivik aalajangiinissamut piginnaatinneqassasoq siunnersuutigineqarpoq.

Aammattaq akiliisussaatitaasoq akiliinermini isertitat aalajangersimasumik innersuussutiginnissaannut peqquneqarsinnaaneranut Akileraartarnermut Aqutsivik piginnaatinneqarpoq. Aningaasat akileeqqusissummut periutsimut ilanngutinngitsoorneqarnissaat siunertaralugu isertitat eqqunngitsumik innersuunneqarnissaannik iluanaarniarsinnaasoqaratarsinnaanerata annikillisarneqarnissaa aalajangersakkakut siunertarineqarpoq. Aalajangersagaq qaqutiguinnaq atorneqartassasoq naatsorsuutigineqarpoq.

Imm. 3-mut

Siunnersuutigineqarpoq pisuni, imm, 1, nr. 1-2-mi allassimasunit allaanerusuni, tunniussassat akileeqqusissutinik akiliinerimut atoqqusaassannginnersut, pillugu maleruagassanik aalajangersaanissamut Naalakkersuisut piginnaatinneqassasut.

Aammattaq siunnersuutigineqarpoq aalajangersagaq imm. 1-imi aalajangersarneqartut imarisaasa killiliiffiqarnissaannut imarisaasalu annertusarneqarnissaannut

Naalackersuisut piginnaatinneqarput. Assersuutigalugu akiliisussaatitaasut akiligassinneqanngikkaluarlutik il.il. ataatsimut isigalugu aningaasat akiligassanut atorineqanngitsoornissaannut periarfissanik atornerluisut paasineqarpat aalajangersagaq atorineqarsinnaavoq.

Imm. 4-mut

Akiliinerit ilaat ingerlaannartumik akiligassatut suliarineqartarnissaat pillugu maleruagassanik aalajangersaanissamut Naalackersuisut piginnaatinneqassasut siunnersuutigineqarpoq.

Nassuiarneqartutut pisortanit isertitat tamarmik Ilangaassivimmut akilerneqassapput. Kisiannili innuttaasooq nukinginnartumik pisariaqartitsilerluni inissisimalersinnaavoq, tassani kommunimi isumaginninnermut oqartussat innuttaasumut piaartumik aningaasanik atugassiinissaat pisariaqalerluni, assersuutigalugu nukinginnartumik ajornartorsiulernissaq pitsaaliorniarlugu. Tamatumani aamma tassaasinnaavoq suliffeqarfik nunami allami il.il. sulisulik.

Taamaattumillu maleruagassat Naalackersuisunit aalajangersarneqartut naapertorlugit kommunalbestyrelsi allaluunniit akiliisussaatitaasooq aningaasat ikiorsiissutilluunniit ingerlaannartumik akilerneqarnissaannut aalajangiisinnaanissaat periarfissinneqassasooq siunnersuutigineqarpoq. Ingerlaannartumik akiliinerup kingunerisaanik Ilangaassivimmi periaaseq teknikkikkut aaqqissuunneqassaaq, taamaalilluni akiliisussaatitaasunit akiliinermut atatillugu periaatsimi paasissutissat allassimasut aallaavigalugit innuttaasup kontuanut sapinngisamik piaarnerpaamik tunniussineq pisussaassalluni. Taamatuttaaq aningaasanit akiligassiissutit akilersinneqarsinnaanngillat.

Imm. 5-imut

Akiliisussaatitaasut akilerneqartut ingerlaannartumik akiligassatut aningaasallu akiligassiissutiginneqarsinnaanngitsut eqqarsaatigalugit Ilangaassivimmik periutsumik atuinermi paasissutissat nalunaarsugassalluunniit imaluunniit periusissat allat pillugit maleruagassanik erseqqinnerusunik aalajangersaanissamut Naalackersuisut piginnaatinneqassasut siunnersuutigineqarpoq.

§ 9-mut

Imm. 1-imut

Innuttaasup isertitaannit Ilangaassivik aqutigalugu tigusassaannit akileeqqusissutinik qaqugukkut akiliisitsisoqaqqusaanersoq, aalajangersakkami maleruagassiivigineqarpoq.

Pineqartoq tamatumunnga ilanngutsissimanngippat imaluunniit pineqartoq imm. 2-mi aalajangersagaq malillugu pineqartunut ilaasooq akileraartarnermut ingerlatsivik aalajangiisimanngippat, akileeqqusissummik akiliisitsisoqaqqusaanngitsoq.

Imm. 2-mut

Innuttaasoq akiliisarfirmi pineqartunut ilaalissasoq akileraartarnermut ingerlatsiviup aalajangiisinnaaneranut tunngavissarititaasut aalajangersakkami allattorneqarput. Pineqartoq akiliisarfirmi pineqartunut ilaasoq akileraartarnermut ingerlatsiviup aalajangiisinnaanissaanut, tunngavissarititaasoq ataasiinnaq naammassineqarsimassaaq. Aalajangiineq maleruagassanit pisussaaffiliunneqarluni aalajangiineruvoq, tassami aalajangiinermi naliliineq ingerlanneqartussaangimmat.

Imm. 2, nr. 1-imi siunnersuutigineqarpoq pineqartunut ilaatinneqalernissamut tunngavissarititaasoq siulleq tassaasoq, pineqartoq pisortanut akilinngitsuukkanik akiitsoqartoq. Tassunga atatillugu pineqartoq qitiusumi akiliisitsiniartarnermut oqartussami akilinngitsuukkanik akiitsoqartoq nalunaarsorneqarsimanersoq, pingaartinneqarpoq.

Imm. 2, nr. 2-mi siunnersuutigineqarpoq innuttaasoq akiligassanik akiliisitsisarnermi pineqartunut ilaatinneqartussanngortinneqarluni pisut aappaat tassaasoq, innuttaasoq ukiut kingulliit 5-it iluanni 3-nik imaluunniit amerlanerusunik akilinngitsuukkanik akiitsoqarnermut suliaqarfigineqarsimasoq. Nr. 1 assigalugu, akiliisitsiniartarnermut oqartussami suut nalunaarsorneqarsimanersut pingaartinneqassaaq.

Aalajangersakkamut tunngavilersuutigineqarpoq, akilinngitsuukkanik akiitsoqarnerup ajornartorsiutaanerata ilai tassaasut, akiligassiisut aamma akiliisitsiniartarnermut oqartussat innuttaasunit annikitsunik aningaasartalinnik akiliisitsiniartarnermut allaffissornikkut isumalluutinik annertuunik atuisussaanera.

Aalajangiisuussapput suliat akiliisitsiniartarnermut oqartussamut suliakkiissutigineqarsimasut amerlassusaat. Pisortanut akiitsunik akiliisitsiniartarneq pillugu maleruagassat malillugit kommunit, kinguartitsinissaq imaluunniit akilersuilluni akileraanissaq pillugu isumaqatigiissuteqartoqarsimangippat, akiliinissamut piffissamut killiliussat kingorna ullut 14-it missaasa qaangiunneranni, assersuutigalugu akiligassiissutit akiliisitsiniartarnermut oqartussamut suliakkiissutigisarpaat. Ineqarnermut attartorneq aamma innaallagissamik, imermik kiassarnermillu pilersuineq pillugit akiligassiissutit, akiliisussaqaq minnerpaamik 2-riarluni akiliinissamik eqqaasitsissutinik tigusaqarsimappat, aatsaat suliakkiissutigineqassapput.

Imm. 3-mut

Siunnersuutigineqarpoq aalajangiisoqannginnerani innuttaasoq aalajangiinermut akerliliissuteqarnissamut periarfissinneqassasoq.

Akiitsunut akilinngitsuukkanut imaluunniit piumasaqaatip piuneranut imaluunniit annertussusaanut akerliliissuteqarnerit, piumasaqaammut tunngaviusut misissorneqarnissaannik kinguneqarsinnaapput. Taamatut pisoqarnerani akileraartarnermut ingerlatsivimmit apeqqut akiligassiisumut saqqummiunnissaa pisariaqarsinnaavoq.

Akiitsoqartumut aaqqiagiinngissuteqarnermi, akiligassiisup suliaq eqqartuussivimmut suliakkiissutigisariaqassavaa.

Taamaattoq akeryliliissuteqarnerit tamakkerlutik kinguartitsinermik sunniuteqassanngillat. Akiitsoqartup piumasagaatip atuutinnginnera pillugu nalaatsornerinnarmik akeryliliissuteqarnermik saqqummiussilluni, aalajangiineq kinguartissinnaassanngilaa imaluunniit avaqqutaarsinnaassanagu. Taamaattumik akiitsoqartup piumasagaatip piunera imaluunniit akiligassiisumit eqqortumik naatsorsorneqarsimannginnerarlugu akeryliliissuteqarluni uppersarsassavaa. Taamaattoqarsimanngippat akeryliliissuteqarnerit kinguartitsinermik sunniuteqassanngillat.

Assersuut 1: Akiligassatigut kinguaattoorutillit nalunaarsorsimaffianni allassimavoq innuttaasoq eqqagassalerinermut 800 kr.-nik ineqarnermullu akiliummut 12.000 kr.-nik akiligassaqarluni kinguaattooruteqartoq. Illuatungerisamut tusarniaanermut atatillugu inuttaasup ineqarnermut akiliisimanerminut uppersarsaat kingornagut nassiutissavaa. Taamaattoqartillugu illuatungerisamut tusarniaanermi aalajangigassatut siunniutatut akileraartarnermut aqutsiviup aalajangikkani aalajangiusimaannarsinnaavaa innuttaasoq akiligassatigut sulii kinguaattooruteqarmat.

Assersuut 2: Akiligassatigut kinguaattoorutillit nalunaarsorsimaffianni allassimavoq innuttaasoq eqqagassalerinermut 800 kr.-nik akiligassatigut kinguaattooruteqartoq. Illuatungerisamut tusarniaanermi innuttaasoq akiligassatigut kinguaattooruteqarnani akissuteqarpoq. Innuttaasoq uppersarsaatini imaluunniit akeryliliinerminut itisiliissutaasunik nassiussaqaqqanngilaq. Akeryliliissutaasut tunngavilersorluagaanngippata uppersarsaatitaqaqqanngippatalu illuatungerisamut tusarniaanermi aalajangiussaq akileraartarnermut aqutsisoqarfimmit aalajangiusimaneqassaaq.

Assersuut 3: Innuttaasoq eqqagassalerinermut 800 kr.-nik akiligassatigut kinguaattooruteqarpoq. Illuatungerisamut tusarniaanermi innuttaasoq akissuteqarpoq akiligassatigut kinguaattoorutit akerylilerumallugit. Aammattaaq innuttaasoq kommunip eqqagassalerinermut akiligassiisutai akileeqqusineriluunniit pillugit siusinnerusukkat akeryliliisimanerminut uppersarsaatini nassiussivoq. Taama pisoqartillugu akileraartarnermut aqutsisoqarfik aalajangiisoqaqqannginnerani akeryliliissutit kommunimut saqqummiutissavai.

Tusarniaanermut akeryliliissuteqartoqaqqanngippat, piffissamut killiliussap akileraartarnermut ingerlatsiviup tusarniaanermut allakkiami allataata kingorna inatsisitigut atuutsitsineq atuutilissaaq.

Akerliliissutit pillugit aalajangersakkami imm. 3-mi taamaallaat ilaatinneqarput pisut akileraartarnermut aqutsivik inuk akiligassiiffigineqartussaq pillugu aalajangikkat pillugit sulianik ingerlatsivigisai. Taamaalillunilu aalajangersakkami ilaatinneqarnatik pisut

innuttaasoq Ilanngaassivimmi akileeqqusissummut atatillugu akerliliissuteqarnerit. Taakku siunnersuummi §§ 40-41 malillugit suliarineqassapput.

Imm. 4-mut

Siunnersuutigineqarpoq innuttaasup tusarniaanermut piffissamut killissaliussap qaangiutinnginnerani akiitsut akilinngitsuukkat akilerpagit, innuttaasup akiliisarnermi pineqartunut ilaatinneqalernissaq pinngitsoortissinnaagaa.

Taamaattoq innuttaasoq taamatut pisoqarnerani aamma piffissap aalajangersimasup iluani akiitsunut akilinngitsuukkanut suliat amerlassusaat pillugu imm. 1, nr. 2-mi pineqartunut ilaappat, pineqartoq akiliisarnermi pineqartunut ilaatinneqalissasoq akileraartarnermut ingerlatsivik aalajangiissaaq.

Imm. 5-imut

Innuttaasoq akileraartarnermut ingerlatsiviup aalajangiinerata malitsigisaanik imaluunniit nammineq kajumissutsimik ilanngutsinnerup malitsigisaanik akiliisarnermi pineqartunut ilaappat, nr. 1-3-mi aalajangersakkami piumasagaatit naammassineqarsimappata, innuttaasoq akiliisarnermit ilaajunnaarniarluni nalunaarsinnaavoq.

Innuttaasoq akiliisitsisarfimmi pineqartunut ilaasoq naliliineq assigalugu, aalajangiineq kinaassusersiunngitsumik tunngaveqarneq aallaavigalugu aalajangiiffigineqartoq tassani pineqarpoq. Tunngavissarititaasut naammassineqarsimappata, innuttaasoq akiliisitsisarfimit nalunaarsorsimajunnaarnissamik pisinnaatitaavoq.

Imm. 3, nr. 1 malillugu innuttaasup piffissami qinnuteqarfiusumi imm. 2-mi aalajangersakkami tunngavissarititaasut naammassisimasussaangilai.

Imm. 5, nr. 2 malillugu innuttaasoq taamatuttaaq ukiup kingulliup iluani imm. 2-mi aalajangersakkami tunngavissarititaasut naammassisimasussaangilai.

Imm. 5, nr. 3 malillugu innuttaasoq akiliisitsisarfimmi pineqartunut ilaassasoq pillugu Akileraartarnermut ingerlatsivik innuttaasumut aalajangersimasumut tunngatillugu aalajangiisimappat, tunngavissarititaasooq taamaallaat atuutissaaq. Taamatut pisoqartillugu akileraartarnermut ingerlatsiviup aalajangiineranit minnerpaamik ukiut marluk ingerlasimassapput.

Imm. 6-imut

Ilanngaassivimmi akiliisarnermit ilaajunnaarnissamik ilaalernissamillu nalunaarneq, arlalinnik suliaqarnermut sunniuteqartussaavoq. Akiligassiisut assersuutigalugu akiligassaq Ilanngaassivik aqputigalugu imaluunniit aqputiginagu aammalu ulloq suna aallarnerfigalugu akilersinneqartassanersoq, nalunaarfigineqassapput. Taamatut nalunaaruteqarneq aamma

piffissamut killissaliussat pillugit akileraartarnermut ingerlatsiviup aamma akiligassiisup akornanni suleriaatsit naleqquttuussapput.

Imm. 7-imut

Aalajangersagaq manna malillugu aalajangiinissaq siunertaralugu akileraartarnermut ingerlatsivik nalunaarsuiffinni assigiinngitsuni paasissutissanik ataatsimoortitsissaaq. Ataatsimoortitsinissami siunertarineqarpoq innuttaasut pisortanut akiligassatigut maannakorpiaq kinguaattoorutillit imaluunniit akiligassatigut kinguaattoorutininik arlalinnik suliaassarfiusimasut akileraartarnermut aqutsivimmit kinaassusersisinnaanissaat. Tassani ilaatinneqarsinnaapput akiligassatigut kinguaattoorutit pillugit paasissutissat, akiligassatigut kinguaattoorutit annertussusii ataasiakkaanut agguataarlugit, akiligassiissutit suussusii, ullut akiligassat akileraartarnermut aqutsivimmut tunniunneqarfiit, kontulersuineq aammalu akiliinerit il.il. Paasissutissat taakku akileraartarnermut atatillugu paasissutissanut aammalu inuup normuinut nalunaarsorsimaffimmit paasissutissat ilanngullugit ingerlanneqarsinnaapput, tamatumani innuttaasut akiligassiiffigineqartussatut ilanngunneqarnissaat pillugu suliaassannik akileraartarnermut aqutsiviup aallartitsisinnaanissaa ingerlatsisinnaanissaalu anguniarneqarluni.

Paasissutissat illuatungerisanik tusarniaassutini aalajangikkanilu innuttaasunut nassiunneqartunut ingerlateqqinneqarsinnaapput innuttaasup suliamut tunngavigineqartoq paasissutissallu nalunaarsorneqartut pillugit akeryliliissuteqarnissamut tungavissaqarluarnissaa siunertaralugu.

Paasissutissat inuit normuinik nalunaarsorsimaffimmit aammalu akileraartarneq pillugu nalunaarsorsimaffimmit paasissutissanut ataatsimoortitsinissami ilaatigut tunngavigineqarpoq innuttaasup allamut nuussimanagera imaluunniit angajoqqaatut oqartussaassuteqartillugu il.il. pisut eqqumaffiginiarneqarnissaat. Akileraartarneq pillugu paasissutissanut atatillugu ataatsimoortitsineq tulluurtuusinnaavoq inuit isertitaqarneq ajortut pinnagit akiligassiiffigineqarnissaminut isertitatigut tunngavissallit aallunneqarnissaat siunertaralugu.

Imm. 8-mut

Siunnersuutigineqarpoq aalajangersagaq manna malillugu aalajangiinernut maleruagassanik erseqqinnerusunik aalajangersaanissamut Naalakkersuisut piginnaatinneqassasut, ilanngullugit suleriaasissat aammalu qinnuteqarnermi immersugassanik aalajangersimasunik atuisoqassanersoq.

§ 10-mut

Imm. 1-mut

Aalajangersakkakut anguniarneqarpoq akiligassat sorliit Ilanngaassivik aqputigalugu akileqquneqarsinnaaneramik killiliinissaq. Akiligassaq piffissami akiliiffissami kingullermi

akilerneqarsimanngitsoq akileeqqusissutigineqarsinnaanngilaq, tamatumani akiligassatigut kinguaattoorut pineqarmat. Tamanna akiligassanik akiliisitsisarnerup nutarterneqarnissaa aammalu akiitsunut akilinngitsuukkanut pinngitsaaliissummik akiliisitseriaasiussanngitsoq, pillugu siunnersuummi siunertamut naapertuuppoq.

Siunnersuummi § 26-mut innersuussinermi siunertarineqarpoq innuttaasup akiligassaqarfimminut nammineq piunassutsini malillugu akiliinissamut isumaqatigiissutinit akileeriaatsimi ilaatinneqarsinnaanissaata qulakkeerneqarnissaa. Nammineq piunassuseq malillugu akiliinissamik isumaqatigiissut tassaavoq akiligassatigut kinguaattoorutit piffissap aalajangersimasup iluani imaluunniit aalajangersimasumik annertussusilimmik akilersorneqarnissaat pillugu akiligassallit akiligassaqarfiullu akornanni isumaqatigiissut.

Imm. 2-mut

Aappassaatut imm. 2-imi siunnersuutigineqarpoq Ilangaassivik aqutigalugu akiligassiinerit suut akilersinneqartassanersoq kiisalu oqartussat sorliit akiligassiinernik akiliisitsisassanersut pillugu maleruagassanik aalajangersaanissamut Naalakkersuisut piginnaatinneqassasut. Taamaalilluni akiligassiinernut Ilangaassivik aqutigalugu akilersinneqartartussanut ilaasussat allattorsimaffianni nalunaarutinngorlugu aalajangersaasoqassaaq. Akiligassanik akiliisitsisarnerup maleruagassanut siunnersuummi matumani aalajangersarneqartunut aammalu Ilangaassiviup il.il. atorneqarnissaanut tunngavissarititaasunut naapertuunnissaat qulakkeernissaa siunertaralugu, maleruagassat oqartussat aalajangersimasut isumaqatiginninniarfigineqareerneranni aalajangersarneqassapput. Oqartussaasup aalajangersimasup akiligassat ilaat Ilangaassivik aqutigalugu akiligassiisuteqarsinnaanerata aalajangersaavigineqarnissaanut aamma periarfissaqarpoq, akiligassat allat nalinginnaasumik akileqquneqassallutik.

Naatsorsuutigineqarpoq aallaqqaataani akiligassiinerit aamma oqartussat, Ilangaassivik aqutigalugu akiliisitsisinnaasut ikittuunnaassasut, kisianni amerlassusaat piffissap ingerlanerani, ingerlatsinikkut misilittakkat annertusiartorneri ilutigalugu, amerliartortinneqassasut.

Akiligassiissutit pisortat innuttaasunut akiligassiisutigisaat tamarmik Ilangaassivik aqutigalugu akilersinneqarsinnaapput. Akiligassiissutit pisortat ingerlatsinerannut inatsisineersuunersut imaluunniit inuit akornanni inatsisinut tunngassuteqarnersut apeqqaatinnagu tamanna atuutissaaq, soorlu tunniussassanik tunniussinissaaq. Ilangaassivik aqutigalugu innuttaasut akiliisinneqarsinnaanissaannut pisariaqartoq tassaavoq, innuttaasup siunnersuummi § 9, imm. 1 aamma 2 naapertorlugit akiliisarnermi pineqartunut ilaatinneqalersimanera.

Pisortat paasineqassaaq tassaasut Namminersorlutik Oqartussat, kommunit aamma pisortani oqartussat allat aammalu taakkua ataanni immikkoortortat, soorlu Namminersorlutik Oqartussat suliffeqarfiutai imminut ingerlatsitat.

Ingerlatseqatigiiffiit Namminersorlutik Oqartussanit pigineqartut aamma pisortani suliffeqarfiit allat il.il., inuinnarnut inatsisit malillugit aaqqissuussaanerat iluseqartut, taamaalillutik Ilangaassivik aqutugalugu akiligassiinernik akiliisitsinnaanngillat. Taamaattoq tamanna ingerlatseqatigiiffinnut il.il., aalajangersakkami imm. 2-mi ersarissumik taaneqartunut atuutinngilaq.

Akiliisitsisoqarsinnaanissaanut akiligassiinermik atuuttumik peqarnissaa pisariaqarpoq. Akiligassiinermi inatsisit malinneqarsimasinnaapput imaluunniit inatsisit naapertorlugit peqqusissutaasinnaallutik, soorlu akileraarutit, akitsuutit imaluunniit akiliutit. Akiligassiinermi tamatuma saniatigut innuttaasumut isumaqatigiissut atuuttoq malinneqarsimasinnaavoq. Taanna assersuutigalugu tassaasinnaavoq innaallagissamik, imermik kiassarnermillu pilersuineq pillugu isumaqatigiissut imaluunniit attartornissamut isumaqatigiissut. Akiligassiineq tamatuma saniatigut innuttaasumit akuersaarneqartuusinnaavoq. Taanna assersuutigalugu tassaasinnaavoq innuttaasoq pisortani oqartussat pigisaanni ajoqusiisimasoq aammalu pineqartup tamanna aammalu taarsiinerup annertussusissaa akuersaarsimagaa. Akiligassiineq eqqartuussinikkut, isumaqatigiissitsinikkut assigisaanniluunniit aalajangerneqarsimappat, taamatuttaaq akiligassiineq atuutissaq Ilangaassivik aqutugalugu akilersinneqarsinnaalluni.

Imm. 3-mut

Siunnersuutigineqarpoq Inatsisartut inatsisaanni, pisortat akiligassiissutaasa saniatigut ingerlatseqatigiiffinnit il.il. nr. 1- 3-mi allatorneqartunit akiligassiissutit, aamma pineqartunut ilaassasut.

Imm. 3, nr. 1-imi aamma 2-mi siunnersuutigineqarpoq INI A/S-imit aamma Iserit A/S-imit akiligassiissutit siunnersuummi pineqartunut ilaassasut. Ingerlatseqatigiiffiit pisortanit pigineqarput aammalu ullumikkut pisortat inissiaataannik amerlasoorpassuarnik aqutsisuullutik.

Nr. 3-mi siunnersuutigineqarpoq inissianik attartortitsinermut ingerlatseqatigiiffiit tamakkiisumik ilaannaasumilluunniit pisortanit pigineqartut, ingerlatseqatigiiffiit taamaattut pilersinneqarpata, siunnersuummi pineqartunut ilaatinneqarsinnaasut.

§ 11-mut

Aalajangersakkami siunnersuutigineqartumi Ilangaassiviup atuuffissai pingaarnerit, akiligassanik akiliisitsinertut iluseqartut, aalajangersarneqarput.

§ 9-mut innersuussinermut siunertaavoq, innuttaasoq ilanngutsissimappat imaluunniit akileraartarnermut ingerlatsivik tamatuminnaga aalajangiisimappat, akiligassanik akiliisitsineq aatsaat pisinnaasoq, erseqqissarneqarnissaa.

Sulisitsisut, ingerlatseqatigiiffiit aamma pisortat innuttaasup isertitai tamakkiisut Ilanngaassivimmut tunniuttassavaat, taamaattoq aningaasat sulisitsisup aningaasarsianik tunniussinermi ilanngaatigisinnaasai ilanngaatigineqassallutik, assersuutigalugu soraarnerussutisianut akiliutit aamma ilanngaatiginninnerit il.il. Tulliullugu akiligassiisutit ilanngutsinneqarsimasut aningaasanut atorsinnaasanut killissaliussat iluanni akilersinneqassapput, aammalu aningaasat sinneruttut innuttaasup kontuanut nuunneqassallutik.

§ 12-imut

Imm. 1-imut

Akiligassiisutit akileeqqusissutit Ilanngaassivimmi ilanngutsinneqartutut iluseqartut aningaasartaasa annertuussusaat apeqqutaatinagu, isertitanit Ilanngaassivik aqutugalugu inuup tigusassaannit aningaasat atorsinnaasat minnerpaaffeqarnissaannik innuttaasooq qulakkeerinnineqarpoq.

Taamaalilluni akileeqqusissutit, innuttaasup aningaasanik atorsinnaasanik annikinnerusunik tunniussivigineqarneranik malitseqartut, akilersinneqartassanngillat.

Aningaasat annertussusaannut innuttaasooq kisimiittuunersoq imaluunniit katissimallugu aappaqarnerooq apeqqutaavoq. Tamatuma saniatigut aningaasanut atorsinnaasanut meeqqat angerlarsimaffimmi najugaqartut 18-it inorlugit ukiullit amerlassusaat (takuuk imm. 3) kiisalu innuttaasooq ilinniartuunersoq (takuuk imm. 2) ilaatigut sillimaffigineqassapput.

Assersuut 1: Inuk ataaseq, kisimiittoq, meerartaqanngitsoq. Ilanngaassivimmut aningaasarsiat 15.000 koruunit akilerneqarput. Akiligassat katillugit 14.300 koruuniupput. Isertitat aningaasartuutit ilanngaatigalugit taamaalilluni 700 koruuniupput. Aningaasanut atorsinnaasanut annertussusiliussaq 4.000 koruuniuvoq, tamatumalu kingunerisaanik innuttaasup isertitat 4.000 koruunit tigussavai aamma 10.300 koruunit akiligassanik pingaarnersiulluni tulleriinnilersugaasunik akiliinissamut atorineqassapput.

Assersuut 2: Inuk ataaseq, 20-nik ukiulik, meerartaqanngitsoq, 2.500. koruuninik isertitaqarpoq. Akiligassat katillugit 2.000 koruuniupput. Aningaasanut atorsinnaasanut annertussusiliussaq 4.000 koruuniunerata kingunerisaanik inuup isertitani 2.500 koruunit tamaasa tigussavai.

Imm. 2-mut

Siunnersuutigineqarpoq ilinniartunut, ilinniarnermusiassanik tigusaqartartunut, aningaasat atorsinnaasat appasinnerutillugit aalajangersarneqassasut. Aalajangersakkami aamma ilinniartut nunanit allaneersut, Kalaallit Nunaanni najugaqalersimasut, kisianni Ilanngaassivik

aqqutigalugu tunniunneqartanngitsunik nunanit allanit ilinniarnermusiaqartut imaluunniit legat-inik pissarsisimasut, pineqartunut ilaatinneqassapput.

Imm. 3-mut

Siunnersuutigineqarpoq aningaasat atorsinnaasat meeqqamut 18-it inorlugit ukiulimmut, inoqutigiinni taakkunani ilaasumut, ataatsimut qaammammut 1.600 koruuninik qaffanneqassasut. Siunnersuummi § 13-imi, aningaasat atorsinnaasat qanoq angajoqqaat akornanni agguarneqassanersut, maleruagassat erseqqinnerusut aalajangersarneqarput.

Imm. 4-mut

Innuttaasut inuunermi inissisimanertik pissutigalugu aningaasat atorsinnaasut qaffanneqarnissaat pisariaqartillugu pisoqarsinnaavoq, assersuutigalugu peqqiilliornermut tunngasut pissutigalugit. Tamanna assersuutigalugu pisinnaavoq, inuk innarluuteqarnermut tapinik tiguisarnissamut pisinnaatitaappat.

Taamaattumik kommunalbestyrelsi aningaasat atorsinnaasat qaffanneqarnissaat pillugu aalajangiisinaanissamut piginnaatinneqarpoq.

Imm. 5-imut

Aningaasat atorsinnaasat pisut ilaanni qaffasinnerusinnaasut pillugu maleruagassanik Naalakkersuisut aalajangersaanissamut aalajangersakkami imm. 6-imi piginnaatinneqarput. Taamaattumik kommunalbestyrelsi maleruagassat Naalakkersuisunit aalajangersarneqartut malillugit aningaasat atorsinnaasat qaffanneqarnissaat pillugu aalajangiinissamut piginnaatinneqarpoq. Assersuutigalugu nammineq ineqarnermut aningaasartuutit pissutigalugit aningaasat atorsinnaasat qaffanneqarsinnaapput.

Imm. 6-imut

Siunnersuutigineqarpoq Naalakkersuisut aningaasat atorsinnaasat qaffanneqarnissaannik akuersisarnermut maleruagassanik erseqqinnerusunik aalajangersaanissamut piginnaatinneqassasut.

Siunnersuutigineqarpoq, assersuutigalugu innuttaasoq pisortat aqqutigalugit ineqartinneqanngippat, aningaasat atorsinnaasat qaffasinnerunissaat pillugu maleruagassanik Naalakkersuisut aalajangersaasinnaapput. Nammineq ineqarnermut aningaasartuutit Ilanngaassivik aqqutigalugu akilersinneqarsinnaannginnerat eqqarsaatigalugu aalajangersagaq isigineqassaaq. Taamaattumik tamatumunnga taarsiullugu siunnersuutigineqarpoq aningaasat atorsinnaasat ineqarnermut aningaasartuutit uppernarsaatitaqartut, innuttaasup namminersortumit attartukkamik inigisamini akiliutigisartagaasa annertoqataannik qaffanneqarsinnaassasut. Aalajangersagaq aamma pisuni assingusuni allani atorneqartassasoq eqqarsaatigineqarsinnaavoq.

Tamanna assersuutigalugu tassaasinnaavoq innuttaasoq sapigaqarnini pissutigalugu immikkut nerisaqarnissamik imaluunniit innarluuteqarnini pissutigalugu il.il. pisariaqartitsippa aningaasanik atorsinnaasanik amerlanerusunik atugassaqartikkumallugu annertunerusumik atugassaqartinnissaa pillugu maleruagassanik aalajangersaanissaq.

Naalackersuisut tamatuma saniatigut aningaasat atorsinnaasat qanoq aalajangersarneqartassanersut aammalu taakkununga killissanut maleruagassanik aalajangersaasinnaapput.

Kommunit aalajangigaat Ilangaassivimmi periutsimi assigiiaartumik nalunaarsorneqarnissaat pingaaruteqarpoq. Taamaattumillu akilikkat nuunneqarnerinik suliarinninnermi Ilangaassivimmi periutsimi paasissutissat qanoq atorneqarsinnaanissaat siunertaralugu aalajangikkat qanoq nalunaarsorneqarsinnaanerat pillugu maleruagassanik aalajangersaanissamut Naalackersuisut piginnaatinneqarput. Atuisussat killilersorneqarnissaannut periutsimik ineriartortitsinissaq naatsorsuutigineqarpoq, tamatumani kommunini sulianik ingerlatsisut aalajangikkat inerneru nalunaarsortassallugit.

§ 13-imut

Meeqqanut 18-it inorlugit ukiulinnut aningaasat atorsinnaasat qanoq angajoqqaat akornanni agguarneqassanersut, aalajangersakkami maleruagassiivigineqarpoq.

Imm. 1-imut

Angajoqqaatut oqartussaasut arlaat ataaseq meeqqap najugaani najugaqarsimanngippat, aningaasat atorsinnaasat qanoq agguarneqarnissaannut tunngaviusut inatsimmi aalajangersarneqassasut siunnersuutigineqarpoq. Taamatut pisoqarnerani meeraq angajoqqaat arlaanni najugaqartutut nalunaarsorsimanersooq apeqqutaassaaq.

Imm. 2-imut

Meeraq angajoqqaaminiinngitsoq allani oqartussanit inissinneqarsimatillugu, aningaasat atorsinnaasat qaffasinnerusut meeqqamik paarsisunut tutsinneqassapput.

Imm. 3-imut

Meeraq ulloq unnuarlugu paaqqinniffimmut inissinneqarsimappat, aningaasat atorsinnaasat atorunnaassasut, siunnersuutigineqarpoq.

Imm. 4-imut

Aningaasat atorsinnaasat meeqqanut tunngassuteqartut angajoqqaap aappaanut nuutinneqarsinnaasut, angajoqqaat qinnutigisinnaassagaat siunnersuutigineqarpoq. Qinnuteqarneq akileraartarnermut ingerlatsiviup innersuussutigisaatut akileraartarnermut ingerlatsivimmut tunniunneqassaaq.

§ 14-imut

Siunnersuutigineqarpoq katissimallugu aappaasup aningaasat atorsinnaasani tamaasa imaluunniit ilai, katissimallugu aapparminut nuunnissaannut periarfissaqassasoq.

Aalajangersakkami katissimallutik aappariinnut aningaasat atorsinnaasat avinneqarsimanerannut tunngassuteqarluni aammalu aningaasat atorsinnaasat meeqqanut attuumassuteqartortaannut qaffaanermut tunngassuteqarani, § 13, imm. 4-imi aalajangersakkamit allaanerussuteqarpoq.

Assersuutigalugu katissimallutik aappariit aappaata inoqutigiinni isertitat tamakkerlugit isertitarippagit, katissimallutik aappariit aappaa angerlarsimaannartuulluni, aalajangersagaq atorneqarsinnaavoq. Aalajangersakkami aningaasat atorsinnaasat katissimallutik aappriit aappaanut isertitaqartuusumut nuutinneqarnissaa qinnutigineqarsinnaavoq. Nuussisinnaaneq atornerlunniarneqarsimappat, akileraartarnermut ingerlatsiviup qinnuteqaat itigartissinnaavaa.

§ 15-imut

Siunnersuutigineqarpoq aningaasat atorsinnaasat Inatsisartut inatsisaanni aalajangersagaasut, Naatsorsueqqissaartarfiup nalimmassaanermut aaqqiissutissamut naleqqersuutaanut procentiliussaq tunngavigalugu ukiumoortumik iluarsineqartassasut.

§ 16-imut

Imm. 1-imut

Siunnersuutigineqarpoq innuttaasut kommunimit aningaasaqarnikkut aqunneqartut isertitaat, kommunimut tunniunneqarsinnaasut. Tamatumani siunertarineqarpoq kommunip aningaasat piffissap sivisunerusup ingerlanerani tunniussinnaassagai, assersuutigalugu sapaatip akunnikkaartumik, aammalu aningaasat innuttaasup akiligassaasa allat akilerneqarnissaannut atorsinnaassagai.

Imm. 2-mut

Siunnersuutigineqarpoq, innuttaasooq aningaasaqarnikkut aqunneqartussanngorsimappat, kommunit Ilanngaassivimmi periaatsimit paasissutissanik pissarsisinnaassasut. Kommunit assersuutigalugu ineqarnermut akiliutip akilerneqarnissaata iliuseqarfiginissaanut, periarfissaqarneq taanna atorsinnaavaat.

§ 17-imut

Imm. 1-imut

Akiligassiisup akiligassiisut, tassa imaappoq aningaasanik piunasaqaat, Ilanngaassivimmut akileeqqusissummik elektroniskimik, takuuk § 2, nr. 6, nassiussilluni Ilanngaassivimmut

ilanngutsissavaa. Akiligassiisumit akileeqqusissut, akiligassiisup inatsisit tunngavigalugit innuttaasumut akiligassiisuteqarneranik tunngaveqassaaq, assersuutigalugu attartornermut isumaqatigiissummi isumaqatigiissuteqarnermut tunngasut tunngavigalugit.

Akileeqqusissutit ataasiakkaat akiligassiisutit annertussuseqartariaqanngillat, kisianni akiligassiisut akileeqqusissummut imaluunniit akileeqqusissutinut, akiligassiisumit ilanngutsinneqarsinnaasumut, killissaliisuusaaq.

Assersuut: Akiligassiisut inissiamut qularnaveeqqusiissummut 10.000 koruuninik annertussuseqartumut tunngassuteqarpoq. Akiligassiisoq aamma innuttaasoq isumaqatigiissuteqarput qularnaveeqqusiisut qaammammut 1.000 koruuninik akilersorneqassasoq. Pisumi tassani akiligassiisoq, qularnaveeqqusiisutip tamakkerlugu akilerneqarnissaata tungaanut, qaammatikkaartumik akileeqqusissummik 1.000 koruuninik annertussuseqartumik nassiussisassaaq.

Imm. 2-mut

Akileeqqusissut qaqugukkut tiguneqartut isigineqassanersoq aalajangersakkami maleruagassiivigineqarpoq.

Imm. 3-mut

Siunnersuutigineqarpoq akileeqqusissut, Ilangaassiviup innuttaasoq sinnerlugu isertitanit il.il. innuttaasup tigusassaannit akiligassanik akiliisitsisarnermik aallartitsinissaa sioqqullugu, Ilangaassivimmi minnerpaamik ullorsiutit malillugit ulluni 10-ni periaatsimiitinneqassasoq. Piffissamut killiliusaaq, innuttaasup piumasaqaatip piuneranut imaluunniit aningaasartaasa annertussusaannut akerliliisuteqarnissamut periarfissinneqarnissaa siunertaralugu, aalajangersarneqarpoq.

Akiliisitsinerit ingerlaavartut piffissakkaartullu akilersinneqartarnissaat siunnersuummi pingaarnertut siunertaasoq, kiisalu pisortat digitalimik allakkerisarnermut aaqqiissutissamik atuutsitsilersimanissaaq Ilangaassiviup atuutsinneqalernissaanut tunngavissaatinneqartoq, taamaalillutik innuttaasut pisortanik digitalimik nalunaarutitik tigusaqarsinnaanissaannut, ataqatigiissillugu piffissamut killiliusaaq isigineqassaaq.

§ 18-imut

Imm. 1-imut

Akileeqqusissutit aallaaviatigut qaammatini 3-ni Ilangaassivimmiitinneqarsinnaapput. Qaammatini 3-ni taakkunani Ilangaassiviup akiligassat tulleriiarneqarnissaat aalajangersarneqartoq, takuuk kapitali 5, malillugu isertitanit piffissami innuttaasup tigusassaannit akileeqqusissutip akilersinnissaa isumagissavaa.

Qaammatit 3-t taakkua naaneranni, akileeqqusissut periaatsimi peerneqartoq
Ilanngaassivimmit akiligassiisumut, akilerneqanngitsumik akiligassiisuteqartumut,
elektroniskimik paasissutissat nassiunneqassapput.

Akiligassiisoq tamatumani allatut akiligassiissummik akiliisitsinissamut innersuunneqarpoq.
Tamatuma pisuni amerlanerni akiligassiisup akiligassiisutip pisortanut akiitsut
akilersinniarneqartarnerat pinaveersaartinneqarnissaallu pillugit Inatsisartut inatsisaat
malillugu qitiusumi akiliisitsiniarnermut oqartussat aqutugalugit akilersinniarnissaanik
innersuutissavaa.

Imm. 2-mut

Ilanngaassivimmi akileeqqusissutip akilernissaanut piffissaq eqqorlugu akiliinissamut
piffissamut killiliussaq kingulleq, taassaasoq qaammatip naanera, erseqqissarneqassasoq
siunnersuutigineqarpoq.

Imm. 3-mut

Siunnersuutigineqarpoq akileeqqusissutinut inuussutissarsiornermut tunngasunut
aalajangersimasunut akiliinissamut piffissamut killiliussaq ullunut 30-nut
aalajangerneqassasoq. Tamatuma malitsigisaanik akiligassiisup sumiginnaanermi
piginaatitaaffini siusinnerusukkut atorsinnaalissavai. Pisuni taakkunani sivikinnerusumik
piffissaliinermi siunertaavoq, ilaatigut inuussutissarsiortut akilinngitsuukkanik
akiitsoqalernissaasa pinngitsoortinneqarnissaat.

Aalajangersagaq, akileeqqusissutit innuttaasut inuussutissarsiummik ingerlatsinerannut
tunngassuteqartut siunnersuummi pingaarnersuinermi tulleriinnilersuinermit,
ataqatigiissillugu isigineqassaaq.

Imm. 4-mut

Siunnersuutigineqarpoq akiliinissamut piffissamut killiliussat aalajangersakkami imm. 1-imi
aamma 3-imi aalajangersagaasut inunnut ataasiakkaanut sivikillisinnissaannut
akileraartarnermut ingerlatsivik piginnaatinneqassasoq. Aalajangersakkami
tunngavilersuutigineqarpoq, taamaattoqanngippat assersuutigalugu inunnit Ilanngaassivik
aqutugalugu akilinngitsuukkanik akiitsoqalernissamik eqqarsaateqartut akilinngitsuukkanik
akiitsoqalersinnaanerat aarlerinaateqartussaasoq.

§ 19-imut

Akiligassiisut akiligassaqartumit naammassineqarsimappat, taanna Ilanngaassivik
aqutugalugu akilersinneqarsinnaanngilaq. Tamanna assersuutigalugu tassaasinnaavoq
innuttaasup aningaaserivimmi nuussilluni, aningaasannorlugu imaluunniit allatut iliorluni
Ilanngaassivik avaqqullugu akiligassaq akilereersimagaa.

Taamaakkaluortoq akileeqqusissut nassiunneqarsimappat, pisinnaatitaanani akileeqqusissuteqarneq pillugu § 41-mi aalajangersagaq taamatuttaaq atorneqarsinnaavoq.

§ 20-mut

Isertitat akileeqqusissutit takkuttut akiligassanngortullu akilernissaannut ingerlaavartumik atorneqassapput. Qaammammi atasimi akileeqqusissutip ilaa kisimi akilerneqarpat, aningaasartaata ilaa sinneruttoq akilersinneqartussatut uninngatinneqassaaq, aammalu isertitanit piffissami innuttaasup tigusassaannit tullernit akilersinniarneqassalluni. Akileeqqusissutip aningaasartaa sinneruttoq taamaalilluni kingusinnerusukkut akilersinneqartussatut uninngatinneqassaaq. Akileeqqusissut annerpaamik qaammatini 3-ni akilersinneqartussatut Ilanngaassivimmiitinneqarsinnaavoq, taamaattoq inuussutissarsiutigalugu akileeqqusissutit taamaallaat ulluni 30-ni Ilanngaassivimmiitinneqarsinnaapput, takuuk § 18, imm. 1 aamma 3.

§ 21-mut

Imm. 1-imut

Aalajangersakkami, akiligassiisummut arlallit akiliisussaallutik akileeqqusissutit, pineqarput. Oqaatigineqassaaq akileeqqusissummi arlallit akiliisussaallutik amerlasuunik pisoqarnissaa naatsorsuutigineqanngimmat.

Akiligassiisummut innuttaasut arlallit akiliisussaallutik taamatut pisoqartillugu, akiligassiisup akileeqqusissut innuttaasunut akiliisussaasunut tamanut tamakkiisumik akilerneqartussatut ilanngutsissavaa. Taamaalilluni akileeqqusissut kimut sammitinneqarnerseq, akiligassiisooq aamma akiliisussat isumaqatigiisutigisariaqarpaat.

Akiligassiisup akiligassiisut ataaseq arlaleriarluni akilersinniartannginneranik, aalajangersagaq malitseqassanngilaq. Akiligassiisup marloriaammik akiligassiisummik akiliisitsisimasup aningaasat annertuallaamik akilersinneqarsimasut utertillugit akilissavai.

Imm. 2-mut

Siunnersuutigineqarpoq, akiligassiisut Ilanngaassivimmik akiligassiinernik arlalinnik akiliisussaqartunik akiliisitsinermut atuinissaannut maleruagassanik aalajangersaanissamut Naalakkersuisut piginnaatinneqassasut. Tassani tamatuma saniatigut ilaatinneqarput, innuttaasup aappaa Ilanngaassivimmi akiliisarfimmi pineqartunut ilaatillugu aappaalu pineqartunut ilaatinngu, pisunut maleruagassat. Pisumi tassani akiligassiisooq, nammaqatigiillutik akiliisussaappata, inunnut marlunnut akiligassamik akiliisitsisinnaavoq.

Taamaattumik nalunaarummi il.il. taamatut akiliisitsinermut periaasissaq aalajangersarneqassaaq, taamaalilluni ilaatigut aningaasartaasa 2-riarluni akilersinneqannginnissaat qulakkeerneqassalluni.

§ 22-mut

Imm. 1-imut

Akiliinernut atuuttut assigalugit, Ilanngaassivimmit akiligassaqtup paatsuugassaangitsumik kinaassusersineqarsinnaanissaanut, akileeqqusissutit tamarmik inuup CPR-normuanut atatinneqarnissaat qitiulluinnarpoq.

Imm. 2-mut

Siunnersuutigineqarpoq akileraartarnermut ingerlatsiviup akileeqqusissutinik nalunaarutiginninnermi taakkualu nassiunneqartarnerannut teknikkikkut piumasaqaatit erseqqinnerusut aalajangersassagai. Akileraartarnermut ingerlatsiviup tamatuma saniatigut assersuutigalugu akileeqqusissutit fil-ini suni, immikkoortiterlugit nassuiakkani imaluunniit qanoq iluseqartillugit nassiunneqartassanersut, aalajangersarsinnaassavaa.

Akileeqqusissutit minnerpaamik imarisassaattut naatsorsuutigineqartariaqarput: Innuttaasup CPR normua, akiligassiisup (Oqartussaasup imaluunniit suliffeqarfiup nassiussisup) id-normua akiligassiisutit allagartaata normua imaluunniit akiligassamut nassuiaat taamaaqataanik paatsuugassaangitsoq, akiligassiisutit suussusaanut nassuiaat, assersuutigalugu ineqarnermut akiliummik akiliisitsinissaq.

Imm. 3-mut

Siunnersuutigineqarpoq akiligassiisut Ilanngaassivimmik atuinerannut suleriaasissat ilitsersuutillu akileraartarnermut ingerlatsiviup aalajangersassagai. Suleriaasissani pineqarpoq assersuutigalugu ilanngutsinnermut, ilaajunnaarnermut, kukkunernik naqqiinernut il.il. suleriaasissat. Akileraartarnermut ingerlatsiviup tamatuma saniatigut ilitsersuutit aalajangersarsinnaavai aammalu Ilanngaassivimmik atuineranut ileqqorissaarnissaq nassuiarsinnaallugu.

Imm. 4-mut

Aalajangersakkami aalajangersarneqarpoq akileraartarnermut ingerlatsiviup atugassarititaasuni allannguutit pillugit minnerpaamik qaammatit pingasut sioqqullugit ilimasaarluni, akiligassiisut ilimasaartassagai.

§ 23-mut

Imm. 1-imut aamma 2-imut

Aalajangersakkami, akileeqqusissutit, tamaasa akilernissaannut isertitat naammangippata, qanoq tulleriinnilerlugit akilersinneqartassanersut tunngaviusussat aalajangersarneqarput.

Taamatut pisoqarnerani siunnersuutigineqarpoq akileeqqusissut pingaarnersiuiinnermi salliutinneqartoq, akileeqqusissummit pingaarnersiuiinnermi appasinnerusumiitinneqartumit,

siulliullugu akilersinneqassasoq. Imm. 2-mi siunnersuutigineqarpoq, akileeqqusissut assigiimmik pingaarnersiuiineri inissisimappat, akileeqqusissummit nutaanerusumit akileeqqusissut pisoqaanerusoq siulliullugu akilersinneqassasoq.

Assersuut: Qaammat 1-imi innuttaasumut akileeqqusissutit makkua tiguneqarput (pingaarnersiuiinerit assersuutaannaapput):

Qaammat 1. Ilanngaassivimmi akileeqqusissut
(ungaluusersimasumi pingaarnersiuiineri
inissisimanera)
Januarimut ineqarnermut akiliut (1)
Januarimut innaallagissamut akiligassaq (2)
Januarimut eqqaavilerinerimut akiligassaq (3)

Taamaallaat ineqarnermut akiliutip akilernissaanut isertitat naammapput. Februaarip qaammataani, januarimi akileeqqusissutini akilerneqanngitsunik Ilanngaassivimmiittoqarpoq. Tamatuma saniatigut nutaanik akileeqqusissutini takkuttoqarsimavoq. Ataatsimut katillugit akileeqqusissutit makkuupput:

Qaammat 2. Ilanngaassivimmi akileeqqusissutit
(ungaluusersimasumi pingaarnersiuiineri
inissisimanera)
Januarimut innaallagissamut akiligassaq (2)
Januarimut eqqaavilerinerimut akiligassaq (3)
Februarimut ineqarnermut akiliut (1)
Februarimut innaallagissamut akiligassaq (2)
Februarimut eqqaavilerinerimut akiligassaq (3)

Qaammat 2-mi isertitat akiligassat pingasut akilernissaannut naammangillat. Taamaattumik akileeqqusissutit imatut tulleriinnilerlugit akilersinneqassapput: Februarimut ineqarnermut akiliut (1), januarimut innaallagissamut akiligassaq (2) aamma innaallagissamut akiligassaq, februarimut (2). Qaammatip tulliani akileeqqusissutit Ilanngaassivimmi akilersinneqartussat makkuupput:

Qaammat 3. Ilanngaassivimmi akileeqqusissutit
(ungaluusersimasumi pingaarnersiuiineri
inissisimanera)
Januarimut eqqaavilerinerimut akiligassaq (3)
Februarimut eqqaavilerinerimut akiligassaq (3)
Martsimut ineqarnermut akiliut (1)
Martsimut innaallagissamut akiligassaq (2)
Martsimut eqqaavilerinerimut akiligassaq (3)

Innuttaasoq eqqaavilerinerimut akiligassat marluusut tamaasa akilernissaannut aamma naammattunik akissaqanngippat, januarimut tunngasoq eqqaavilerinerimut akiligassaq

Ilanngaassivimmit peerneqassaaq, takuuk § 19. martsimut ineqarnermut akiliut taamaalilluni januarimut eqqaavilerinermut akiligassamit siulliullugu sulii akilersinneqartussaavoq.

§ 24-mut

Akileeqqusissutit aamma akileraarutit pingaarnersiuiineri tulleriinnilersorneqarneranni malitassat § 24-26-mi aalajangersarneqarput.

§ 24-mi siunnersuutigineqarpoq isertitanit akileraaruteqaataasussanit akileraarutit, akileeqqusissutinit il.il. allanit qanorluunniit iluseqartunit tamanit, siulliullugit naammassineqartassasut. Akileraarutaagallartuni pineqarput aningaasarsianit akileraarutit B-tut iluseqartut. Tamatuma saniatigut akileraarutinit tapissanut akiligassat il.il., taakkua akileraaruserinermik ingerlatsineq pillugu Inatsisartut inatsisaat malillugu siumoortumik akileraaruteqarnermut ilanngullugit akilersinneqarsinnaappata, akilersinneqassapput.

Aalajangersakkami taamaallaat aningaasarsianit akileraarutit ilaatinneqarput. Akileraarutinit akitsuutinillu allatut ilusilinnik akiliisitsisarneq, soorlu motorinut akitsuutit, pingaarnersiuiinerup tulleriinnilersorneqarnerani nalinginnaasumi ilaatinneqarput. Aalajangersakkami pingaartumik akileraarutit B-t ilaatinneqarput, tassami siunertaammat maannakkut maleruagassat periaatsillu, sulisitsisut il.il. unerartitsisussaataasut akileraarutinit A-nik unerartitsisarnerisa akiliisarnerisalu, attatiinnarneqarnissaat.

Akileraarutit B-t tassaapput B-tut isertitat, nassuiarneqarneranni isertitanut tamaginnut, aallaaviatigut A-tut isertitaanngitsunut tunngassuteqartut, tunngavigalugit naatsorsorneqartartut. Akileraarutit B-t inuup siumoortumik nalunaarsuina tunngavigalugu naatsorsorneqartarput aammalu aningaasarsianit akileraarutit pillugit Inatsisartut inatsisaat malillugu 10-ni akilersorneqartussatut akilersinneqartussaallutik.

§ 25-mut

Imm. 1-imut

Siunnersuutigineqarpoq akiligassiissutit suunerisa assigiinngitsut, innuttaasup pisortanit il.il. tigusinnaasaasa, pingaarnersiorneqartarnerat inatsimmi aalajangersarneqassasoq.

Imm. 1, nr. 1-14-imi aalajangersakkami pingaarnersiuiineri tulleriinnilersuineq allatorneqarpoq. Tamatuma saniatigut akiligassiissutit suut allanit siulliullugit akilerneqarnissaannut tunngaviusut pillugit § 23-mut nassuiaatini assersuut innersuussutigineqarpoq.

Pingaarnersiuiinissap siunnersuutigineqartup aalajangersarneqarnerani, akiligassiissutit ataasiakkaat inuunerannut qitiulluinnartutut nalilerneqartut, pingaartinneqarput, tassalu

ineqarneq, innaallagissamik, imermik kiassarnermillu pilersuineq kiisalu meeqqanik paaqqinninneq.

Ineqarnermut akiliutit imm. 1, nr. 1-imi aalajangersakkami ilaatinneqarput. Assersuutigalugu kiassarnermut imermullu atuinermut akiligassat ineqarnermut akiliummut ilaatillugit akileqquneqarnerani aningaasat taakku salliutillugit aamma akileqquneqarsinnaapput.

Imm. 1, nr. 2-imi aalajangersakkami innaallagiamut, imermut kiassarnermullu akiliisarneq inuussutissarsiornermut tunngassuteqanngitsoq, pineqartunut ilaatinneqarpoq. Tamatuma saniatigut akiliisitsinerit tassunga tunngassuteqartut akilersinneqarsinnaapput, assersuutigalugu uuttuummut akiliut aamma ilanngutsinnermut atuiunnaarnermullu akiliut. Innaallagiamut, imermut kiassarnermullu akiligassanik isumaginninnermut inoqutigii atuinerat apeqqutaavoq aammalu akigititanik Naalakkersuisunit akuerineqarsimasunik aallaaveqarluni.

Imm. 1, nr. 3-imi aalajangersakkami ulluunerani paaqqinnittarfimmu akiliinerit pineqartunut ilaatinneqarput. Akigititat meeqqanut suli atualinngitsunut perorsaanikkut ineriikkiartuutaasumik ulluunerani neqeroorutitut akiliuteqartarneq pillugu Namminersorlutik Oqartussat Namminersorlutik Oqartussat nalunaarutaat naapertorlugu kommunalbestyrelsimit aalajangersarneqartarput.

Imm. 1, nr. 4-imi aalajangersakkami inuussutissarsiuutigalugu piniarnermut akuersissut pineqartunut ilaatinneqarpoq. Tamatumunnga akigititat inuussutissarsiuutigalugu piniarsinnaarnermut allagartat pillugit Namminersorlutik Oqartussat nalunaarutaat naapertorlugu Piniarnermut Naalakkersuisumit aalajangersarneqartarput.

Imm. 1, nr. 5-imi aalajangersakkami eqqaavilerinnermut anartarfilerinnermullu aaqqissuussinnermut akilisarnerit pineqartunut ilaatinneqarput. Eqqagassanik eqqaasarneq pillugu nalunaarut naapertorlugu akigititat kommunalbestyrelsimit aalajangersarneqartarput.

Imm. 1, nr. 6-imi aalajangersakkami akilersuutit pineqarput (meeqqanut akilersuutit).

Meeqqanut akilersuutit aallaaviatigut angajoqqaamit (akilersuisussaataasooq) angajoqqaap aappaanut (akilersuutinik pisussaataasooq) akilerneqartussaapput. Angajoqqaq akilersuisussaataasooq akiliinngippat, akilersuutinik pisussaataasup meeqqanut akilersuutit kommunimit siumoortumik tigusinnaavai. Taamatut pisoqarnerani akilersuisussaataasumut piumasqaammi kommuni akilersuisitsissaaq.

Imm. 1, nr. 7-imi aalajangersakkami ilinniagaqarnerisutit pillugit Inatsisartut inatsisaat malillugu ilinniartunut taarsigassarsiarititat utertillugit akilerneqarnissaannik piumasqaatit pineqartunut ilaatinneqarput.

Imm. 1, nr. 8-imi aalajangersakkami sullissinernut kommunip atuisunit akiliuteqarnissaannit pilersuinnermut akiliutissat pillugit akiliisitsisarneq pineqarpoq. Taanna assersuutigalugu tassaasinnaavoq najukkamut uppernarsaat imaluunniit inimik nuannattarfimmik attartorneq.

Aalajangersakkami piumasaqaatit pisortanit sullissinernik pilersuinnermut tunngasut ilaatinneqarput. Akiliutinik, assersuutigalugu oqartussat suliarinninnerannut, akiliinerit, taamaalillutik aalajangersakkami matumani ilaatinneqanngillat.

Akiligassiinerit akileraarutinit akitsuutinullu, § 25-mi pineqartunut ilaanngitsunut, allatut ilusilinnut tamanut tunngassuteqartut, imm. 1, nr. 9-imi aalajangersakkami ilaatinneqarput. Taakkua assersuutigalugu tassaasinnaapput motoorinut akitsuutit, aningaasaatinit iluanaarutinit aalajangersimasunik akileraarusiinnermut tunngatillugu akileraarutinit piumasaqaatit, allaffissornikkut akiliisitsinerit innuttaasup akuerisimasai, kiisalu akileraarutinit tapissanut akiligassanut il.il. piumasaqaatit.

Imm. 1, nr. 10-mi aalajangersakkami Namminersorlutik Oqartussanit, kommuninit aamma taakkua ataanni sullissivinnit piumasaqaatit atuuttut allat tamarmik pineqartunut ilaapput. Taakkua tassaasinnaapput akiliutit, akileraartarnermut suliaasaqarfiup avataani allaffissornikkut akiliititsinerit aamma piumasaqaatit allat. Taamaattoq aalajangersakkami piumasaqaatit innuttaasup inuussutissarsiorluni suliaqarneranut tunngassuteqarnerusut, piuneqartunut ilaatinneqanngillat.

Imm. 1, nr. 11-14 naapertorlugit inuussutissarsiortoq namminersortoq, akiligassanik pineqartup inuussutissarsiutit ingerlataanut tunngassuteqartunik, tigusaqarsinnaavoq. Assersuutigalugu innuttaasoq kommunimit inuussutissarsiortunut attartortittakkami attartorsimasinnaavoq imaluunniit innuttaasoq inuussutissarsiornikkut ingerlatanut atasunik innaallagissamik, imermik kiassarnermillu atuisuusinnaavoq.

Akiligassiisup akileeqqusissut inuussutissarsiordermut tunngassuteqartoq pineqartoq allassavaa.

Taakkununga marluusunut tunngasunik akiliisitsiniarnermi akiligassiisut pingaarnertut, tassalu 50%-imit annertunerusumik, inuussutissarsiordermut atuinermut tunngassuteqarnerusut pingaartinneqartariaqarpoq. Nalornissuteqarnermi akiligassiisut, inuussutissarsiortunut akiligassiisutinit maleruagassat malillugit suliarineqartariaqarpoq.

Imm. 2-mut

Siunnersuutigineqarpoq pingaarnersiunermi tulleriinnilersuinnermut tapertaasinnaasunik maleruagassanik erseqqinnerusunik aalajangersaanissamut Naalakkersuisut piginnaatinneqassasut. Maleruagassani taamaattuni piumasaqaatit imm. 1, nr. 1-14-imi erseqqissumik taaneqartut pingaarnersiunermi tulleriinnilersugaanerit allanngortinneqarsinnaanngilaq, kisianni piumasaqaatit allaanerusut allat sumi

inissinneqassanersut erseqqissaannarneqarsinnaalluni. Alloriarnerit 14-it aalajangersakkami imm. 1-imi naatsorsuutigineqartut saniatigut alloriarnernik nutaanik pilersitsisoqarsinnaangilaq.

§ 26-mut

§§ 24-25 malillugit akileraarutit aamma akiligassiisutit akilerneqareerpata, aammalu innuttaasoq suli siunnersuummi §§ 12-14 malillugit aningasanit atorsinnaasanit annertunerusunik isertitaqarpat, innuttaasup isertitaannit akiitsut akilersornissaat pillugu qitiusumi akiliisitsiniarnermut oqartussanut nammineq kajumissutsimik isumaqatigiissummut aamma pisortanut akiligassiisunut isumaqatigiissutinut, aningaasanik akiliisitsisisoqarsinnaassaaq.

§ 27-mut

Imm. 1-imut

Innuttaasunut Ilangaassivik aqutiginagu isertitanik innersuussivigineqartartunut, taamaattumillu Ilangaassiviup akileeqqusissutinik tiguneqartunik akiliisitsinissamut atorsinnaasaannik, ingerlaavartumik isertitaqartussaangitsunut, Ilangaassivik naleqqutissanngilaq.

Pisuni taakkunani innuttaasup akiitsuisa akilinngitsuukkat annertusiartuinnarsinnaanerini Ilangaassivik kinguneqaannassaaq, tassami akiligassiisup sumiginnaanermi piginnaatitaaffimminik atuisinnaalernissaanut akileeqqusissutit qaammatini pingasuni Ilangaassivimmiissinnaapput. Ilangaassivik aamma inuk akiitsunik akilinngitsuugaqalerpat, tamatumalu kingorna Kalaallit Nunaat qimallugu nuuppat, atornerluisinnaanermik aarlerinaateqalersitsisinnaassaaq.

Ilangaassivimmit isertitanut paasissutissat kiisalu innuttaasumut akileraartarnermi paasissutissat il.il. tungavigalugit akileraartarnermut ingerlatsivik naliliippat, innuttaasoq aalajangersakkami nr. 1-imit 3-mut nassuiarneqartutut inissisimalersoq, maleruagassat Inatsisartut inatsisaanni §§ 28-30-mi aalajangersagaasut atuutissasut, Akileraartarnermut ingerlatsivik aalajangersinnaavoq.

Imm. 1, nr. 1-imi aalajangersakkami, innuttaasut pingaartumik isertitanik Ilangaassivik aqutigalugu innersuunneqarsinnaangitsunik tigusaqartartut, pineqarput. Pineqartut tassaanerupput inuussutissarsiortut namminersortut.

Inuussutissarsiortut namminersortut ilisarnaatigaat nammineq akilikkaminnik annaasaqaatigisinnaasaminnillu suliassanik suliaqartarneq, kiisalu sulisitsisumi sulisutut inissisimanginneq. Inuussutissarsiortut namminersortut inuussutissarsiornermi suliaminnit

sinneqartoorutaat akileraaruserneqartarput. Isertitat inuussutissarsiortut namminersortut tigusartagaat tassaanngillat isertitat A-t, tamatumalu kingunerisaanik isertitat aallaaviatigut Ilangaassivik aqputigalugu tunniunneqartaralik.

Taamaattoq inuussutissarsiortumut namminersortumut tunniussineq pineqarnersoq apeqqutaatinnagu, Namminersorlutik Oqartussanit, kommuninit il.il. tunniussassat Ilangaassivik aqputigalugu tunniunneqartarput, takuuk § 5, imm. 1. Taamaattumik inuussutissarsiortup isertitamit annertunerpaartaat pisortanit pissarsiarisarpagit, innuttaasoq nr. 1-imi pineqartunut ilaassanngilaq.

Aalisartut piniartullu tamatuma saniatigut nr. 1-imi pineqartunut ilaassanngillat, taassami tunisinermit aningaasarsiat Ilangaassivik aqputigalugu nalinginnaasumik innersuunneqassammata, takuuk Inatsisartut inatsisaanni § 4, imm. 1, nr. 6.

Imm. 1, nr. 2-mi aalajangersagaq, assersuutigalugu aningaasarsiaqartooreerluni inuussutissarsiortoq namminersortunngornerup malitsigisaanik, innuttaasup isertitaasa allanngorneranni atorneqartussatut eqqarsaataavoq.

Imm. 1, nr. 3 innuttaasut Kalaallit Nunaat qimallugu nuuttut, pisortanut akiitsoqalerlutik Ilangaassivimmik atonerluillutik aningaasannanniarsinnaanerat annikillisarnerlutik, siunnersuutigineqarpoq. Taamaattumik innuttaasoq nunarput qimallugu nuussappat, akileraartarnermut ingerlatsivik aalajangersagaq malillugu aalajangiisinaavoq. Tamanna assersuutigalugu, innuttaasoq Kalaallit Nunaanni najugaqarluni nalunaarsorsimajunnaarpat, pisinnaavoq.

§ 28-mut

Imm. 1-imut.

§ 27 malillugu aalajangiinermi sunniutaasusaaq qitiunerpaajusoq tassaavoq § 18-imi qaammatinik 3-nik maleruagassaqarnerup atorneqannginnissaa. Tamatuma kingunerisaanik, akiligassiisup sumiginnaanermi piginnaatitaaffiit il.il. atorsinnaalernissaannut, akileeqqusissutit Ilangaassivimmi qaammatini 3-ni uninngatinneqarsinnaassanngillat. Siunnersuummi aningaasat atorsinnaasat pillugit maleruagassat taamatuttaaq atuutissanngillat, tamatuma kingunerisaanik innuttaasoq aningaasanik atorsinnaasanik pisinnaatitaassanngilaq. Aningaasartat taakkua pisumi tassani pingaaruteqassanngillat, tassami innuttaasup isertitanik Ilangaassivik aqputigalugu tunniunneqartussaannngitsunik, tigusisartuugajussammat.

Imm. 2-mut

Siunnersuutigineqarpoq innuttaasoq qaammatikkaartumik akiligassiisummik tigusaqartassasoq, tassani akileeqqusissutit Ilangaassivimmut ilanngutsinneqarsimasut tamarmik pineqartunut ilaassallutik. Innuttaasup Ilangaassivimmit akiligassiisut akiliisarnermut sullissivimmut ilanngutsissinnaassavaa.

Imm. 3-mut.

Aalajangersakkami siunnersuutigineqartumi aalajangersarneqarpoq akiliinissamut qaammatsiutit malillugit ullut 14-it piffissamut killiliunneqassasut.

§ 29-mut

Aalajangersakkami inuk kapitali 6-imi pineqartunut ilaasoq, qaammammut akiligassiissutip ilaannaanik akiliisimatillugu pisoqartarneri pineqarput.

Taamatut pisoqarnerani pingaarnersiunerminni tulleriinnilersuineq inatsimmi §§ 24-26-mi aalajangersarneqartoq malillugu, akiliineq akiligassiissutinut il.il. akiliutissatut isigineqassapput.

Akileeqqusissutit sorliit akiliinermi matussuserneqassanersut akiligassaqartoq immikkut isummersimangippat, tamanna atuutissaaq.

§ 30-mut

Akileeqqusissutit akiliinissamut killiliussap naanerani akilerneqanngitsut Ilangaassivimmit peerneqassapput, taamaattumillu akiligassiisut aningaasartat allatut akilersinnissaannut innersuunneqassapput. Tamatuma kingunerisaanik akiligassiisup sumiginnaanermi piginnaatitaaffiit il.il., akiligassiissutinut ataasiakkaanut inatsisini tunngavissanut tunngatillugu atuuttut, atorsinnaalissavai.

Akilerarutinut B-nut tunngatillugu, tamanna assersuutigalugu akileraruserinermik ingerlatsineq pillugu Inatsisartut inatsisaat malillugu ernianik akiliinissamik malitseqarsinnaavoq.

§ 31-mut

Imm. 1-imut

Ilangaassivimmit isertitanik il.il. tunniussinerit innuttaasup aningaaserivimmi kontuanut tunniussinikkut pissapput. Aningaasat kontumut sorlermut nuunneqassanersut, akiliisussaataasup akiliinermi atillugu allassavaa. Allassimasoqanngippat aningaasat kontumut pisortat tiguneqartussanngorlugit tunniussivigisinnaasaannut nuunneqassapput.

Pisortanut atugassamik aningaaserivimmi kontoqarnissaq pillugu maleruagassat atuutsinneqalissasut naatsorsuutigineqarnera eqqarsaatigalugu aalajangersagaq isigineqassaaq, taakkua malitsigisaannik innuttaasut ataasiakkaat tamarmik aningaaserivimmi kontumik, pisortat tunniussivigisinnaasaannik, nalunaarsuisimassasut piumasqaataalluni. Aningaaserivimmik pisortani atugassamik aqqissuussinermit atuutsitsilerneq taamaalilluni,

akileraartarnermut ingerlatsiviup sukkulluunniit tunniussinissamik sunniuteqartumik innuttaasumut tunniussisinaanissaanut, pingaaruteqarpoq, taamaalillunilu Ilangaassiviup atuutsinneqalernissaanut pisariaqarluni.

§ 32-mut

Imm. 1-imut

Siunnersuutigineqarpoq innuttaasoq Ilangaassiviup nittartagaanut isersinnaassasoq. Nittartagaq Sullissivik.gl-imut inissinneqassasoq naatsorsuutigineqarpoq. Siunertaavoq nittartakkami akileeqqusissutit, kiisalu maannakkut aammalu oqaluttuarisaanerani isertitanut paasissutissat utaqqisut akilernerqartullu aammalu isertitanut paasissutissat nutaat pisoqqallu takuneqarsinnaassasut. Teknikkikkut periarfissat tamanna ajornartinngippassuk, assersuutigalugu innuttaasup e-mail-ikkut imaluunniit sms atorlugu akileeqqusissutit nutaat tiguneqartut pillugit nalunaarfigineqarsinnaanera periarfissaqassaaq.

Nittartakkamit akileeqqusissutit ataasiakkaat takuneqarsinnaassapput, aammalu akiligassiisup tungaaniit akiligassaq taassuma ataaniittoq takuneqarsinnaassalluni.

Imm. 2-mut

Aallaaviusooq tassaavoq innuttaasup Ilangaassivimmut isersinnaanera elektroniskiussasoq. Taamaattoq innuttaasoq qaammatikkaartumik naatsorsukkanik aamma tigusaqartartussaavoq. Nassiussineq Pisortani Digitalimik Allakkerineq pillugu Inatsisartut inatsisaannut imaluunniit allakkerinermut aaqqiissutissaq malillugu pissaaq.

Imm. 3-mut

Innuttaasup Ilangaassivimmit paasissutissanik sunik pissarsinissamik periarfissaqassanersut pillugu maleruagassanik erseqqinnerusunik aalajangersaanissamut Naalackersuisut piginnaatinneqarput. Naatsorsuinerit il.il. pappialanngorlugit assilinerinik nassiussivigineqaaqqinnissamut akiliutinik akiliisarneq pillugu maleruagassanik Naalackersuisut aalajangersaasinnaapput.

Innuttaasoq akiliinerup naatsorsorneqarnerata assilineranik elektroniskimik nassiussivigineqarnissamik sukkulluunniit qinnuiginnissinnaavoq.

§ 33-mut

Imm. 1-imut

Akiliutinik nuussinernik ingerlatsinermut atorneqartussanik akiligassiisup aamma Ilangaassivimmi periaatsip akornanni paasissutissanik paarlaasseqatigiissoqarsinnaasoq, aalajangersakkami inatsimmi tunngaviliisoqarpoq. Paasissutissat paarlaasseqatigiissutigineqartut inummut aalajangersimasumut tunngassuteqarlutik mianernarsinnaapput.

Paasissutissat akiliutigineqartut ingerlanneqarnissaannut atorneqarsinnaapput. Paasissutissat siunnersuummi matumani siunertanut ilaatinneqanngitsunut atorneqarsinnaanngillat.

Imm. 2-mut.

Ilanngaassiviup eqqortumik isertitanik innuttaasunut il.il. tunniussisinnanissaanut pisariaqartunik kommuninit paasissutissat Ilanngaassivimmut tunniunneqarsinnaanerat, aalajangersakkami inatsimmi tunngavissalernerqarpoq.

Paasissutissat suliarineqarnissaanni siunertarinerqarpoq taakku aningaasat inummut eqqortumut nuunneqarsinnaanissaat kiisalu nuussinerit tiguisisussanit takuneqarsinnaanngorlugit paasissutissinneqartarnissaat.

Kommunip, assersuutigalugu pisortanit ikiorsiissutit pillugit Inatsisartut peqqussutaanni maleruagassat malillugit pisortanit ikiorsiissutinik tunniussisup, tamatuma takussutissiani innuttaasumut nassiunneqartussani allassimanissaa siunertaralugu, aammalu Ilanngaassivimmi tunniussinerup eqqortumik suliarineqarsinnaanissaanut, tunniussinermi ikiorsiissutip suussusaa allassavaa. Taamaaqataani aningaasat atorsinnaasat qaffanneqarnerat pillugu kommunalbestyrelsip aalajangiineri Ilanngaassivimmi nalunaarsorneqassapput, taamaalilluni akiliinernik nuussinerit suliarineqarneranni tamanna eqqarsaatigineqarsinnaassalluni, taamaalillunilu tamanna pillugu paasissutissiinerit naatsorsukkani innuttaasumut nassiunneqartuni takuneqarsinnaassalluni.

Paasissutissat kisitsisitigut paasissutissanik assigiinngitsunik suliaqarnermi atorneqarsinnaapput, assersuutigalugu aningaasat atorsinnaasat il.il. annertusissutaat takuneqarsinnaaqqullugit.

§ 34-mut

Ilanngaassiviup ingerlanneqarnera Naalakkersuisunit aalajangersarneqartoq pillugu kisitsisitigut paasissutissat pissarsiarinissaannut akileraartarnermut ingerlatsivik pisussaaffeqarpoq. Tamanna assersuutigalugu tassaasinnaavoq ingerlaavartumik akiitsunut akilinngitsuukkanut kisitsisitigut paasissutissat, isertitanut kisitsisitigut paasissutissat il.il. aamma taakkua tassaasinnaapput periaatsimik ingerlatsineq il.il. pillugit kisitsisitigut paasissutissat.

§ 35-mut

Imm. 1-imut

Akileraartarnermut ingerlatsiviup Ilanngaassivimmi allaffissornikkut aqutsineq isumagisarissavaa. Tamatuma atuunnerani ilaatigut akileraartarnermut ingerlatsiviup Ilanngaassiviup atorneqarneranut peqqussutit aamma suleriaasissanut tunngavissarititaasut,

akiliisussaaitaasunut aamma akiligassiisunut Ilangaassivik aqputigalugu akiliisitsisinnaasunut atuuttussat suliarissavai. Akileraartarnermut ingerlatsiviup suleriaasissanut tunngavissarititaasut ingerlaavartumik nutartertassavai kiisalu akiligassiisut Ilangaassiviup atorpeqarneranut il.il. tunngavissarititaasut malinneraat nakkutilliissalluni. Akileraartarnermut ingerlatsivik Ilangaassivimmi periaatsimut ingerlatsinikkut akisussaasuvoq. Taamaattoq Ilangaassivimmi ingerlatsineq avammut suliarinnittussarsiuunneqassasoq naatsorsuutigineqarpoq.

Aammattaq paasissutissanik akisussaasunut paasissutissallu siunertarisaannut atatillugu siunnersuummi § 37-mut nassuiaatit innersuussutigineqarput.

Imm. 2-mut

Siunnersuutigineqarpoq akileraartarnermut ingerlatsivik akileeqqusissutit erseqqissumik amigaateqartut imaluunniit kukkusuusut tigujumannginnissaannut piginnaatinneqassasoq. Naatsorsuutigineqarpoq Ilangaassivimmi periaatsimi periaatsimut maleruagassat arlallit, akileeqqusissutini kukkunerit pinngitsoortinnissaannik siunertaqartut, aalajangersarneqassasut, assersuutigalugu akileeqqusissutit annertoorujussuarnik aningaasartaqartut nassiunneqarsimasut.

Taamaaqataanik akileeqqusissutit, akileraartarnermut ingerlatsivimmi piumasaqaatinik aalajangersagaasunik naammassinninngitsut, periaatsimi tigujumannginneqarsinnaassapput. Imm. 2-4 aalajangersakkanik akulikitsumik atorpeqartartussat naatsorsuutigineqanngitsunik, kisianni sillimmataasussatut isigineqartariaqartunut, imaqarput. Akileeqqusissutitut akiligassiisup periaatsimut nuussimasaannut kukkunerit allassimaffiunik periaatsimi allattuisoqarluni ingerlatsinermi nalinginnaasumik pisartut, imm. 2-4-imi aalajangersakkani pineqartunut ilaatinneqanngillat. Tassani paasissutissani nalunaarsukkani, aningaasartani, allaffissani kode-ni, imaluunniit pissutsini allani kukkuneqarsinnaavoq, nuussineq taamatut, imaluunniit nuussinermi ataatsimoortumi akileeqqusissutit ataasiakkaat kukkuneqartutut nalunaaqutserneqarlutik, taamaalillutillu kukkunerit iluarsineqarnissaasa aammalu paasissutissat eqqortumik nuunneqarnissaasa tungaanut periaatsimit akuerineqanngikkallarlutik. Taamatut pisoqarnera akiligassiisut attuumassuteqartut aammalu periaatsimut akisussaasup oqartussap akornanni oqaloqatigiilluni ingerlatsinermut nalinginnaasumut ilaatillugu iluarsineqartassasut naatsorsuutigineqarpoq.

Imm. 3-mut

Siunnersuutigineqarpoq, akileraartarnermut ingerlatsiviup akileeqqusissutini annertuunik kukkuneqartoq imaluunniit amigaateqartut paasippagu, akiligassiisup akileeqqusissutai tamarmik tigujumannginneqarsinnaassasut. Aalajangersakkami siunertaavoq innuttaasut periaatsimut tatiginninnerisa nukittorsarneqarnissaa. Akileraartarnermut ingerlatsivik taamatut allorialinnginnermini akiligassiisumut, akileeqqusissutini il.il. ajornartorsiutaasimasinnaasut iluarsineqarnissaannut, saaffiginnissaaq. Aalajangersagaq taamaallaat, akiligassiisup mianersunnginnerani akileraartarnermut ingerlatsivimmi il.il. isumalluutunik

naleqqutinngitsumik atuilersitsisoqarnerani, qaqutigoortorujussuarmik pisariaqartassasoq naatsorsuutigineqarpoq.

Tamanna pisinnaavoq, assersuutigalugu akiligassiisup aningaasanik tunngavissaqanngitsumik imaluunniit annertuunik amigaateqartunik akiliisitsiniarnermut Ilangaassivik pisuni arlalinni atorsimagaa paasineqarpat. Akiligassiisumi naammangitsumik akiligassaqartunik aqutsineq aamma, akiligassiisup Ilangaassivimmi periaatsimik atuinissamik mattunneqarneranik malitseqarsinnaavoq.

Aamma akiligassiisumit akiligassiissutit aalajangersimasumik suussusillit imaluunniit akiligassiisumi immikkoortortaqaqarfimmi imaluunniit oqartussami aalajangersimasumi akiligassiisumit akiligassiissutit aalajangersimasumik suussutillit pillugit akileeqqusissut, akileraartarnermut ingerlatsiviup tigungmanngissinnaavai. Tamanna assersuutigalugu pisariaqalersinnaavoq, kukkuneq akiligassiinernut aalajangersimasumik suussusilinnut imaluunniit akiligassiisumi immikkoortortaqaqarfimmut imaluunniit oqartussamut aalajangersimasumut tunngassuteqarpat. Akiligassiisup taamaattoqarnerani akiligassaq allatut akilersinniartariaqalissavaa.

Akileraartarnermut ingerlatsiviup taamatut aalajangerneq pillugu Naalakkersuisut aamma akiligassiisoq nalunaarfigissavai.

Imm. 4-mut

Akiligassiisup pissutsit isornartoqartinneqartut iluarsisimappagit, akileraartarnermut ingerlatsiviup akiligassiisumit akileeqqusissummik tigusaqartaleqqinnissaq aalajangiussinnaavaa.

Tamanna pitinnagu akiligassaqartunik suliarinninneq aqunneqarsinnaasoq, kiisalu periaatsit pisariaqartut il.il. ingerlalluartut, akiligassiisup akileraartarnermut ingerlatsivimmut uppersassavaa.

§ 36-mut

Imm. 1-imut

Aalajangersakkami siunnersuutigineqarpoq kommunit illoqarfimmiinnerminni aamma nunaqarfimmiinnerminni Ilangaassivimmi periaaseq pillugu innuttaasunut sullissinissamut pisussaaffilerneqassasut.

Iltersuinissamut pisussaaffeqarnermi aningaasat atorsinnaasat qaffanneqarnissaat pillugu qinnuteqarnissamik siunnersuineq aammalu periaatsimik atuinissaq il.il. pillugit IT-mik atuinissamik piginnaasaqanngitsunik iltersuineq, pineqartunut ilaatinneqarput.

Imm. 2-mut

Siunnersuutigineqarpoq akileraartarnermut ingerlatsivik ilitsersuutinik allanillu najoqqutassanik kommunit imm. 1-imi innuttaasunik sullissinissamik siunnersuutigineqartumik kivitsisinnaanissamut atugassaannik, suliaqassasoq.

§ 37-mut

Imm. 1-imut

Siunnersuutigineqarpoq Ilangaassiviup ingerlanneqarnerata suliariumannittussarsiuunneqarnissaa pillugu isumaqatigiissuteqarnissamut Naalakkersuisut piginnaatinneqassasut. Naalakkersuisut ukiut 10-t angullugit isumaqatigiissuteqarnissamut piginnaatinneqarput.

Suliariumannittussarsiuussinermi aamma innuttaasunik sullissineq ilaatinneqarsinnaavoq.

Imm. 2-mut

Akiligassatigut kinguaattoorutit, akileraarutit pillugit paasissutissat, akiliinerit, pisortat oqartussaasuisa akileeqqusissutaat, innuttaasut suliffeqarfiillu siunnersuummi aalajangersakkat maleruagassallu naapertorlugu tamatumunnga innersuussutigineqartut aqunneqarnissaannut akisussaasumik ataatsimik arlalinnilluunniit periutsimut akisussaatinneqartussanik toqqaanissamut Naalakkersuisut periarfissaqarnissaat siunnersuutigineqarpoq.

Naalakkersuisut pisortani oqartussaq namminersorlunuunniit suliffiutilik il.il. periutsimik akisussaasussatut toqqarsinnaavaat. Periutsimik akisussaasup suliassaraa nalunaarsukkanik Ilangaassivimmi akiliisarnernut periutsimi ilaatinneqartuni aqutsinissaq.

Tamatumani pingaarnertut suliassat makku ilaatinneqarput:

- Innuttaasup kontoanut aningaasanik innersuussinissaq siunertaralugu sulisitsisumit isertitat il.il. akilerneqarnerat pillugu nalunaarsuineq. Periutsimi atuisussat killilersimaarneqassapput pisortat aningaaserivimmi kontut pillugit inatsisissaq akuerineqarnerata kingorna pilersinneqartussat naatsorsuutigineqartoq malillugu innuttaasut aningaaserivimmi kontuisa nalunaarsorneqarnissaat eqqarsaatigalugu.
- Akileraartarnermut aqutsiviup innuttaasut akiligassinneqarnissaat pillugu aalajangiisinnaanissaa siunertaralugu paasissutissat akiliisitsiniarnermik oqartussaasumit, akileraartarnermut aqutsivimmit aammalu inuup normuinik nalunaarsuiffimmit tiguneqartut nalunaarsornissaat.
- Innuttaasut akiligassiiffigineqartussat ilanngunneqartut ilaasulluunniit pillugit nalunaarsuinissaq.
- Akilikkanik akileeqqusissutinillu nalunaarsuinissaq.
- Innuttaasut aningaasat atorsinnaasaasa annertussusissaat pillugit nalunaarsuinissaq.

Oqaaseqatigiit aappaata kingorna oqaatigineqartut malillugit pisortani oqartussaasut namminersorlutillu suliffiutillit il.il. periutsimik akisussaasutut toqqarneqarsinnaapput. Periutsimik akisussaasussamik taamaallaat toqqaasoqarnissaa eqqarsaatigineqarpoq. Taamaattorli periutsimik akisussaasunik arlalinnik toqqaasoqarnissaa pisariaqartinneqarsinnaavoq. Periutsimik akisussaasumik toqqaanissaq sioqqullugu periutsimik akisussaasup suliassamik isumaginninnissamut pisariaqartumik misilittagaqarnissaa piginnaaneqarnissaalu Naalakkersuisunit qulakkeerneqartariaqarpoq.

Imm. 3-mut

Imm. 3-mik siunnersuutigineqartoq malillugu periutsimik akisussaasup ingerlataanut, tassungalu ilanngullugu periutsimik akisussaasup ingerlataanik nakkutilliinissaq pillugu maleruagassanik erseqqinnerusunik Naalakkersuisut aalajangersaasinnaapput. Tamatumani pingaartumik eqqarsaatigineqarpoq namminersorlutik suliffiutillit imaluunniit assigisaat periutsimut akisussaasutut toqqarneqartut periutsimik akisussaasutut Naalakkersuisunit nakkutilliivigineqassanersut pillugu maleruagassanik aalajangersaasoqassammat.

Maleruagassani assersuutigalugu siunniunneqarsinnaavoq inuit nalunaarsuiffimmut isersinnaasut atornerluisinnaanermik periarfissaasa killilersimaarnissaat. Tamanna ilaatigut pisinnaavoq sillimaniarnermut periutsinik suliaqarnikkut, sulisut nalunaarsuiffimmut isersinnaatitaasut isumannaatsuunermik akuerineqartarnissaat aammalu nalunaarsuiffimmut toqqaannartumik isersinnaasut ikitunnguutinnissaat. Aammattaaq kikkut nalunaarsuiffimmit paasissutissanik pissarsisimanersut aammalu sulisut ataasiakkaat imaluunniit periaatsimik atuisut paasissutissanik aalajangersimasunik pissarsisimanersut pillugu nakkutilliisoqarsinnaaneranut maleruagassanik aalajangersaasoqarsinnaavoq.

Aammattaaq suliffeqarfimmi periutsimik akisussaasumi sulisut nalunaarsuiffimmut isersinnaatitaasut nipangiussisimasussaatitaanerannut piumasaaqatinik aalajangersaasoqarsinnaavoq. Aammattaaq siunnersuummi nipangiussisimasussaatitaaneq pillugu aalajangersakkat innersuussutigineqarput. Taakku pingaartumik atorneqarsinnaapput suliffeqarfik namminersortuuppat assigisaanilluunniit inissisimappat. Aammattaaq aalajangersagaq naapertorlugu suliffeqarfik periutsimut akisussaasuusoq paasissutissanik atornerluisoqarneranut atatillugu ajoquserneqartunut annaaneqartunullu matussusiisussammik sillimasiissasoq pillugu maleruagassanik aalajangersaasoqarsinnaavoq.

Sulisut nalunaarsuiffimmit paasissutissanik immikkut pissarsinissamik pisariaqartitsisut nalunaarsuiffimmut kisimik isersinnaatitaanissaat siunertaavoq. Paasissutissat sulisut taakku ilisimaligaat nipangiussisimasussaatitaaneq sakkortusisaaq siunnersuummi aalajangersarneqartussatut siunnersuutigineqartoq kiisalu – sulisoq pisortani atorfeqarpat - pisortani sulisut nipangiussisimasussaatitaanerat pillugu nalinginnaasumik maleruagassat naapertorlugit atuutissaaq.

Aammattaaq periutsimik akisussaasoq pisortat oqartussaasuinut naammagittaalliutigineqarsinnaanera pillugu maleruagassanik aalajangersaasoqarsinnaassaaq. Aalajangersagaq inuit pillugit paasisutissanut aaqqissuussineq malillugu Datatilsynip nakkutilliisinnaaneranut killiliisinnaaneq pillugu maleruagassanik aalajangersaasinnaanermut tunngavissiisunik imaqanngilaq.

§ 38-mut

Imm. 1-imut

Siunnersuutigineqarpoq Ilangaassivimmi periaatsimi kukkusoqartillugu imaluunniit akileraartarnermut ingerlatsivimmit kukkusoqartillugu, taarsiinissamut akisussaaffimmut maleruagassanik aalajangersaasoqassasoq. Akiliineq eqqortumik nalunaarsorneqarsimanngippat naatsorsuutinilu allanneqarsimanngippat, imaluunniit akiliineq teknikkikkut unittooqattaarnernik imaluunniit Ilangaassivimmi imaluunniit akileraartarnermut ingerlatsiviup tungaanniit taamaaqataanik kukkunernit eqqugaasimappat, assersuutigalugu aningaasat innersuunneqartut aammalu nuunneqartut imminnut naapertuutinngippata, akiliineq kukkuneqartutut isigineqassaaq.

Akileraartarnermut ingerlatsiviup tungaanniit kukkusoqarsimappat imaluunniit sumiginnaasoqarsimappat, akileraartarnermut ingerlatsiviup akiliutitut sullissivimmut assingusumik periaatsimik ingerlatsisumit naatsorsuutigineqartariaqartumik mianersuussilluni peqqissaarlunilu kukkuneq pinngitsoortissimasinnaagaluarneraa imaluunniit pinngitsoortissimasariaqaraluarneraa, nalilersorneqassaaq.

Imm. 2-mut

Iliuuseqarnerit, iliuuseqannginnerit imaluunniit pisut ajoqusiisussat akiliisussaataasup imaluunniit innuttaasup mianersuaalliorneranut imaluunniit piaaraluni iliuuseqarneranut il.il. tunngatinneqarsinnaappat, taamaattoq akileraartarnermut ingerlatsivik imm. 1 malillugu taarsiinissamut akisussaatinneqassanngilaq.

Imm. 3-mut

Iliuuseqarnerit, iliuuseqannginnerit imaluunniit pisut ajoqusiisussat akileraartarnermut ingerlatsiviup aqussinnaasaasa avataaniittunut, akileraartarnermut ingerlatsivik akisussaasuunngilaq, soorlu pinngortitami ajunaarnersuaqarnerit il.il. Akileraartarnermut ingerlatsivik taamaattut pisoqarsinnaanerata Ilangaassivimmi sunniisinnaaneranik aarlerinaataasunik annikillisisinnaasunik naleqquttunik iliuuseqarsimanersoq pisuni ataasiakkaani tamaginni nalilersoqqinneqartariaqarpoq, assersuutigalugu piareersimasoqarnikkut aamma periaatsinik pisariaqanngitsunik il.il.

§ 39-mut

Siunnersuutigineqarpoq inuit Ilangaassivimmi sulisut, inatsisitigut pisinnaatitaasoq pisussaataitaasorlu aamma inuit pillugit paasissutissanut tunngatillugu annertusisamik nipangiussisimasussaataitaaneq mianersuutissagaat. Nipangiussisimasussaataitanermi ingerlatseqatigiiffinni sulisut Ilangaassivimmut atasunik suliassanik isumagisaqartut, pineqartunut ilaapput.

Aalajangersakkami matumani nipangiussisimasussaataitaaneq, akileraaruserinermi ingerlatsineq pillugu Inatsisartut inatsisaat malillugu nipangiussisimasussaataitanermut naapertuuppoq.

§ 40-mut

Imm. 1-imut

Aalajangersakkami erseqqissarneqarpoq, akiligassiineq akileqqusissuteqarluni ilanngutsinneqarsimagaluartoq aammalu Ilangaassivik aqqutigalugu akilerneqarsimagaluartoq, innuttaasup pisinnaatitaaffini aammalu naammagittaalliorsinnaanini attatiinnassagaa.

Akiliisitsinerit kukkuneqartut imaluunniit akuersissummik allagartalerneqarsimanngitsut akerliliissuteqarfigineqarnerat akiligassiisumut ataasiakkaamut akileeqqusissummik nassiussisimasumut ingerlatinneqassapput. Akiliisitsineq akuersissummik allagartaqartinneqanngitsoq tassaasinnaavoq, akiligassiineq taanna aalajangersimasoq maleruagassat malillugit Ilangaassivik atorlugu akilersinneqaqqusaanngitsoq. Akiliineq kukkuneqartoq ingerlanneqarsimappat, akiligassiisup akiliutigineqartoq innuttaasumut utertinnissaanik pisussaaffeqarpoq.

Naammagittaalliorsinnaanerup, naammagittaalliuutinik aalajangiisartumut naammagittaalliorsinnaanerup imaluunniit eqqartuussivinni suliassamik qaqqitsinnaanerup atorluarnissaanut innuttaasut periarfissaqarnerat, taamatuttaaq akiligassiinerup Ilangaassivik aqqutigalugu akilersinneqarsimaneranit sunnerneqassanngilaq.

Imm. 2-mut

Akileeqqusissutip imaluunniit akiligassiisutip imarisaasa naammagittaalliuutigineqarneri tamarmik akiligassiisumut ingerlatinneqartassasut, erseqqissarneqarpoq.

§ 41-mut

Imm. 1-imut

Siunnersuutigineqarpoq akileeqqusissut kukkuneqarpat imaluunniit amigaateqarpat, akiligassiisup akileeqqusissutip Ilangaassivimmit peerneqarnissaanut pisussaaffeqarnera, inatsimmi aalajangersarneqassasoq.

Imm. 2-mut

Paasineqarpat akiligassiissut tunngavissaqanngitsumik suliarineqarsimasoq, ulluni 14-*ini* piffissamut killissaliussap iluani akiligassiissutip tunuartinnissaanut akiligassiisoq pisussaaffilerneqarpoq.

Piffissamut killiliussiaq, piffissaq akiligassiisup tunngavissaqanngitsumik akiligassiisoqartoq paasitinneqarnera aallarnerfigalugu, naatsorsorneqassaaq. Tamanna assersuutigalugu tassaasinnaavoq, innuttaasup naammagittaalliorluni imaluunniit akerliliissuteqarluni taamatut pisoqarnera akiligassiisumut paasitikkaa.

Pisinnaatitaanani akiliisitsineq, assersuutigalugu piumasaqaat akilerneqareeraluartoq imaluunniit akiliisussamit allatut akilereerneqarsimagaluartoq, akiligassiisup akiligassiissummik nassiussinerani pilersinnaavoq.

Imm. 3-mut

Imm. 3-*mi* siunnersuutigineqarpoq, akiligassiisup imm. 2-*mi* piffissamut killiliussap iluani aningaasat utertinngippagit, aningaasat ernialersorneqassapput. Erniat aningaasartaat akiligassiisumit akilerneqassapput.

§ 42-*mut*

Imm. 1-*imut*

Aalajangersakkami aalajangersarneqarpoq, Ilangaassiviup ingerlanneqarnera pillugu naammagittaalliuutit imaluunniit saaffiginnissutit, akileraartarnermut ingerlatsivimmut ingerlatinneqartassasut.

Imm. 2-*mut*

Akileeqqusissutit Ilangaassivimmi ilanngutsinneqartut naammagittaalliuutigineqarnerat akileraartarnermut ingerlatsivimmi suliarineqarsinnaanngillat. Saaffiginnissuteqarnermi akileraartarnermut ingerlatsiviup innuttaasup akiligassiisumut attaveqarnissaa, innersuussutigisassavaa.

Imm. 3-*mut*

Aalajangersakkami akileraartarnermut ingerlatsiviup ilitersuisussaataitanera aammalu saaffiginnissummik oqartussamut eqqortumut ingerlatitseqqiisussaataitanera killissalersorneqarpoq. Suliassanik suliarinnittarnermut inatsimmi maleruagassat malillugit oqartussamut eqqortumut saaffiginnissummik ingerlatitseqqinnissamut oqartussaasoq pisussaaffeqarpoq. Aallaaviusoq taanna pisumi matumani atorneqanngilaq. Siunnersuutigineqarpoq innuttaasoq ikiorneqarnissamik immikkut pisariaqartitsippat, akileraartarnermut ingerlatsivik oqartussamut eqqortumut nassiussineranut taamaallaat ikiuussinnaasoq imaluunniit attaveqartitsisinnaasoq. Taanna assersuutigalugu tassaasinnaavoq, inuk ersarissumik timimigut imaluunniit tarnimigut piginnaanikillisimasoq tassani pineqarpat.

Siunnersuut malillugu aalajangiisinnaatitaanerup agguarneqarnerata erseqqissarneqarnissaa, kiisalu akileraartarnermut ingerlatsivimmi isumalluutinik tatisimannissinnaasumik, akileraartarnermut ingerlatsivimmut pisariaqanngitsumik saaffiginnittoqarsinnaannginnissaa, aalajangersakkami siunertaavoq.

§ 43-mut

Imm. 1-imut

Aalajangersakkap malitsigisaanik, tunniussassanik Ilanngaassivimmut akilerneqartussatut pisussaaffiusunik akiliinnginneq, Kalaallit Nunaanni pinerluttulerinermut inatsit malillugu akiliisitsinermik malitseqarsinnaavoq.

Ilanngaassivimmut isertitanik akiliinissaq pillugu peqqusissummik naammassinninnginneq aamma akiliisitsinermut akisussaatsinermik malitseqarsinnaavoq.

Imm. 2-mut

Aalajangersakkap malitsigisaanik, peqqussutini Inatsisartut inatsisaat naapertorlugu aalajangersagaasuni aalajangersakkanik unioqqutitsinermut akiliisitsinermik pineqaatissiisarneq pillugu maleruagassanik aalajangersaasoqarsinnaavoq.

Oqaaseq "unioqqutitsineq" annertusillugu nassuiarneqassaaq. Oqaaseq aalajangersakkanut akiliisitaanermik akisussaatsiviusinnaasunut naapertuutinngitsumik iliuuseqartoqarluni imaluunniit iliuuseqartoqarani pisoqarneranut ataatsimoortumik taaguutitut atorneqarpoq. Peqqusissummik naammassinninnginneq assersuutigalugu unioqqutitsinermut oqaatsimi pineqartunut ilaavoq.

Imm. 3-mut

Aalajangersakkap malitsigisaanik, aamma pisinnaatitaasut pisussaataasullu, assersuutigalugu suliffeqarfik imaluunniit peqatigiiffik, Inatsisartut inatsisaanni maleruagassanik aamma peqqussutinik tamanna naapertorlugu aalajangersagaasunik unioqqutitsinermut akiliisitsinermik pineqaatissinneqarsinnaapput.

Imm. 4-mut

Aalajangersakkami aalajangersarneqarpoq, suliaq akiliisitsinermut akisussaaneermut tunngassuteqartoq, eqqartuussivimmi aallartinneqassasoq.

Imm. 5-imut

Aalajangersakkap malitsigisaanik, akiliisitsinerit pineqaatissiissutaasut Nunatta Karsianut nakkartinneqassapput.

§ 44-mut

Imm. 1-imut

Inatsisartut inatsisaat qaqugu atuutilissanersoq aalajangernissamut Naalackersuisut piginnaatinneqarput. Aalajangersakkami uniffiit aappaanni Naalackersuisut Inatsisartut inatsisaata ilaasa ilaanit allanit kingusinnerusukkut atuutilernissaat pillugu maleruagassanik aalajangersaanissamut piginnaatinneqarput.

Taakkua tassaasinnaapput akiliisussaataitaasup Ilangaassivik aqutigalugu isertitanik akiliinissamut pisussaaffeqarnera pillugu aalajangersakkat, akileeqqusissutinik akiliisitsisinnaalinnginnermi periaatsimi ilaatinneqartut misilerarneqarnissaat siunertaralugu, Ilangaassivikkoortumik akileeqqusissutit akilersinneqarsinnaasut pillugu aalajangersakkanit, siulliullugit atuutsinneqalertut. Taamatuttaaq siunnersuutip ilai allat kingusinnerusukkut atuutilersinnaapput.

Imm. 2-mut

Aalajangersagaq siunnersuutip atuuttussanngorneranut eqqarsaatigineqarpoq atorneqassasoq, Ilangaassiviup aaqqissornerarata atornerani nunatsinni inuttaasuni ikinnerusuni misilittaaneq pisariaqartinneqassappat, Kalaallit Nunaanni tamakkiisumik atuutilinnginnerani.

Naalackersuisut Inatsisartut inatsisaat kommunip sumiiffiani atuutilersissinnaavaat. Atuutilersitsineq nalunaarusiornermi pissaaq. Ilaanakortumik siunnersuummik atuutilersitsinerup kingunerisinnaavaa, siunnersuummi aningaasarsianik ikisinermi tunniussinermilu aalajangersakkat atuutilersinneqartut, akiligassanik akiliisitsisarnermi siunnersuummi aalajangersakkat atuutilinnginnerini.

Naalackersuisut nalunaarusiornermi imm. 2 malillugu pissutsini isiginiartariaqarpaat sulisitsisoq akiligassiisorluunniit kommunip pineqartup avataaniissinnaammat. Tassunga soorlu atatillugu nalunaarusiornermut misiliutaasumik suliniuteqarnermut inatsisip imarisai nalunaarummi pisariaqartumik avaqqunneqarsinaanerini pisariaqartitsisoqarsinnaammat.